

UTL AT DOWNSVIEW



D RANGE BAY SHLF POS ITEM C
39 10 10 06 07 025 5



DR

568

.8

C48F38

Fatima 'Aliye

Ahmed Cevdet Pasa ve

zamani

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

✓ 2687

8a/69

Digitized by the Internet Archive
in 2010 with funding from
University of Toronto

احمد جودت پاشا و زمانی

Fâtima, 'ALİye


محرری
فاطمه علیہ

Ahmed Cevdet Paşa ve zamani

مہر حق مؤلفہ عائددر

طالب و ناشری
قناعت کتابخانہ سی صاحبی الیاس

مہر سنز نسخہ لڑ ساخته در



در سعادت — قناعت مطبعہ سی

۱۳۳۲

مجله دانش و ادب

جلد ۱۰ شماره ۱



DR
568
.8
C48F38



مجله دانش و ادب

۱۳۳۱

مقدمه

حیات تاریخیه داخل اولان انسانلرک ترجمه حالی یازیلور .
اوایل برکیمسه نك حیات خصوصیتی بیله اوکره نیلمک ایسته نیلور .
اوکیسه بی اوایل بر مرتبه ایصال ایلان حیات خصوصیتی اولدینی
حاله آنی حیات تاریخیه نائل ایلان اسبابدرکه آنک احوال
خصوصیه سنک دخی اوکره نیلمی ارزوسنی حصوله کتیرر .
احمد جودت پاشانک ترجمه حالی دیمک آنک حیات علمیسی ،
سیاسیتی مساعیتی اولوب اوجهتیرک نظر اعتباره آلدیره جفی حیات
خصوصیتی ده بونلر میانته کیره ر .

تعلیم و تدریس عاجزی به غیرت و اهتمام کوسترمش اولان پدرم
مرحومک کندیشنک درعهده ایلدیکی درسلدن بری ده تاریخ درسی
اولدیغندن او درسک تعلیم و تقریرلرینه طبیعی کمندی زمانی تاریخی ده
داخل اولمشدر . کندیشنک عاجزی تدریس ایچون صرف ایلدیکی
مساعیدرکه احمد جودت پاشا نصل چالشمش مسئله سنه نصل بزمانده
چالشمش اولدیغنه دائرده بیاناده بولندیریور .

قارئین کرام مورخ جودت پاشانک بکا تدریس ایلدکیرینی کندیلرینه
نقل ایله مکتبکم حقیقتندن امین اوله ییلورلر . لکن کندیشنک
بیلدرنکیرینک ، تدریس و تعلیم ایلدکیرینک هپسینی ده بوآرده
بوله جقلرینی تأمین ایدهم ! ممکن اولدینی قدر یازه ییله جکم ! معلومدرکه
تاریخک انکشاف اسراری زمانله اولور . وقایع تاریخیه ، اصول

تحریر تاریخک اوپله غنجه لریدر که آنجق زمان ایله آچیلور، کندیلرینی کوسترلر.

بوعاجزک پدرم مرحومک شاگردی و محرم اسراری اولدیغنی بیلنلردن برخیلی ذوات مرحومک مفصل بر ترجمه حالیه آنک زمانه عائد احوال حقنده بر اثر یازمقلغم ایچون اخطاراتده بولندیلر. بوبابده برچوق مراجعتلر اولدی. بویله برشی یازمقده عاجزلرنجه چوقدن مصمم ایدی. حتی مرحومک اثنای تدریسده «ای بلله! ای حفظ ایت! بنم نشر ایتکه موفق اوله مدقلریمی بلکه برکون سن نشر ایده بیلورسین!» دیمش اولمسنیده بروصیت مقامنده تلقی ایله یورم.

دور مشروطیتمیزک آثار فیضندن اوله رق شوکونلرده حقیقی لسان تاریخک مملکتهمزده دخی تکلم اولندیغنی برلسان فصیح تاریخله یازیلان آثار تاریخیه ابراز ایله یورسهده تاریخ نهدیمک اولدیغنی درک ایلیه جک برسویه عرفان خلقمیزک جمله سنه نصیب اولدیمی که اسامیسی کچه جک کیسه لک هپ اولاد واحفادیده او آکلایانلر میاننده بولمنش اولسون!... پدر یاخود اجدادک کناهندن جناب حق اولادی مسؤل ایله مدیک کی سوء حرکاتندن ده انسانلر مسؤل طوته مازلر! تاریخده اجدادینک حسن خدمتلرینی علویتی بیاناتی کوره نلر آنلره پیرو اولمغه چالیشمه لری لزومی کی عکس حالی کوره نلرده اودرلو احوال دن اجتناب ایله کندی ذاتی وشخصی اعلا ایده بیلورلر. آثار تاریخیه بی حقایق وجهله یازمق مجبوری اولدیغندن بویله بر امر مهمه قارشو سرفرو ایله مک انسانک کندی عرفانی، ذاتی، شخصی حقنده کی قیمت وعلویتی ابراز ایلر. اوشخصیت که انسان یالکگز اندن، کندی افعال وحرکاتندن مسؤلدر!..

ملل متمدنه و مترقیه ده علم تاریخک آلدینی موقع اهمیت ، تاویل و تغیرک یر بوله میه جفی قدر مضبوط ، کذب و طرفدارلک ایریشه میه جکی قدر معلا اولوب قانون حقیقتله حکم و اداره اولمقده بولندیغدن ، طریق ترقیه داخل اولمقده بولسان عثمانلورک آثار تاریخیه یازم جق محررلری ده بوندن صوکره یازیله جق آثار تاریخیه نک تاریخک اوقانون حقیقته و لسان فصیح و سربستیسنه کوره یازلمسی مجبوریتنی کورریورلردی . خلقمزک برچوغی لسان اجنبیه واقف بولندینی جهتله آرتق تاریخ نصل یازلدیغنی او کرشم ، علم تاریخک مملکتمز میدان انتشارنده وجه حقیقیسیله نمایان اولمسی آثار تاریخیه نک لسان حقیق تاریخ ایله ترکیه دخی یازلمسینه قلمش ایدی . یقینلرده بوایلک خطوه یی آتآن غیرتورلر کورولدی . و آثارلرنده خلیجه قطع مراحل ایلدکلری مستبان اولدی . دول مشروطیه و ملل مترقیه ده اولدینی کبی اسلاف حکمداراندن دخی لسان تاریخله بحث ایلهرک آنلردن حکومت عثمانیه یی توصیع و اعلا ایدنلرک احوال ممدوحه و حسناتلری و حسن اداره لرله ، انحطاط و تدنی زمانلرنده بولسانلرک او احوالی بادی اولانلرک افعال و حرکاتی یازیلوب آکلادلدینی کورولدی .

عثمانلیلرک عالی طبقه سی اولان خاندان ذیشانک علم تاریخ نه اولدیغنه واقف بولنه رق علم و حقیقته حرمتلری طبقات نالیه نک سویه عرفانه بر نمونه ترقی و امتثال اوله جفی بدیهیدر .

بواثرک تحریری عاجزه ایچون بروظیفه اولدیغنی اخطار ایدن ذواتک سوزلرینی تسلیم ایدیورم . البت جودت پاشانک اوقدر معلومات تاریخیه یی تدریس و بر اثر قلمه اله جق قدر اصول تحریری تعلیم

خصوصنده بوعاجزه پك چوق امك ويرمسي برسوس وزينت ايچون
 دكل ايدى. كندى حياتى منافع عموميه ونشر معارفه حصرايشجه سته
 اوقدر آثار ميدانه كترين آدمك عاجزى اولصورته اخضارى ده
 البت انتشار معارفه خدمت ايچون ايدى. ديمك كه جودت پاشا بو
 معلومات تاريخيه ي كنديسيله برابر كوتورمك ايسته ميوب عالم علم تاريخه
 يراقق آرزو ايله مش. بزده او وديعه يي شمدريك ممكن اولديغى قدر
 يرينه تسليمه چايشه لم!

نه قدر يشايه جغى بيلمك بشره ميسر اوله مديغى كي بشر
 بر ساعتلك حتى بر دقيقه لك بيله حياتندن امين اولمق خصوصنده سائر
 حيوانانندن ممتاز بولنه جق بر امتياز نائل اوله مديغندن بنده
 بو خصوصده نه قدر موفق اوله جغى طبيعي بيله مم!... بر حيات
 بولنديغى مدتيجه استاديكم علم تاريخه بر خدمت امله بوعاجزه يه ويرمش
 اولديغى امكلى بر هوا ايتامك و آنك كوستردىكى ، اسلاك ايلديكى
 طريق مساعيده منافع و معارف عموميه من بولنده امكان دائره سنده
 چالشمق حقنده كي امل و مقصدم پك قوى ايسه ده بونده موفقيت
 احسان ايله جك اولان جناب حقدر .



تولد و تحصیل ابتدائی

احمد جودت پاشا ۱۳۳۸ سنه هجريه سنه روز حضره قرق گون قاله رق لوفچه قصبه سنه تولد ايله مشدر . احمد تسميه اولمشدر ، پدری لوفچه اشرف وجوهندن ومجلس اعضاسندن واصطبله عامره پايه لولردن حاجی اسماعیل اغدر . آنک پدری حاجی علی افندی رکه بوحاجی علی افندیله برادری سلیمان بایراقداره دائر تاریخ جودتک یدنجی جلدینک اون ایکنجی صحیفه سنه وینه حاجی علی افندیله دائر تاریخ جودتک طقوزنجی جلدینک اوتوز دردنجی صحیفه سنه معلومات واردر . احمد جودت پاشای پک کچوک ایکن حجر تربیه سنه آلوب بیوک پدرینک مسلکی اولان طریق علمیه تشویق وترغیب ایدن اودر . آنک پدری احمد اغا لوفچه مفتیسی اولان اسماعیل افندیکنک مخدومیدر . اسماعیل افندی لوفچه ده توطن ایتش اولان یولار قیران اوغلی احمد اغانک مخدومیدر . یولار قیران احمد اغا قرق کلیسا زادکانسندن یولار قیران اوغلاری نام خانداندن اولوب پروت محاربه سنه سرکرده اوله رق بالطه جی وزیرله برابر بولمش ودولته پک بیوک خدمتله ایتمشدر . کندیسى اوزمان لوفچه ده توطن ایلشدر .

یولار قیران اوغلی احمد اغا مخدومی اسماعیل افندیله پک جسم برثروت براقش اوده آنی حسن اداره ایلهمش ایکن آنک مخدومی احمد اغا میراث یدیلک ایده رک اسرافه قویولوب ثروتی صرف

واستہلاک ایلہ مکملہ بیوک پدرینک خدمتترینہ و پدرینک خاکہ حرمتہ
او خاندانک دائرہ سی ادارہ سنہ مدار اولمق اوزرہ حکومت طرفندن
کندیسنہ لوفجہ قضاسنک کیلہ و قنطار رسومی تخصیص ایدلمش
بو احمد اغا خیلی معمر اولمش . مخدومی علی افندی لوفجہ
ایانلرینک کاه محاسبہ کاتبی و کاه مدیر اموری اولہرق اسباب معیشتی
قازانمقده و آنک مخدومی اسماعیل اغادہ مکمل اولان چقتلکنک
ادارہ سیلہ مشغول اولوب آنک وارداتی آلمقده بولندیغندن و ایش
اہلی بر کیمسہ اولمسندن احمد اغایہ تخصیص اولتان رسوم مذکورہ دن
بشقہ او خاندانہ مخدوم و حفیدک محضول مساعیلری دہ کیرمکلہ
یولار قیران اوغلی خاندانی دائما پک کوزل بر ادارہ و معیشتہ
دوام ایلہ مشدر .

حاجی اسماعیل اغانک چقتلکی لوفچہ نیک مکمل و کوزل
چقتلکلرندن ایدی ، اوصمہ نہری چقتلکک اورتہ سندن مرور
ایلہ یوب چقتلکک اراضیسی داخلنہ کیردکدن صوکرہ ایکییہ بولنہ رک
بر اراضی واسعی بی دائرہ مادار چویردکدن صوکرہ تکرار برلشوب
کچمکلہ اولمسیلہ اورتہ دہ جسیم براطہ بولنمقده و بو اطہ قورولق
اولوب حیوانات اورادہ بسلنمکلہ ایدی . اوچ دکرمن دائما
چالیشمقده بغدادی واوندن ماعدا بال و سائرہ اخراجاتی پک مبذول
اولوب شراب فابریقہ سی و موم فابریقہ سی خارجه خیلی اخراجادہ
بولنمقده ایدی . حاجی اسماعیلی اغا غایت ذکی و فعال بر ذات اولدیغندن
چقتلکک محضولی مبذول اولوردی . حاجی اسماعیل اغا لوفچہ دہ
مشہور اولان طوپوز اوغلی خاندانک کریمہ سی غایشہ سنبل خانملہ
ازدواج ایلہ مش . احمد افندی بو ازدواجدن دنیاہ کلشدر .

لوفچه برقصه اولمغله برابر علوم و فنوندن اوزمانلر ممالکمزده نصیب اوله بیلان درجه سندن اک زیاده مستفید اولان اک منور قصبه لردن بری ایدی . درویش پاشا، مدحت پاشا، جودت پاشا کبی ذوات تحصیل ابتدائیلرینی لوفچه نك ابتدائی ورشدی تحصیللرینی جامع اولان مکتببنده اکمال ایله مشغولدر . مدحت پاشا مرحومک پدری درت سنه لوفچه نیابتبنده بولندیغندن مدحت پاشا تحصیل ابتدائیسینی لوفچه مکتببنده اکمال ایله مشغولدر .

احمد افندی کچوک سنده ایکن او قویوب یازدیغندن اوزمان لوفچه مفتیسی اولان حافظ عمر افندیدن علوم عربیه تدریسنه باشلا دیلشدر . فوق العاده غیرت و اقدام ایله ازوقت ظرفنده فنون عربیه ده خیلی ایلروله مش . علوم شرعیه ده دخی برار ممارسه کسب ایله مش . حلبی و ملتی او قودیغنده هنوز بلوغه ایرمه مش ایدی . اندن صوکره علم منطق و بیان ایله مشغول اوله رق حافظ عمر افندی نك یرینه مفتی اولان حافظ محمد افندی نده تدرس ایلدی .

آرتق علوم عالییه تحصیل ایچون استانبوله اعزامی لازم کلدیکنده هنوز اون بش یاشنی اکمال ایله اون التی یاشنه کیرمش بولنیوردی . او ائنده استانبوله مکتب حربیه نك تنظیمنه اعتنا اولدینی جهتله آنک مکسب فیض رفعت اوله جنی واحمد افندی نك اورایه ادخلی بعض ذوات طرفدن اخطار اولنمش ایسه ده جدی علی افندی بیوک پدری اسماعیل افندی نك مسلکینه سلوکنی آرزو ایده کلدیکی جهتله اوفکرنندن دونمسوب آنجق تحصیل علوم عالییه ایچون استانبوله کوندرلمسی ارزوسنده بولنمش . احمد افندی نك پدری اسماعیل اضا ایله والده سی عایشه سنبیل خانم اوغللرینی او کچوک یاشده کوندرمک

ایسته مامشار سده حجر تربیه سنده یتشدرمش اولان بیوک پدرینک
عزم قطعیسی و احمد افندی نیک آرزوسی مسئله نیک حصوله بادی
اولمدر .

کرچه اوزمان دلی مفتی دیه معروف اولان سابق لوفچه مفتیسی
پک عالم و متبحر بر کیمسه اولوب دها ایجه مدت احمد افندی بی اوقومغه
کافی کله بیلور سده دلی مفتی بربرده طوروب اوتورر کیمسه لردن
دکیش . حاجی علی افندی دلی مفتی به شهریه بر معاش تخصیص ایدرک
حفیدی احمد افندی به درس ویردرمک ایسته مش ایسه دلی مفتی
عالمده هیچ برشی ایله مقید اولمدیغی کبی زمان و مکان ایله ده مقید
اوله میه جفی بیانیله جواب رد ویرمش . اوجواب رد دن صوکرده ده
اوسنده دخی علم عاشقی اولان احمد افندی آنک درسندن استفاده
ایده بیلیمک ایچون اطرافنده طولاشورمش .

لوفچه نیک طلبه لردن و علماسندن بعض ذوات بالاتفاق دلی مفتیدن
تفسیر قاضی بیضاوی اوقومغه قرار ووروب هر کون اجتماع ایله
آنی کاه جامعده وکاه قهوه خانه ده بولوب تدرس ایدرلر مش . خواشی
مطالعهنه محتاج اولیوب تفسیر قاضینک نره سندن آچیلسه تعلیم
و تفسیره مقتدرمش . بوذوات مدرسلرینه برکون سوقاقده راست
کمشلر معلم همان یره اوتوروب ارقه سنی دیواره ویره رک تفسیر قاضی
اوقومغه باشلامش . دلی مفتینک بوحالی وایغیلرندن قیر صقاللی
خواجه افندیلرده بولسان طلبه لرینک تدرس ایده جکز دیه توز
طوپراق ایچنده سوقاق اورتیه سنده اوتورمه لرینی کورهن احمد افندی
سنأ کچوک ایسه ده غایت جدی وکامل اولدیغندن کنیدیسی ایچون
غیری آندن استفاده قابل اولمدیغی کوره رک استانبوله کیتیمک عزمنه

قوت و یرمش . و لوفچہدہ اوغلارینی تدریس ایدہ بیلہ جاک دلی مفتیدن بشقہ معلم بوانہ مدیغنی ، آنک دہ معاشلہ دخی یولہ کتیریلہ - مدیکنی کورن پدر ، والدہ سی دہ موافقہ مجبور اولغایہ حاجی علی افندی حفیدی احمد افندی بی استانبولہ کوندرمش .

مدرسه حیاتی

احمد افندی ۱۲۵۵ سنہ سی اوائلندہ استانبولہ کلوب چہارشنبہ یازارندہ کی پاپاس اوغلی مدرسه سنندہ بر حجرہ بولوب ساکن اولہرق فاتح جامع شریفندہ تحصیل علوم عالیہ ایلہ مشغول اولدی . احمد افندینک استانبولہ ورودندن برقاچ آی صوکرہ سلطان محمود ثانی حضر تلی وفات ایدرک سلطان عبدالحجید حضر تلی جالس تحت اولمش .

بیوک پدری و پدری احمد افندینک اداره سنہ لازم اولان پارہی منتظماً کوندر دکارندن احمد افندی مدرسه دہ کی ارقداشلی ایچندہ الک زیادہ رفاد حال ایلہ کچینان برکیمسہ ایدی . و کندیسنی اداره دن ماعدا طلبہ لردن بری آنک خدمتی کوروب یمکنی پیشوردیکندن آنی دہ احمد افندی بسلہ یوب اداره ایلردی .

درسعادتہ ورودندن صوکرہ ارہسی چوق کچمہ یوب مدرسه حمیدیه امتحانی آچیلمش . بومدرسه نک ہراوطہ سی ایچون ایکی آدمہ اعتبار اولتوب بریسی داخل اعتباریلہ اورادہ ساکن اولور دیکری خارج اعتباریلہ ہر صباح جنتمکان سلطان عبدالحجید خان تربہ سنہ کیدوب جزء اوقومق شرطیلہ مرتباتی آلور ایدی . لیکن بومدرسہ یہ امتحانسر طلبہ قبول اولنمازدی . احمد افندی ہنوز استانبولک امتحان

اصولنه آلیشماش اولمغله برابر امتحانه داخل اوله رق خارج اعتباريله براوطه نك تخصیصاته نائل اولمش که او معاش و تعینات قناعت شرطيله بر طلبه بی اداره ایده بیلوردی . احمد افندینک درسلی فاتح جوارنده بولندینی جهته داخل اعتباريله مدرسه حمیده ده اقامت آنک ایچون کوچ اولدینی کی چهارشنبه بازارندن هر صباح یکی جامعه کیدوب کلمک مشکل اولدیغندن جزء اوقومق ایچون بو ابی وکیل ایدوب حصه سنه عائد اولان وارداتی ده اکاترک ایلیرک یالکیز شرف اعتباريله اکتفا ایله مش . زیرا پدرینک کوندردیکی پاره آنی رفاه حال ایله اداره ایده جک مقدارده ایدی .

اواننده طریق قضایه بلا امتحان کیمسه نك قبول اولنماسی نظام اتخاذا اولندیغندن احمد افندی روم ایلی قاضی عسکرلیکی دائرة سنده ترتیب اولنان مجلس امتحانه کیروب طریق قضایه داخل اولمش .

۲۶۰ تاریخه قدر مدرسه لرده طلبه آنحق تحصیل و مباحث علوم ایله مشغول اولدینی حالده اندن سوکره مدرسه لر عالمنده دخی تغییرات عظیمه واقع اولوب مدرسه لرک اصول تعلیم و تحصیلی بوزولمش . او وقته قدر مدرسه لرده تعطیل کیچه لرنده عقد اولنان انجمن مصاحبتلرده مباحث علمیه دن بشقه سوز ایشیدلمز ایمش . اندن سوکره هر نه زمان بو انجمنلره کیتدیه عامیانه الفت و مصاحبتلره تصادف ایله یوب مباحثه علمیه ایشتمدیکنندن احمد افندی اندن سوکره او انجمنلره کیتما مشدر .

احمد افندی مدرسه لرک ایام تحصیلنده مرتب اولان درسلردن بشقه ایام تعطیلیه سنده جزئیاته دائر پک چوق رساله لر و طرز قدیم اوزره حساب ، جبر ، هندسه ، هیئت و سائر فنون حکمه دائر پک

چوق کتابلر اوقومش . مؤخرآ مدرسه لرده بو درس لر متروک و منسی اولمش .

شهور ثلثه ده طلبه علوم جلب رزق مقسوم ایچون طشره یه کیمکه مجبور اولدقلرندن ایام تحصیللری سنه نك نصفی راده سنده اولوب احمد افندی ایسه مدت تحصیلنده یالکیز بر رمضانده صله ایچون لوفچیه و بر دفعه ده بروسیله مناسبه ایله سلا نیک و سیروز و درامه یی کز مکه کیدوب سائر زمانلرینی استانبولده کیجه لی کوندزلی تحصیل علوم ایله کچیردیکندن ایام تعطیلده ایام تحصیلدن زیاده کسب معلومات ایله مش . بوجه تله سائر طلبه نك اون سنه ده تحصیل ایده مدیکی علوم وقونی بش التی سنه ظرفنده اکمال ایله مش . احمد افندی هندسه خانه بریه معلمی میرالای نوری بکه مختصر معانی و قاضیر کی کتابلر اوقوته رق بالمقابله اندن حساب ، جبر ، لوغاریمه و اصول هندسه و مجموعه المهندسین و اوقتانت رساله سی و اسحق افندینک علوم ریاضیه سی کی اصول جدیده اوزره علوم ریاضیه تعلیم ایله مش . و ریاضیاتده ظهور ایدن بعض مشکلاتی منجم باشی عثمان صائب افندیدن حل ایدرمش .

احمد افندی مدرسه ده تدریس اولتان علوم ایله اکتفا ایله میوب اهل و اربابندن مدرسه ده بولنمیان درس لریده تدرس ایله مکه برابر مذاکره و تدریس ایله ده اشتغاله باشلامشدر . پاپاس اوغلی مدرسه سنده ایکن شافیه ابن حاجبی اوقومش و اوزرینه تعلیقات یازوب « غایت الیان » تسمیه ایله مش و کتابلرک خطبه و دیباجه لرینه دائر بن الطلبة جاری اولان انجائی حاوی « بیان العنوان » نامیه

ترجمہ بر رسالہ دخی قلمہ آلمش و بو وجهلہ طلبہ بینندہ کسب تمیز
ایلمش .

طلبة علوم ایچندہ ریاضیات ایلم اشتغال ایدنلر آز اولوب اکثری
طشرده بولندقلری بلدهلرده رمضان شریفده افطار ساعتلری
تصحیح مقصدیلہ ربع رسالہلری قرائت ایلم اکثراً ایلمہ مکده
اولدقلرندن احمد افندی بالسهولہ ارتفاع آلمق ایچون بر رسالہ تألیفہ
« تعریف الارتفاع » تسمیہ ایلمہ مشدر .

بعده احمد افندی فاتح جامع شریفک محن ثمان مدرسهلرندن آق
دکز طرفندہ کی باش قورشونلی مدرسه سنہ حقیقہش و جامع شریف
حولیسنہ ناظر اولان گوشہ او طہ مستقلاً کندیسنہ تخصیص اولمش .
او او طہ مطول غشیش حسن جلیبنک او طہ سی اولدیفی مدرسه
روایاتندن ایلمش .

اوراده دخی مذاکرہ ایلم مشغول اولہرق امثلہ ، بنا ، نتائج -
الافکار اوزرینہ وصوکرہ مطولک اوائلہ برر قطعہ تعلیقات یازمش
ایدی . او وقت استانبولده خیلی علمای اعلام وار ایدی کہ برنجی
طبقہده بولنانلرک المشهورلری اقشہرلی عمر افندی و امام زاده اسعد
افندی و انطاکیہلی سعید افندی و دکزلیلی یحیی افندی و ایکنجی
طبقہده بولنانلرک اسر فرازلری ده و دینلی خواجہ و کریدلی خواجہ
ایلم شہری حافظ افندی ایدی . بونلر آرمہ سنندہ حکیم حمید افندی
نامندہ فاتحده درس او قودان بر خواجہ بولنوب کندیسی غایت ذکی
برکیمسہ ایسمہده طبابتلہ مشغول بولندیغندن اوزون اوزادیہ درسه
باقہ مزمش . لیکن قوہ ذکاسی حسدیلمہ بلا مطالعہ تدریس ایلمش .
و معلم مجاناً طلبہ یی تدوای ایلمہ مک و یچارہ کانه مددرس اولمق کی

خير پرور لک کرده دخی بولنورمش . طبقهٔ ثالثه ده حافظ سيد افندى ايله برکوى شاكر افندى بولنوب حافظ سيد افنديک علوم عربيه ده اقدارى شاكر افنديک ده فنون حکميه ده على الخصوص علم منطقده ملکه تامه سى وازايدى . آنلردن صوکره طبقهٔ رابعه ده آنلرک کعبه واره بيله جک کيمسه لرک بولنمماسى علمک انقراضنه اماره اتحاد اولنور ايمش .

اقتشهرلى عمر افندى مقتاعد مدرسلردن اولوب درس وکيلي وخواجه شهريارى بولمقله تدریسه وقتى يوقش . امام زاده اسمعيل افندى ايکي دفعه اجازت ويردکن صوکره دفعهٔ ثالثه اوله رق شهزاده جامعي جوارنده کى ابراهيم پاشا جامعنده شرح عقايد تدریس ايلديکنمن احمد افندى برمدت آنک درس لرند بولمش واطا کيله سعيده افنديک سليمانيه جامعنده کى مطول درس لرينه ده دوام ايله مش .

خواجه يحيى افندى اختيار تقاعدله عبادات و مطالعته مشغول ايدى . صکره طبقهٔ اولار جالى هب وفات اينديکننده يحيى افندى برحمت قالوب پک چوق معمر اولديغندن احمد افندى آنک زدينه دوامله پک چوق سنه لر علمندن استفاده ايمشدر .

حافظ سيد افندى چهارشنبه بازارنده ، اسماعيل افندى مدرسه سنده منزوى اولوب کيمسه ايله اختلاط ايمز او طه سنه فياوب دائماً مطالعه ايله مشغول اولوردى . لکن ايشام ، صباح منتظماً درسه چيقاردى . حتى ايام تعطيل ديمه يوب طلبه موجود اولدقجه تدریس ايلردى . شهور ثلثه تقرب ايدوب ده درس لر کسيلايکننده تعطيل درس لرينه باشلاوردى . فقط شعبان آي کيرنجيه طلبه هب طهرده کيتمکه او قوده جق آدم بولامازدى . انديشمه ده خواجه بره ميان احمد افندى ايله

باش باشه قالورلردی ، بایرام اقشامنه قدر بوتدریس وتدریس دوام ایلردی . احمد افندی ایچون ایام تعطیل بیرام کونلرندن عبارت ایدی . حافظ سید افندی غایت ذکی وحلال مشکلات بر ذات جلیل الصفات ایدی . لیکن تقریری غایت سریع اولدیغندن درسی منتهیله مخصوص اولوب مبتدیلر اندن هیچ استفاده ایده مزلردی . احمد افندی کندیسندن پک چوق استفاده ایله مشدر .

ودینلی خواجه مراتب ثلثیه رغبت ایدوب درسندن اعلی و اوسط و ادنی درجه لرینه کوره متنفع اولورمش . زمانک الک زیاده طلبه یتشدیره ن بر مدرسی ایدی . اجازتیه قریب وقتلرده درسنده حاضر بولنانلردن اماسیه لی قره خلیل افندی ، اسکی زغرمه لی شریف افندی ، نصوح افندی کسب اشهار ایتمشلر وبونلر اجازت آلامش اولدقلری حالدیه طبقه رابعه ده بولنان خواجه لره تفوق داعیه سننده بولته رق دائما مذا کره ایله اشتغال ایله مشلر . چونکه او وقت درسه چیه جق اولانلره بر مدت مذا کره ایله مشغول اوله رق طلبه بیننده کسب شهرت ومعروفیت ایلکه مجبوریّت واردی . مجهول الحال بر خواجه درسه چیه جق اولسه باشنه طلبه طویلا تمزدی .

کریدلی خواجه نک وفاتندن صو کره طبقه رابعه رجانه مر حج طوتیلان ارناوود علی افندی او ائناده درسه چیه مشدی که احمد افندی اندن ایام تعطیلده فن آداب وعلم عروض اوقومش ایدی .

احمد افندی استانبوله کلدی بی زمان ابتدا فاتح جامع شریفنده طویرانی محمد افدینک درسه دوامه باشلامش وطبقه رابعه دن اولان دیگر خواجه لره درسنی دکه مش ایسه ده او خواجه لره کندیسنی تدریس ایده میه جکلرینی آکلامغله آنلری براقوب مقتدر مدرسلره

درسنه دوام ايتدى . و طويرانلى محمدافنديله امثالنك درسندە خواجه لرينك كعبه ايريشمش طلبه لر بولنديغندن آنلرك ايستكسز درسە كيدوب كنديلرينك استفادە ايدە بيله جكلىرى اقتدارده خواجه آرامقده اولدقلىنى ده كورور ايدى . اوصره ده خواجه اجازت ويرمكه طلبه مومى اليهم درس لرندن قالقوب برطاقى و دينلى خواجه يى فاتح طرفنده كى نشاخى جامعنده ، برطاقى ده بر كوى شاكر افندى يى سراجخانه طرفنده كى دولكر اوغلى جامعنده درسە چيقارمىش لر . بو طلبه لر مختلف درس لر دن قالمىش دعوالى بر كروه اولديغندن ظرفادن بعضيلرى طرفندن بولره اهل قيام دينلمشدى .

احمد افندى منطق او قومش ايسه ده شاكر افندينك علم منطقده اشتهاى جهتيله تكرر علم منطق او قومق اوزره صبا حلين شاكر افندينك درسنه ، ايكنديدن صوكره مطول او قومق ايچون و دينلينك درسنه دوام ايله مش ،

ودينلى خواجه فاتح جامع شريفنده مطول درسنه باشلامغله اوچيوزدن زياده طلبه تجمع ايله مش . ابتدا و دينلى خواجه ايله بحثه كيريشنلر چوق اولمش ايسه ده برر ، برر قيرلمش . اهل قيامك چوغى سس چيقاراماز اولمش ، دائما خواجه افنديله مجاوبه و مخاطبه ايدنلر آنجق بر قاچ كشى قالمش كه بولنلر دن برى ده احمد افنديدر . بويه بحثلره كيريشنلره دائما خواجه نك ياننده ير كوسترلمكده ايسه ده غلبه لقدن اوزاقده قالانلر لايقيه خواجه نك تقريرى ايشيده من اولدقلىرندن كندى مدرسه سنك درس خانه سنه نقل اولندى . او غلبه لى درس خانه ده استيعاب ايدە مديكنندن برطاقى قنونك طيش طرفندن و نچرە لردن دكله مكده ايسه ده اوراده بشقه سس اولمديغندن خواجه نك تقريرى

آکلاشیلوردی . ودینلی خواجه پک متکبر ومتعظم برذات ایسه ده انصافی دخی زیاده اولدیغندن غروری حقانیتیه حائل اوله مازدی . برکون احمد افندی بر بخشده زیاده اصرار ایدوب طیانمغله خواجه نك جانی صیقيله رق آنی تکدیر ایلدی . بوتکدیرده احمد افندی یه کوچ کلدی برقاق درسده آغزینی آچوب بحثه کیریشمدی . صو کره برکون ودینلی درسده چیقادیغنده احمد افندیله بینلرنده مختلف فیه اولان بحثی آچوب پک کوزل تفصیل ایده رک « حق لو فیه لینک ایمش ! » دیدی . بوده احمد افندی نك خواجه سنی ده زیاده تقدیر ایله آنک حقنده کی احترامنک تزایدینه باعث اولدی .

احمد افندی ودینلی خواجه نك کرک ایکندی درس لرندن و کرک ایام تعطیلیه درس لرندن پک زیاده مستفید اولمشدر . لیکن اجازت بر معتاد صباح درس نه عائد اولمغله اجازتی شا کر افندی ندر .

اوا ثناده یوقار و ده بحثی کچن قره خلیل افندی فاتح جامع شریفنده وضعیه عصامی اوقو تمغه باش لایحه هپ اهل قیام باش نه طوبلانوب شدتلی مباحثه جریان ایلدی . میدان مباحثه ده اک ایلرو آت سورده نلردن بری ده احمد افندی ایدی . قره خلیل افندی جمله سنه طیانهرق بونجه سچیلیمش برکروهه بحق درس ویره بیلیمسیله شان وشهرت قازاندی . یکی درسده چقان خواجه لر ایچنده برنجی درجه ده کورولدی . بوذات فاتحده درس اوقو تمغه اولدینی حالده برمدت فتوی خانه یه مداومتله علم فقهده دخی کسب مهارت ایله مش . بالا آخره فتوی امانتده ومجله جمعیتی اعضا لغنده بولندقدن صکره نهایت شیخ الاسلام اولان قره خلیل افندی در .

قره خلیل افندی درسه چیقمازدن اول کذنوبی حسن افندی ده بر آره لق اوپله بر تعطیل درسنه چیقمش ایسه ده احمد افندینک سؤال و جوابلری اوزرینه اوچ درسدن صکره مشاغلدن بحثله اعتذار ایلده رک درسی ترک ایتمش ، یعنی عدم اقتداری آنی معلمک موقعنده طوتوندیره مامشدر . لکن کندیسی مزاجه خدمت ایدر هر کسک نبضنه کوره شربت ویرر بر آدم اولدیغندن بر آره لق درس وکیلی وخواجه شهریار اولوب خلیل افندیدن اول ایکی دفعه شیخ الاسلام اولدی .

بز پک کچوک سنده ایکن پدرمک کذنوبی حسن افندیدن بحث ایلدیکنده « اوجاهلدر ! » دیدیکنی ایشیدیردک . قره خلیل افندی بزم اوه کلدیکنده ایسه سلامق دائره سنده بولندیغ زمانلر پدرمک هر کسه یامدیغنی صورتده استقبال وتشیععلری کوردیکمده چوجقلق حالیه باقینورکن اغلاردن بعضاری « پاشانک خواجه سی » دیرلردی . قره خلیل افندینک بزم اوه افطاره کلدیکی زمان حرم دائره سنده دخی « پاشانک خواجه سی کله جکمش ! » دیه معتاددن زیاده اعتنا وحاضرقلر اولدیغنی کوروردم .

بعده ودینلی خواجه تهذیبدن درسه چیقمش حالبوکه آنک درسنه اوطورانلرکیمی تصدیقاندن ، کیمی تصوراتدن بر آزی ده قاریدن قالقمش . لایقیله علم منطق اوقومامش اولدقلرندن اکمال نقصانلری ایچون باری آنلره بر برهان کذبوی اوقوتمق اوزره اوتدریسی شریف افندی یه تکلیف ایله مش ایسه ده شریف افندی « بن بویله اناسنک ایپلکنی پازارده صاته رق میدان بحثه چیقمش اولان برکروه ایله اوغراشوبده شهرتمی قیره مام ! » دیه استتکاف ایله مکله نصوح

افندی به تکلیف ایتمش او قبول ایله ایام تعطیلده فاتح جامعنده درسه چیقمش احمد افندی اودرسده بولنامش . اهل قیام زوالی نصوح اقدینک اطرائی آلهرق بر باد ایتمش . وبش اون کون صکره « بزده بوقدر درس او قوده بیلورز » دیه رک درسندن قالقوب طاغیلمشلر و دینلی خواجه بونلردن بعضیلرینی تکدیر ایدم چک اولدقده « بزا کر اضاعه وقت ! یلیه چک اولسه ق کندی خواجه لریمزک درسندن قالقماز دق ! » دیه جواب ویرمشلر . بونلردن بحث ایدرکن پدرم صرحوم « بحکمه اه تعالی صوکره استانبولده علمایه او قدر انقراض کلدی که اولوقت اهل قیامتک بکنمندیکي خواجه لر علامه زمان اولدیلر ! » دیمشدر .

صوکره برهان کلبوی تدریسی احمد افندی به تکلیف اولندی . احمد افندی سننک کچوکلکینی دوشونهرک پک چوغی کندندن چوق یاشلی اولدقلرندن آنلره خواجه لک ایتمک نصل اوله جنی مطالعه سیله موافقت ایتمک ایسته مامش ایسه ده و دینلی خواجه وامثالک اصدار والاحلری ایله قبوله مجبور اولهرق فاتحده درسه چیقمش و او کروهی تدریس ایله مشدر . احمد افندی یکرمی درت ساعت بودرسه حصر وقت ایله علم منطقده مدون اولان کتب معتبریه مراجعتله درسی خلاصه ایلردی . او اهل قیام اولجه مباحثیه حقیقه رق خیلی اوغراشمق ایسته مشلر سده یاشی کچوک اولان خواجه لرینک علمنک بیوکلکینی تصدیقه مجبور اولهرق آندن کمال خواهشله تدرسه دوام ایله مشلر . احمد افندی دولکر اوغلی جامعنده ده قاضیر درسنه چیقارلمش .

بومدت تدریس و تدرسده احمد افندی کیجه لی ، کوندوزلی چالیشهرق برکیجه یتاغنه یاتمامش . کتاب اوزرنده او یوقلار . او یاتنجه ینه کتابه صاریلورمش . ایام تعطیلیده دخی دکانمزدی . بودرجه

کندینی اتعابی ا کا ضعف کتیرمش . بالاده اسمی کچن خواجه حکیم
حمید افندی بونی خبر آلمغله احمد افندی بی او درجه چالیشمقدن
منع ایله مش . وکیجه لری بروقت معینده یتاغنه کیروب او یومسنی
وایام تعطیلیه ده براز سیر وحرکتله تنفس وتفرج ایله مسنی مصرانه
تنبیه ایله مش اولدیغندن احمد افندی کیجه لری معین بر ساعتده یتاغنه
یاتوب وقتیلده ده قالمغنه باشلامش . برقاچ دفعه جمعه کونلری مسیره لره
کیتمش ایسه ده آندن خوشالانه مدیغندن دوامی ممکن اولاماش .
هم تنفس ایله مک وهم ده فارسی او کریمک اوزره مراد ملا تکیه سینه
دوامه باشلامش . تکیه ده دوام سوزندن احمد افندینک برطریقه کیره رک
شیخه مرید اولدینی ا کلاشلما ملیدر . جودت پاشا مدت عمرنده طرق
مشایخدن هیچ برینه کیرمه مش . وهیچ برشیخه مرید اولماقدن بشده
حکم و نفوذی آلتنده اولان افراد عائله سندن هیچ بریده طرق
مشایخدن برینه داخل اولماشدر .

پدرم استانبوله یکی کلدیکی سنه لرده مدرسه حیاتنده صیقینتیلی برکوتی
آ کلامش ایدی که آنی نقل ایتهدن کچه میه جکم ! او آنه قدر هیچ پاره
یوقمالخی کورمه مش ایدی . پدری منتظماً آنی پک ایی کچیندیره جک پاره بی
کوندیریوردی . برسنه پک زیاده قیش اولوب لوفجه دن برخیلی زمان پوسته
کتیرن تانارچیقه ماش ایدی . اوله برکون کلدی که میمکنی بیشر و ب خدمته
باقان طابه یه او کونکی طعام تدارکی ایچون اوله جق پاره بی ویرمه دن
صااووشمش . بوده کندیسنه پک کوچ کلش ایدی . فاتح جامعنه
کیرنجه صاغ طرفه کان محرابک یان طرفه اوتورمش ، اقشامه مدرسه
اوطه سنه نصل کیده جکئی دوشونیوردی . زیرا میمکنی تدارک ایلله
مدیکی طلبه دن صیقیلیوردی . معلملرندن وارقداشلرندن اودونج پاره

آلق ذهنندن کچدیجی حالدہ اوزمانہ قدر کیمسہدن برشی ایستہ مامش
 کیمسہ یہ منت ایله مامش اولدینی ایچون بونی یاپہ میہ جغنی آکلایوردی.
 آچلقدن اولمکه ، لکن هیچ برکیمسہدن برشی ایستہ مامکه قرار
 ویرمش ، الم وکدرله بوزیلش ، غم ویأس چهره نی صارمش
 اولدینی حالدہ پدرینک احباسندن اولوب استانبولده بولان لوفچہ لی
 برذات قارشوسنه کلدی . ایشته بوفرصتدی . اوزات آنک پدرندن
 پاره کله جـکـنی بیلوردی . لکن ممکن دکل اندن ده ایستیه مدی .
 ایستہ مک ! او آنک یامدینی ویاپہ میہ جغنی برشی ایدی لکن
 اوزات براز قونوشدقدن صوکره اکا « مملکتدن پوسته کلدی ! سنک
 خر جـلـغـک قالمامشـدر . بن سنک بابا کدن آلیرم . شمـدـیـلک بونی
 ویریم ده برقاج کون دها پوسته گلزسه دها ویریرم ! » دیه آنک
 اوکنه الی لیرا قویدی . اوچ کون صوکره ده پوسته اوچ مماشنی
 بردن کتیرمکه احمد افندی مدرسه ده قازانلر ایله اتلی پلاو و حلوا
 یاپدیرته رق بتون مدرسه حلقنه ضیافت چکدی .

او کونکی حال اکا او قدر تأثیر ایله مامش ایدی که استانبولده
 بولندینی زمانلرده هر رمضان شریفده برکون فاتح جامع شریفنه کیدوب
 کندیسـنـک او کدری کچیردیکی جهته ده نه قدر فقر حالدہ طلبه
 کوررسه انلره پاره ویرر . واوراده کندیسنه ویرمش اولان الی لیرا
 مقداری پاره نی طاغیر ایدی .

مخاfl عالمیه وادیه

ظن ایدرم که مراد ملاشیخی کور مدیکی حالدہ بزم کبی دکلیه رک
 او کرشم اولانلر چوق واردر . لکن بیلیمانلرده وارسه آکلتمش

اوله لم ! پدرم واستادم مرحومدن مراد ملاشیخه دائر چوق فقره لر
ایشتمش ایدم که بعضیلرینی بوراده ذکر ایده لم ! چهارشنبه بازارنده کی
مراد ملا تکیه سی بر دارالفنون دیمک اولوب اوراده هر نوع علوم
ومعارف تحصیل اولنوردی . اورایه بتون رجال و کبار کیدر .
هرسنه رمضان شریفده براقشتم ذات شاهانه اوراده مراد ملاشیخنک
مسافری اوله رق افطار ایلردی . استانبولک علماو ادبایی اورایه
دوام ایلدکن بشقه طشمره لردن حتی پک بعید ممالکدن اورایه تحصیل
واستفاده ایچون کلورلردی . مراد ملا تکیه سی وشیخی ایشته بویله
اقطار جهانیه نام و شهرت صالمش ایدی . شیخ افندی صاحب ثروت
اولدیفی قدرده خیر پرور اولدیغدن پاره سنی امور خیریه صرف
ایلردی . تکیه سی جوارنده کی دارالمنوی بی کندیسی انشا ایتدیرمشدر .
مراد ملا تکیه سی پوست نشینی اولان اوزاتک اسمی محمد مراد ایدی .
وکلا و رجال کندیسنه حرمت ایلرلردی . مراد افندی کرسی و عظه ده
چیقاردی که آنک وعظنده اکثری وکلاده بولنوردی . جمله غنده
رغب و نفوذی اولان شیخ غایت آچیق سوزلی ایدی . برکون
جامعه و عظم ایدرکن بتون هیئت وکلا موجود اولدیفی حالدده شیخ
مراد « بردلی کاور واردر . برده کاور دلی واردر . دلی کاور بزم
بقالدر . فرانجیله نک بیاتی ، پینیرک بوزولمشی ، خلاصه هرشیئک
قناسنی ویرر . بن آتی چاغیریرم . برکوزل تکدیر ایدرم . هان یوله
کلیر . برمدت او یله کیدر . ینه ایشی بوزونجه ینه تکدیری بیوب
دوزه لیر . کاور دلی ایسه اوقاف ناظریدر که جامعلرک قنديللری یاغنک
پاره سندن چالار ! » دیمکله اوراده حاضر بولسان اوقاف ناظری نه
طرفه کیزلنوب نصل صاووشه بیله جککندن متحیر، دیگر وکلا مهوت

قالورلر . شیخ افندی حدت‌اندیکی زمان حدتی پک شدید ایش .
 پدرمک مثنویدن اجازتی مرادملاشیختنددر . مثنوی درسی ایچون
 دوام ایدن پدرم برکون آنک اوحدتنه تصادف ایش . شیخدن
 درس آلمغه کیتدیکنده او قوللری صوالی اوله رق کلوب « کوریورسن یا
 حامی ؟ بوکون آشیق وار ! خدمتکارلق وار ! » دیمش . مکر
 حدت‌لوب تکیه نه قدر آشیجی خدمتکار وارسه صاومش .

برصباح حضرت شیخ تکیه دن چیقمش . برایشه کیتمک اوزره
 فاتح چارشوسندن کچورمش . کباردن لیکن جهلادن برافندی شیخک
 کچدیکنی کورنجه همان اوکنه چیقوب کمال احترامله سلاملاقدن
 صوکره بر مشـکلک حلی رجاسیله « حضرت محمد حنفی مذهبنده می
 ایدی ؟ یوقسه شافعی می ؟ » دیه صورمش مرادملاشیخی آدمک قیلغنه
 قیافته باقوب آنک حال جهلنه مرحمت ایتمکه اوراده بولنان مشهور
 غایت تمیز ونظیف حلواجی دکانه کیرمش . اوراده او آدمی قارشوسنه
 اوتورده رق مذاهیک صورت ظهورینی آکلاتوب حضرت محمد زماننده
 مذاهیک بولمندیفی ایضاح ایله مش . اوزون ، اوزادیه تفصیلات ویرمش
 اک نهایت او آدم « ها ! شمعی اکلادم ! بن پیغمبریمز حضرت محمدی
 شافعی صانیوردم . مکر حنفی ایش ... ! » دیمسیله مرادملاشیخی
 بردنبره دکاندن طیشارو فیرویلایوب « ایواہ ! بنم زحمتہ ! سوبلدیکم
 اوقدر سوزلره یازیق ... ! » دیه او آدمه لاقردی اکلایمق ایچون
 ضایع ایلدیکی زماننه تأسفلر ایدهرک یورومش .

اوزمان استانبولده مشهور ایکی مثنوی خان بوللوب بونک بری
 کچوک مصطفی پاشاده مثنوی اوقودان خواجه حسام‌الدین افندی نامنده
 مبارک برذات ایش . احمد افندی بعضاً آنی استماعه کیتمشدر . صوکره

بودات ایوب انصاری جوارینه نقل اقامتگاه ایله مش . دیگرى مراد ملا تکیه‌سی پوست‌نشینی مراد افندی در .

مراد افندی ایام معینه‌ده مثنوی او قودر . ایام سائرده صباحدن اقسامه قدر متنوع درس‌لر ویرردی . کندینک اقدم شاکردانی اولان حافظ توفیق افندی‌ده اوراده حجره‌نشین اولوب مراجعت ایدنلره فارسی تدریس ایلردی .

احمد افندی بوش و قتلرینی اودرگاهده تحصیل معارفه حصر ایلر و بمضاده شوکت و عرفی دیوانلرینی او قومق ایچون شاعر مشهور فهیم افندینک قره‌مهر کده کی قوناغنه کیدردی .

فهیم افندینک خانه‌سی‌ده بر محفل ادبی ایدی . فهیم افندی تفسیر مواکب یازان فرح افندینک تربیه کرده‌لرندن اولوب عربی‌ده هیج قوتی یوقسه‌ده فارسی‌بی مکمل بیلور ، کوزل شعر سویلر ظرفادن ، فیلسوف مشرب برذات ایدی . مصرفی ایرادینه اویدر مش ، قوناغنه چکیلمش کندی عالمده یشار ، کلوب کیدنلره کوریشور ، فارسی دیوانلر او قودردی . و قتيله فرح افندینک دائره‌سنده بیومش . مأموریتله پک چوق طشره‌لرده طولاشمش . امور داخلیه واجنیه‌یه واقف عارف برذات اولوب خانه‌سی مجمع ادبا و عرفا اولغله مجلسنده گاه معارفدن ، گاه پولتیکه‌دن بحث اولنوردی .

احمد افندی مدرسه‌ده کی شهرتيله علمای مشهوره ایله کسب و داد ایلدیکی کی مراد ملا تکیه‌سنده و فهیم افندی قوناغنده پک چوق ذوات عالییه وادبا ، شعرا ایله ده احباب اولمش . و هرا یکی طرفدن کندیمی پک زیاده حرمت و رغبت کورمشد . ادبا و شعرا ایله انسیت

والفتمده احمد افندی به شعر انشایه دخی هوس ویرمش . وشعر
سویله مکده باشلامشدر .

لوفجده ایکن یازیدن اذن آلدیغنده احمد افندی به وهی خلصی
ویرمشلردی . ۵۹ تاریخنده فهم افندی اکا « جودت » خلصی
ویردی . اوزماندنبرو احمد افندی آنکله تلخص ایله مشدر . ایشته
اوقدر شهرت آلان ورغبت کورن جودت افندی هنوز یکریمی ایکی
باشنده بولنیوردی . اووقت فاتح جوارنده پک چوق علما وفضلا
اولدینی کبی فاتحن سلطان سلیمه وبرطرفدن قره کمرکه قدر اولان
یرلرده پک چوق ارباب شعر وانشا واردی .

چهارشنبه بازارنده پاپاس اوغلی مدرسه سنک قارشوسنده کی قوناغنده
ساکن اولان قوش اطهلی ابراهیم افندی دخی اوزمانک پک بیوک
علماسندن اولوب آنک قوناغیده مجمع ادبا ایدی . وزرادن ورجالدن
پک چوق کیمسه لر کلور ، و ابراهیم افندینک حضورینه کیرمک اوزره
صفه ده نوبت بکلرلر ایدی . جودت افندی صوفیه مسلکینه سالک
اولدینی حالد علمندن استفاده ایچون قوش اطهلی ابراهیم افندی به
کیدر وکندیسندن پک زیاده التفات کوره رک اک بیوک خواجه لردن
حل ایده مدیکی شهباتی آندن حل ایدر . آنک ذکا وعلمنی کورن
شیخ حضرترلری آنی تعلیمدن نمون اولوردی .

یوقاروده علما صره سنده اسمی کچن حافظ سید افندی دخی غایت
عابد وزاهد برذات اولوب کندیسنه پک چوق حرمت اولتوردی .
حافظ سید افندی صوفیه مسلکینی انکارده متعصب اولوب حتی قوش
اطهلی کبی مشایخ صوفیه نک مریدلرینه تلقین ایلدیکی رابطه شیخک
صورتی ذهننه آلهرق اکا توجه دیمک اولدیغندن بونک شرک جلی

اولدینگی اثبات ایچون بررساله تألیف ایلدی . مراد ملا شیخنی شیعی
وصایق دیه ذم ایلردی . مراد ملا شیخنی ده آنی قبا صوفی وزاهد
خشک دیه قدح ایلردی . جودت افندی هرایکیسندن دخی تدرس
ایلمکده اولدینغدن اولیه یکدیگرینه مناقض سوزلر ایشیدییوردی .
شیخ قدر شناس برذات اولدینغدن خواجه افندی یه ینه اغانده قصور
ایتمز مش . حافظ سید افندی بردرسه باشلایه حق اولسه استعاره یه
محتاج اولدینگی حالد کتابلر آله حق پاره سی اولیوب فقیر ایدی .
شیخ مراد حافظ سیده لازم اوله حق کتابلری اولجه تدارک ایدرک
حافظ توفیق افندی واسطه سیله اکا کوندرردی . صانکه علمهنده
قوللانیق ایچون اکا برچوق اسلحه ویرردی !.. زهی ! عالی
ذوات !..

جودت افندی وقایع حکمیه وکلامیه ایله مشغول اولدینگی صرعه
اودرلو مجادله لر ایشیتدکجه منازعه نك اصلنی اکلامق اوزره کتب
صوفیه یی وعلی الخصوص محی الدین بن عربی حضر تلرینک تألیقاتی
اوقومغه باشلا یوب اتمام ایله مش . پدرم مرحوم اوزماندن بحث ایدرکن
دیمشدی که « فاتح سمتمده اووقت علوم و معارفه دائر بحثلر جریان
ایلدیکی صرعه بویه ظاهر و باطن مجادله لری دخی اکسیک دکل ایدی .
شمدی نه اووار ! نه بووار ! اودواتک جمله سی عالم بحث جدلی ترک
ایتدیلر . هپسی یرلرینی بوش قویوب کیتدیلر ! کاشکه بر مراد ملا
شیخی اوله ایدی ده آنی ذم ایده جک برده حافظ سید بولنه ایدی !.. »
مراد ملا شیخی سلطان احمد جامعشرینی واعظلرندن اولوب
جمعه کونلری وعظ آنک صرعه سی ایمش . مانع ظهورنده آنجق حافظ
توفیق افندی بی بالوکاله کوندر رمش . صوکره جودت افندی بی تدریس

زماننده آنک اقتدارینی کورمکله کنديسنک مانعی بولنديغی بعض
 جمعه کونلری آنی بالوکاله کوندرمک ایسته مش . جودت افندی
 واعظلق کندی مسلکی اولمديغی وسنتک بوکا مساعد بولمديغی
 سويلیه رک هر نه قدر عفونی رجايله مش ایسه ده شیخی اقناع ممکن
 اولاماش . شیخک تدریسی پاره ، پول ایله اولمديغدن آنی کوجندر م
 تدریسندن محروم قالمق دیمک ایدی . جودت افندی بول قوللی واعظ
 جبه سندن ده هیچ خوشلامديغدن کیتمه مک ایچون نه دیسه قابل
 اوله ماماش شیخ افندی آنک آرقه سنه کندی جبه سی کیدردیکی کبی
 وعظه یوللار مش . بض جمعه لری مراد ملا شیخنک وعظنی دکلکه
 کلان وکلا ، وزرا ، رجال مراد ملا شیخنک جبه سی ایچنده هنوز
 یکر می ایکی یاشنده بولان جودت افدینک وعظنی دکلر لرمش .

محافل علم وادبه آرتق کنج لوفجه لینک علم ودرایت و ذکاسی
 سويلنمکده وجودت افندی عرض خلوص ایتک اوزره بیوکاره
 کیتمی دوشونمکسزین بیوکار آنی کورمک آنکله کوروشمک
 ایسته مکده ایدی .

اواننده منحل اولان مکتب حریبه فارسی معلمکی جودت
 افندی یه تکلیف اولمش ایسه ده قبول ایتمه مشدر . سبی ایسه اووقت
 مکتب حریبه معلمری ایچون فس و ستره یا پانطالون کینمک رسم
 وعادت ی وارمش . جودت افندی واعظ جبه سندن خوشلامدینی
 کبی کندی قیافتی تبدیل ایتکده ایسته مزمش . زیرا کنديسنک
 اقصابی املی اجازت آلدقدن صوکره مدرسلک طریقچه نشر علوم
 وتالیفات ایله ابقای نام ایله مک ایش .

مراد ملا شیخی انشا ایتدردیکی دارلمثنوینک ختامی اوزرینه

« ۲۶۰ » سنه سی محرّمك طقوزنجی كونی آنی كشاد ایلدیکنده اوكون تبرکاً سلطان عبدالحجید حضرتلری تشریف بیورمش . مراد ملا شیخی اوكون حضور شاهانده اسکی شاگردانه اجازت ویردی کبی جودت افندی یهده مثنوی شریفدن اجازت ویرمش وقصیده برئه وحزب البحر اوقومغه دخی مأذون قیلمش . آندن سوکره هر سنه محرّمك طقوزنجی كونی دارالمثنویده مرثیه اوقونمق عادت اولمش . طقوزنجی كونه تعیین اولمنی ایسه هر سنه محرّمك اونجی كونی قوجه مصطفی پاشا درگاهنده مرثیه اوقونمق عادت اولدیغی جهته ایکی مرثیه برکونه کلامك ایچوندر .

جودت افندی اکثری کیجه لرینی محضاً علم وفضلی ، ذکاو عرفانی یوزندن طانیدیغی محافل علمیه وادبیهده کچیریوردی . اکثری کیجه لری دعوتلی بولنیور . مدرسه سنه طوغری یورودیکی اقشاملر ایسه آنی یولدن چو یروب کوتوریورلر . مدرسه ده کی او طه سنک اداره سی تسویه اولندیغدن کمدیکی اقشاملر آنک خدمته باقان طابه دن بشقه بر دیکری ده مکمل صورتده قارنی طویوردیغی ایچون مدرسه خالق ده بلکه آنک اقشاملری کلدیکنه نمون اولیوردی . اوکنج یاشنده یاشلی ومرتبه جه بیوک رجال ایله احباب اولمش . احباسی چو غلمش ایدی . مریدی اولمیدیغی حالده مراد ملا تسکیم سنک برپارلاق ییلدیزی ، عالم تدرس و تدریسک جالب انظار برطایه و معلمی ، قوش اطه لی قوناغنک مقبول و معتبر مداومی ، شاعر فهیم افندینک محب عزیزی اولان جودت افندیله هپ فضلا وادبا و شعرا احباب اولمق ایسته یور ، خانه لرینه دعوتله مجلس شعر وادبده آنک وجوتیه افیتخار ایله یورلردی . قیشک قوناقلرده ، یازین بوغاز ایچی یالیرنده

کچیردیکی او آوان لطیفی کنیدیسی اونوده مزدی . و حیاتنک اک طاتلی کچن زمانلرندن عدایلردی . جودت افندی اوایام لطیفنده غمندن آزاده زمان کچیرمکده ایکن آرده قلبنی یالکز برشی صیزلاتوردی که اوده حب وطن ...!

وطنی اوزلر واکا دائر شعر سویلردی . لکن استانبولده قالمقده کندیسنجه مقرر دی . ذهنتی مشغول ایدن برشی ده استانبولده قالمغه قرار ویردیکندن اجازتنی آلدینی زماندن سوکره پدرینه یوک اولماسی ایدی . اوزمانه قدر عمرنده برکونلک موقت بریوقسـللق کدرندن بشقه پاره سزلک کورمه مش اولدیغندن مدرسه ده کی فقیر طایفه لرك حالنه تحمل ایدمه جگنی کوریور ، ینه پدرندن کلان پاره یی قبول ایتسنی ده ارککلک ومردلکنه یاقیشدیره میوب کنیدیسی اداره یه لازم اولان پاره یی کندی قازانمق ایسته یوردی . کنیدیسی تمیز کیکنیور ، جیبنده خرچلغی اکیسک اولمایور . لکن هپ پدرینک پاره سیله ...! اودرجه موقع احترامده طوتیلان جودت افندیـنک برپاره معاشی یوقدی .

۱۲۶۰ سنه هجریه سنده طریق قضاده روم ایلی قلمنده چنات رتبه سنده پرمدی قضاـسنی ضبط ایله موقت اوله رق شهریه مخصص اولان بش یوز یکر می غروش معاشی آلمغه باشلامش . بومعاش ایسه عرف وعادت اولدینی اوزره شهور معدوده یه منحصر اولوب مدت عرفیه نک انقضاسنده کیسـله جک ایدی . بومـنـصبک مدت عرفیه سی منقضی اوله دن ۲۶۱ سنه سی جمادی الاخرینک یکر می اوچنده یا ابتدا خارج استانبول رؤسی آله رق طریق تدریسه داخل اولمغله

پره‌مدی منصبی‌ده اوزرندن قالقدی طریق تدریسدن آنجق یوزاللی
غروش معاش تخصیص اولندی .

رؤس آلدیغندن طولایي مدرسه‌ده اوچ کون ضیافت یاپیلماغه
النده اولان پاره‌بی صرف ایتدکن بشقه بیك بش یوز غروش‌ده
بورجه کیردی که برنجی دفعه ایلدیکی بورج بوایدی .

۲۶۲ سنه‌سی شوالنده صدراعظم رؤف پاشا عزل اولنه‌رق یرینه
خارجیه ناظری مشهور رشید پاشا صدراعظم اولدی . متعاقباً مکی
زاده عاصم افندی وفات ایتمکله مشهور عارف حکمت بك افندی
شیخ‌الاسلام اولدی . جودت افدینک رشید پاشایله مناسبتی اوزماندن
باشلار . رشید پاشا ایله ایلک ملاقاتنده اوراده موجود بولنان
شیخ‌الاسلام مرحوم صاحب ملا بك افندی بونی استادم مرحوم
احمد مدحت افندی‌یه آکلاتمش . اوده عاجزه‌یه نقل ایله‌مش ایدی .

رشید پاشا قوانین جدیده ترتیب وتنظیمیله مشغول بولتوب ایجاب
ایتدکجه اوخصوصه دائر مسائل شرعی‌دن معلومات آلمق ایستدیکنندن
باب مشیختدن علما ایچنده اک عالم واک منور فکری برکیمسه‌نک
کندیسنه کوندرلمسنی ایسته‌مش اوکون صاحب بك افندی‌ده رشید
پاشانک نزدنده مسافر بولنقده ایکن علمادن برزات ایله جودت افندی
ایچرویه کیرمش . اودات رشید پاشا مرحومه کندیلمینک آرزولرینه
موافق اولق اوزره باب مشیختدن کوندریلان افندی اولق اوزره
جودت افندی‌یی ابراز ایله‌مش . صاحب بك افندی مرحوم مدحت
افندی‌یه بونی آ کلاتوب دیمش که « جودت پاشایی اوایلک کوروشم
هیچ خاطرمدن چیقماز ! اويله مهم مسئله ایچون کوندرلمش اولان
برافدینک بك کنج اولدیغنی کورنجه حیرت ایتمش ایدک . اما حالا

کوزیمک اوکندن کیتیمیان پارلاق ماوی کوزلرندن صاحیلان ذکا قغیلجیملری بزه مسئلهئی ا کلاتمش ایدی ، بیورمش .

آندن سوکره جودت افندی رشید پاشا دائره سنده دامه باشلامش اکثر اقشاملرینی رشید پاشا مرحومک حضورنده کچیرمش . رشید پاشا کندیسینی پک زیاده تقدیرله حسن معامله کوستردیکی کبی مخدوملرینه درس ویرمسنیده تنبیه ایلمش . جودت افدینک مدرسه ده کی اوطه سی ینه کشاده بولمقده و بعض کیجه لری ینه اورایه کیتمکده ایدی . رشید پاشا مرحومک دائره سنده بتون ، بتون یرلشمسی جودت افندی کندی خانه سنی پک ای اداره ایده جک قدر بول معاشه نائل اولدقن سوکره در . کرچه جودت افندی رشید پاشانک مخدوملرینی اوقوتمق ایچون معاش آلامش ایسه ده رشید پاشانک پک چوق نعمتی یمش ، پک چوق اکرام والتفاتنی کورمش در .

جودت افدینک آرتق پدرینک اوزررینه یوک اولمه یوب اداره سنه لزومی اولان پاره یی کندوسی قازانمق آرزوسی نه مکتب حربیه معلمکی قبول ایله تبدیل قیافته راضی ایده یلمش ، نه ده رشید پاشا مخدوملرینی تدریسده معاش قبول ایتماسنه مانع اوله یلمشدر . زیرا کندی طریقتده معاشه نائل اولمق آرزوسی دها قوی ایدی . اکثری اقشاملرینی رشید پاشا دائره سنده کچیرمسی اکا مدرسه ده کی اوطه مصرفی ده پک جزئی بر مقداره تنزیل ایلمش اولمقده پدرینک کوندردیکی معاش دها مبذول اوله رق چیینه قالدیغندن کندیسینی هرجه تله احتیاجدن وارسته بولندیرییوردی . کرچه رشید پاشا دن معاش آلامش ایسه ده کندی اداره سنه آنک اووجهله قائده سی اولمشدر .

شیخ الاسلام عارف حکمت بك جودت افندی بی زیاده تقدیر
ایلردی . جودت افندی نك معاشنه یوز الی غروش ضم ایلدی .
رشید پاشاده باب عالینك عطایا ترتیندن سنوی ایکی بیک درت یوز
غروش تخصیصنه همت بیوردی .

جودت افندی طریقجه معاشی کندینی اداره ایده جك درجهیه
کلنجه تدریسات و تألیفاتنه مشغول اولمق اوزره مدرسهیه چکیامك
فکرکنده ایکن رشید پاشا نزدی اکا یکی بر مکتب اولمش ایدی .
کتابت طرز ایرانی قلید یولنه دوکولمش ، اکثریا سجع و جناس
لفظی اوغرنده سوزك قوتی فدا ایدیلور و بو طرز اوزره مصالح
دولته دائر اوزونجه بر لایحه ویا تقریر یازیلسمه طمطراق الفاظ
اردهسنده مقصد اصلی غائب و سوزك تأثیری ضایع اولور بر حاله کلمش
اولدیغندن رشید پاشانك اتخاذ ایلدیکی ساده و بلیغانه بر مسلك کتابت
وادی انشاده یکی بر جفر آچمش ایدی . او متجدد اعظم لسانمرك
تجدد و تصفیة سنكده بادیسیدر . لسانمرك آچیق یازلمسی و معاملات
رسمیه نك اولوجهله تحریری ایلك اول رشید پاشا طرفندن کشاد
اولمش بر یولدر . برنجیلك شرفیده او ذات عالییه عائددر .

او زمان خارجییه ناظری بولنسان عالی افندی ایله دیوان هایون
ترجانلغندن آمدی اولان فؤاد افندی دخی رشید پاشانك اثرینه اقتفا
خصوصنده اقران و امثالرینه فائق بولمشلدر .

جودت افندی تحریر آثار خصوصنده بو کتابتی بکة نوب او یولده
یازمغه لزوم کوردی ، بوندن بشقه رشید پاشانك نزدی اکا بر مکتب ،
سیاسی اولمغله او خصوصده یکیدن مکتبه باشلامش کی اولدی . او
اشاده قرانسزجه تعلمنه دخی باشلامش ایلسمده او زمان اجنبی بر

لسان او قومق شعاع علمایه منافی کورلمکده اولدیغندن کیزلی تدرس ایله مسمی و کیمسه نك یاننده تکلم ایده مامسی هانکی علمی تعلمه باشلاسه پک چابوق تحصیل ایلیان جودت افندینک فرانسزجه ده زیاده ملکه کسب ایله مسنه مانع اولمشدر. فرانسز اساننک غرامرینی پک ای بیلور، چوق لغت بلله مش اولدینی حالده سر بست سویلیه مز ایدی فرانسزجه دن توارینجه و قوانیه متعلق کتابلری آکلادینی حالده ادبیات جهتنده ضعیف قالمش ایدی. فرانسزجه بی پک ای آکلار. لیکن ای سویلیه مدیکنی بیلدیکی ایچون سویله مزیدی.

جودت افندی رشید پاشا دأرهمنده بولمسنندن عالی و فؤاد افندیلرله دأماً مصاحباتده بولنورلر. و آنلرله ارقداشلق ایدرلردی. فؤاد افندیله دوستلقلری پک ایلرو واروب بینلرنده بر محبت برادرانه حصوله گلش اولدیغندن بمض اقساملری فؤاد افندی آتی کندی یالیسنه و یا قوناغنه کوتورردی. آرتق بویله لیکنه او طه سنه کیده جک کیجه بوله میوردی.

رشید پاشانک مظهر توجهی اولان عالی افندی یه ۲۶۴ سنه سی محرمنده رتبه وزارت ویرلدی.

رشید پاشا ورشید پاشا طاقنک افکاری نشر معارف و تعمیم تربیه ایله دولتی اصول جدید اوزره اوروپایه توفیقاً تنظیم ایتک خصوصی ایدی. افکار عتیقه اصحابی بوکا عداوتله بقارلردی. بناء علیه اوزمان رشید پاشانک عالی افندی یه رتبه وزارت آلدینی سنه ظرفنده ۲۶۴ سنه سنده سر عسکر بولسان داماد شهریاری سعید پاشانک سعایتیه رشید پاشا صدارتدن عزل ایدیلهرک یرینه صارم پاشا کتیرلدی. حکم و نفوذ داماد سعید پاشا الینه کچوب عالی پاشا و فؤاد افندی وسائر

رشید پاشا آدملرینی خلایج پاموغنی کبی آتوب هپسینی عزل ایتدکدن
 بشقه نفی و اعدامده قالقیشمسی افکار عتیقه اصحابی ایش باشنه
 کتیرمسی و دولتی اسکی تعصب یولنه کوتورمسی کبی شیرلی کورهن
 جودت افندی رشید پاشا مکتبندن ایله مکده اولدینی استفاده جهتیله
 عصرک بوکا تحمل ایله یه میه جکینی آ کلامش اولدیغندن او حاله متأسف
 اولمشیدی. رشید پاشا آدملری آتیلدینی او زمانده جودت افندینک
 باشنده کی صاریغه می حرمت اولنش یوقسه فرانسزجه سویله مدیکیمی
 موجب نجات اولمش هر نه ایسه اکا طوقونما مشلر. کیزلیجه فرانسزجه
 تعلم ایلدیکی طویولمش اولسه ایدی علمادن اولدینی حالد آ نك او
 حالی بلکه سائرلرندن زیاده موجب تهمت اولور و جزاسی ده دهاشدید
 ترتیب اولنوردی .

جودت افندی رشید پاشا سندن آیرلیوب ینه آ نك دائره سنده
 بولمقده و مغزول زماننده کیجه لرینی آنکله مصاحبتله کچیرمکده ایکن
 چوق زمان کچمیه یوب رشید پاشا ینه صدارته کلش. واولکنندن زیاده
 نشر معارفه اهمیت ویرمشدیر .

پدرم مدرسه یه چکلمک آرزوسیه رشید پاشا یاننده بولندی
 زمانکی عالمک انجذاب آره سنده کی حالی آ کلادیرکن دیمشدرکه
 « رجال و کبار ایله الفتی چو غالدوب بوغاز ایچنک مسیره لرند طولا شمعغه
 آلیشوب کیتدکجه اول مرکزدن تباعد ایتمکده ایدم . چونکه سمیت
 قبله یی آرارکن شرق و شماله طوغری کیتمکده ایدم . » او ائنده
 اوروپاچه رونما اولان خلجان افکار اوزرینه دیپلوماتلرک آت اوینا
 ده جقلری زمان کلوب رشید پاشا ایسه او میدانک اک ماهرارلرندن
 اولغله اووقت اقبالی بر درجه ده ترقی بولدی .

جودت افنديك حيات سياسيسى اوزماندن باشلامش اولديغندن برآزده او زمانك احوالندن بحث ايدلم . جودت افندي سلطان عبدالحجيد خاك جلوسندن برقاچ ماه مقدم اون يدي اون سكيز ياشنده اوله رق استانبوله كلكيكنندن سوزيمزه اوزمانلردن باشلايه جغز .

احوال زمان

مصر واليسى محمد على پاشا داعيه استبداده دوشمسيلاه اوزرينه سوق اولنان اردولر انهمزاه اوغرامقدمه اوله لرندن سلطان محمود خان تانينك كدرندن خسته لنوب وفات ايتمش اولدقلىرى ، منتشر بولنان تاريخلر يازمشدر . مسئله او حلاله ايكن سلطان عبدالحجيد خان حضر تلى جالس تخت عثمانى اولديغنده باش وكيل رؤف پاشا ، شيخ الاسلام مكى زاده عاصم افندي ، مجلس احكام عدليه رئيسى خسرو پاشا بولنوب داماد شهربارى خليل وسعيد پاشالرده صاحب نفوذ ايديلر . ليكن امور حكومت خسرو پاشانك النده اولمقله خود بخود رؤف پاشادن مهر هايونى آلوب عهدمنه بالاستقلال صدارت عظمى ووكالت مطلقه كبرى مسند جليانى توجه ايتدردى . او وقت اندرون هايون اغالرينك ايلرى كنلرندن رضا بك ايله محمد على بك پادشاه نوجه حضر . تلرينك حسن ظن واعتمادينه مظهر ايديلر . بونلرك بريسى صكره سرعسكر اولان رضا پاشا وديكرى ده قبودان دريا و صدر اعظم اولان محمد على پاشادر .

جلوس هايونده قبودان دريا بولنان احمد پاشا دونماي هايونه فى دكزده بونمقدمه ايكن دشمنى اولان خسرو پاشانك كال استقلاليله

صدارتہ کچدیکنی طویوب بعض ندماسی طرفندن ده اخافه واغفال اولنغله استانبولہ کلمکدن ایسه محمدعلی پاشا ایله اتحاد ایدرک خسرو پاشا علیهنه حرکت ایتک فکریله دونمای هایونی آلوب اسکندریه کیتمش وفراری لقبی آلمشدر . محمد علی پاشا دونمای هایونی بر نعمت غیر مترقبه اوله رق ید ضبطنه کچیرمش . ومصر مسئلہسی بر قات دها صریه صارمش ایدی .

ایشته اووقت دولت علیهنک افق سیاسیاتنده بر ییلدیز پارلامقده ایدی که بودولت علیهنه دیپلوماسی اصولنی وضع وتأسیس ایدن بیوک رشید پاشا ایدی .

رشید پاشا او وقت اوروپا دولتلری آره سنده بر اتفاق حصوله کتیروب مصر مسئلہسنی قلماً حل وتسویه چالیشیوردی . فقط بونی تنظیمات خیریهنک اجراسنه ربط ایدوب ایکی ایشی برلکده یوروتک ایسته یوردی . افکارعمیقہ انتخابندن اولان وکلا رشید پاشانک میدانہ قویمق ایستدیگی تنظیمات خیریهی ایسته مدکاری حالده مصر ایشی بتدکدن صوکره آنک تأسیس ایدہ جی تنظیماتک تملارینی ییقمق فکریله مجرد مصر مصالحتنک حصوله کلمی ایچون موافقت ایتشلردی . رشید پاشا تنظیمات خیریه فرمانی قلمه آلدقدن صوکره کلمخانه ده اووقودی . واوروپا دولتلیله بر تجارت معاهدہسی عقد ایدوب بوکا مصر والیسنک سائر ایالات والیلرندن فضله هیچ بر امتیازی اولمدیغی درج ایتدردی . فرانسه دواتی محمدعلی پاشانی تصاحب ایتک ایسته مش ایسه ده بالکنز قالمش . سائر دول معظمه مصر علیهنه دولت علیہ ایله اتحاد ایله مشلر . انکلیزر مصر علیهنه دونما سوق ایدوب دولت عثمانیه ده بر فرقه ترتیب ایلهرک انکلیز دونماسیله برلکده سوریه سواحله کوندردی .

او وقتلر دولت علیه یدواحد اصولی جاری اوله رق طرف حکومتدن مبايعه مأمورلری چیقاریلوب ذخائر میری فیاتنه زراعتدن مبايعه ایدرلردی . بویله یدواحد اصولندن میری به سنه ده یتمش بیك کیسه کلوردی . مذکور تجارت معاهده سنك ایجاب ایتدیکی سربستی تجارت حبسیله خزینة مالیه او وارداتدن محروم اولدیسده مصرک نأری آندن قات ، قات زیاده اولمشیدی . زیرا مصرک اکثر وارداتی احوال انحصاریه دن حاصل اولدیغندن بواصولک رفیعله مصرک وارداتی بردنبره زیاده تنزل ایتدی . امور مالیه سی مشوش اولدی . محمد علی پاشا ایسه دولته قارشو طوره بیلیمک ایچون منتظم و غیر منتظم پک چوق عسکر بیله مکده بولندیغندن اداره مصریه بومصارفی قارشولایه میوب بردنبره بیوک بر مضائقه مالیه به دوشدی . حتی عسا کر مصریه نک یکر می سکیز آیلق معاشرلی تداخلاه قالدی .

اداره مصریه ماده بویله صیقلدینی کبی معنا دخی مشکل بر موقعه دوشدی . زیرا تنظیمات خیریه فرماننک عربستانده انتشاری افکار عامه بی طرف سلطنته میل ایتدیرمسیله سوریه طرفنه چیقان عسا کر عثمانیه قولایلقله مظفر اولدی . عسا کر مصریه پریشان حالده خطه مصریه به جان آتدی ، والحاصل دولت علیه ایکی به منقسم بر حاله کلشیمکن خارجیه ناظری رشید پاشانک قلمی محمد علی پاشانک قلیجنه غلبه ایدرک آنک قلیجنی قینه قویدردی . رشید پاشا عربستان طرفنک بولونمی کبی بر مخاطره دن دواتی قورتاردی .

رشید پاشا امنیت جان وعرض و مال قضیه سنی متکفل اولان تنظیمات خیریه بی تأسیس ایله عامه به بیوک ایسکلر ایتمش اولدی . لکن عجبا او زمان بو ایولسکلر قدر و قیمتی هر کس طرفندن بیلنور می

ایدی؟ رشید پاشا اوروپالورلہ زیادہ اختلاط ایلدیکندن وقرانته تأسیسی ترویج کبی اصول جدیدہ انہما کندن طولانی متعصین کندیسندن خوشنود اولمہ یوب اکا امور دینہ دہ مبالاتسز نظریلہ باقیورلردی. داماد شہریاری فتحی پاشادہ اصول جدیدہ نک وضع تأسیسنده رشید پاشا ایلہ ہم افکار اولدیغندن عوام ناس عنندنہ اودہ مدخول ایدی. او زمانہ قدر ایستہ دکلری کبی حرکتہ آلیشمش اولان مأمورلر دخی بو تنظیمات خیریہ باغلرندن صیقلیورلردی. رشید پاشا ایسہ تنظیمات خیریہ نی یالکز اعلان ایلہ مکملہ قلمہ یوب بو قوانین جدیدہ نک حرف بحرف اجر اسندہ تعصب درجہ سندنہ غیرت ایدہ رک بوندن طولانی سرای هایونک معاملاتنی تصعیب و دائرہ نفوذ لرنی تضییق درجہ سندنہ قدر کیدیورلردی. تنظیمات خیریہ واقعا بو کونلر من ایچون بزہ کافی دکل ایدیسندہ او کونلر ایچون آنی تأسیس وتطبیق مسئلہ سندنہ کی مشکلات و او مشکلاتک اقتخامی ایچون کوستریلان اقدام و جسارت دوشونولنجہ رشید پاشانک نہ قدر فعال، جسور حتی فدا کار بر ذات اولدینی اکلاشیلور.

مصر ایالتی محمد علی پاشا خاندانہ توارث ایتمک شرطیلہ کندیسندنہ توجیہ اولمقی مقرر اولوب بوکا دائر رشید پاشا طرفندن قلمہ آلنان فرمان عالی مسودہ سندنہ سنوی سکسان بیك کیسہ مالیہ خزینہ سندنہ ویرمک و مصر دہ طرف دولتن منصوب بر دفتر دار اولوب وارداتی دولت نامنہ استیفا وعسا کر وسائر مأمورینک معاشری نام شاہانہ یہ اولہ رق ویرمک شرطلری مندرج اولوب بو دفتر دار مادہ سندن محمد علی پاشا پک زیادہ دلکیر اولغلہ فرمانک تعدیلی ایچون چالیشمغہ مأمور ایلدیکی کیمسہ او خصوص ایچون رشید پاشایہ التمش بیك

کیسه ا کرامیه تکلیف ایلدیکی حالدہ رشید پاشا بوکا اصلا میل ایتیوب افکارنده اصرار ایش . بوده رشید پاشانک اوکونه رک سویله مسندن اوکره نیلمش . شی اوله یوب اوپاره نی تکلیفه واسطه اولان کیسه پدرمه نقل ایله مشدر . رشید پاشای ا قناع قابل اولمینجه او آلتش بیك کیسه مابین هایونده کی بعضی مقربینه توزیع اولنه رق آنلرک ترتیب ایلدکلری صنیعه لرله رشید پاشا خارجیه نظارتندن عزل ایدیلرک ادرنه والیسی نصب اولمش . رشید پاشانک عزلی اوزرینه مذکور فرمان عالی تعدیل و یکیدن تحریر ایدیلرک سکسان بیك کیسه آلتش بیکه تزیل و دفتردار فقره سی طی ایدلمش . لیکن رشید پاشانک ناصیه پاکی پارلادجه پارلامش .

رشید پاشا ادرنه یه کیتمکدن استنکاف ایتمکله بیوک ایلچیلکله پارسه کوندرلدی . ایشته اوزمان رضا پاشا دوری باشلادی . وامور حکومت آنک الینه کچدی .

داماد فتحی پاشا بر مدت منکوبیتده قالب داماد محمد علی پاشا مقبل اولدی . لیکن اوده رضا پاشانک سوزیله حرکت ایلردی .

۱۲۵۶ تاریخنده خسرو پاشا دوشوب رؤف پاشا ینه صدر اعظم اولمش ایسه ده اوده رضا پاشانک تحت نفوذنده بولندی . بر آره لق خونریز لکله مشهور عزت محمد پاشا ثانیاً صدارته کلوب اسکی دورلرک احکامنی یوروتمک ایستدیسده تنظیمات خیریه مانع اولدی . خرسیتانلری اهل اسلامدن تفریق ایچون رعیتک راسنه علامت اولمق اوزره قور-دهدن اوزونجه واکریجه سلوک تعبیر اولنان نشانلر قویدرمقدن بشقه دلخواهنه موافق بر ایش بجره مدی . بر سنه یه وارمقسزین عزل اولنه رق صدارته ینه رؤف پاشا کلدی . لیکن امور حکومت رضا

پاشا ومنسوبینی انده اولدیغندن او بر دفعه کی کبی بوستان قورقوانی
منايه سنده قالدی .

رشید پاشانك دوشمه سی اورینه تنظیمات خیره نك تمه و تفرعاتندن
اولان بر چوق ایشلر کیرو قالدیسه ده اساس باقی ایدی .

۱۲۵۹ تاریخنده تنسیقات عسکریه اجرا اولندی . بوایشده
امرای عسکریه دن عبدالکریم نادر پاشا ایله مترجم رشدی پاشا
قوللانیلدی . بو تنسیقاتده دولت علیه نك قوه بریه سی الی اردویه
منقسم اولوب خاصه اردوسنه استکدار ، درسعات اردوسنه استانبول
روم ایلی اردوسنه مناسیر ، اناطولی اردوسنه خرپوت ، عربستان
اردوسنه شام ، عراق و حجاز اردوسنه بغداد مرکز اتخاذ اولندی .
هر اردونك مواقع معینه سی اولوب مثلاً شمنی درسعات
اردوسنك مواقعندن اوله رق اورالرده درسعات اردوسندن مقدار
کافی عسکر اقامه اولنوردی . یوقسه روم ایلینك محافظه سی روم ایلی
اردوسنه منحصردکل ایدی . درسعات اردو مشیرلیکی سرعسکرانك
مسندینه منضم اولوب سائر اردولرك بر مشیری واردی . اردو
مشیرلرینك شهریه معاش و تعینلری یتیم سکنان بیک غروشه
واریوردی . خاصه مشیرلیکی رضا پاشانك خواص منسوباتندن
ضربخور رشید پاشا عهدسینه توجیه اولمش . او زمان زیاده مقبل
و مقبول اولانلردن بری ده مالیه ناظری صفوقی پاشا ایدی .

خدیجه دوام ایدن اودورك وکلاسی زمانلرینی پك خوش
کچیرمشلر ، پك زنکینلکه یشامشلر ایسه ده خارجاً پولتیقه نك حسن
اداره سندن عاجز بولنه رق راجل قالدقلرندن او جهتدن بر شان
و اعتبار قزانه مدقلری کبی داخلاده ارتشا و ارتکاب مسئله سی پك

زیاده سویلندیکندن اوسوزلر مسموع شاهانه می اولدی ؟ یوقسه ذات شاهانه رشید پاشا و آنک آدملری اولان عالی پاشا و فؤاد افندی کبی امور آشنا ذواته آلیشدیغندن او برلرندمی اوصاندی ؟ هر فصل اولدیه ذات شاهانه رشید پاشایی خارجیه نظارتیه پارسدن کتیرتدی . و متعاقباً ۱۲۶۲ سنه سنده مقام صدارته کچیردی . رضا پاشا دوری کچوب رشید پاشا دوری کلدی ،

رشید پاشانک قارشوسنده داماد سعید پاشا ، رضا پاشا ، محمد علی پاشا کبی موقع اقبال و امور حکومت کندیلرینه قالمق ایچون آنی دوشورمک ایستیان اوچ خصم بی امان بولندی کبی آنلرک ارقداشلری و توابعی ده آنلره منضم اولدقدن بشقه رشید پاشانک و طنک سلامتی ایچون اولان همت و غیرت لرینی درلو درلو افترالر ایله امور دینیسه ده مبالا تملزلق صورتلرنده کوسترمک ایستیه رک برطاقم صاف دلانی اقناع ایله پیدا ایلدکلری خصماده پک چوغه وارییوردی . اودشمنلرک اک دهشتلیسی اولان سعید پاشاده سرعسکر اولمشیدی . رشید پاشا ایلک خارجیه نظارتیه کلدیکی وقت آز زمانده پک چوق ایشلر یاپدینی حالده صوکره بالاستقلال صدارتنده اولکی رصانت و صلابت و سرعتی کوستره مامسی بوندن نشئت ایدیوردی . اکر اوکنده او یله موانع بولماسه ایدی رشید پاشا تجدد و ترقی خصوصنده ده پک چوق ایشلرده بولنوردی . مع مافیه تنظیمات خبریه نک تفرعاتی اکمال ایله امر تجدد و معارفک ترقیسنه همتدن کیر و قلمادی . مکاتب عمومیه نظارتی و مجلس معارف تشکیل اولندی . اقدجه معارف عمومیه نک انتشاری اسبابی مطالعه ایتک اوزره بر مجلس معارف تشکیل اولنوب صدور عظامدن فاضل مشهور عارف حکمت پک ، مترجم محمد رشیدی

پاشا فوآد افندی بوجلسه اعضا تعیین اولمشلر . بوجلس موقته
 تربیه عمومیه اوچ درجه اوزره ترتیب اولمش که بونلر مکاتب صبیان ،
 مکاتب رشديه ، دارالفنون درجه لریدر . بونلرک اوچی ایچون مجلس
 مذکور اوچ عدد لایحه مفصله قلمه آلهرق وظیفه سنی ا کال ایله مش .
 بولایحه لرک احکامنی فعله کتیرمک اوزره بالاده مذکور مکاتب عمومیه
 نظارتی ایله بر مجلس دائمی علی الدوام معارف عمومیه نک ترویجی
 اسبابنی مطالعه ایله مشغول اولوردی . صدور عظامدن بر رئیس
 اولوب مجلس والای احکام عدلیه ریسیله خارجیه ناظرینک نظارتی
 تحننده بولنوردی . اوئانده مکی زاده نک وفاتیه شیخ الاسلام اولان
 عارف حکمت بک ده معارفک ترقیسنه چالیشمش . مکاتب رشديه
 کشاد اولنوب طریق ترقیده بر آدیم آتیلمش . مکاتب صبیان اصلاح
 اونوب ده مکاتب رشديه چوققلر یتشدره جک ایکن مکاتب صبیان
 حالی اوزره قالدی . زیرا اوئانده یعنی ۱۲۶۴ تاریخنده سر عسکر
 بولتان داماد سعید پاشانک حضور هایونده کی اصراری اوزرینه رشید
 پاشا عزل ایله صارم پاشا صدر اعظم نصب اولنه رق امور حکومت
 داماد سعید پاشانک انه کچمکه رشید پاشا طاقنک هپسنی آتوب حتی
 نفی واعدامه دخی قالدیشمش . استانبولی افکار جدیده احبابندن
 تخلیه ایتمکه چالیشمش . حتی مکاتب رشديه چوققلره رساملق
 اوکره دیورلر مش دیه خریطه تعلمنک منع اولنه جنی حوادثی ایشیدلمکه
 مکاتب عمومیه معاونی وهی ملا مجلس معارف دائره سی تفتیش اولنورسه
 دیه قورقه رق نه قدر خریطه مسوده سی وارسه خلا قوبورلرینه آتمش .
 آرتق افکار جدیده اربابی جانلرینک قورقوسنه دوشوب باشلرینک
 چاره سنی دوشونمش . برکت ویرسون که صارم پاشا پک عقلسز بر

آدم اولمديغندن ايشاك ايلروسنه وارمايوب سعيد پاشايه نعت ايله مش .
 ليكن اوكونلرده رشيد پاشا آدملىرى خيلى بيوك مخاطرلار كچيرمش .
 سعيد پاشايى ضبط ايتمكده پك قولاي بر شى اولمديغندن ذات شاهانه
 آنك او عصره اويه جق آدم اولمديغنى كوره رك سعيد پاشايى عزل
 ورشيد پاشايى تكرار صدارته كچيرمش .

اوقدر قورقورلر كچيرمش اولمغله برابر او دفعه رشيد پاشا صدارته
 كلينجه بر مرتبه دها اعتنا ايله معارف عموميه نك نشرينه چاليشدى .
 جودت افندى يى بو خصوصده كنديسنه معاون اتخاذا ايله برلكده
 چاليشدردى . مجلس معارفك آيده بركره انعقاد ايليان برعموميسى
 واردى . بونده مجلس معارفك رئيس و اعضاسيله برابر مجلس
 والا رئيسى رفعت پاشا خارجيه ناظرى على پاشا ، سر عسكر مترجم
 رشدى پاشا ، فؤاد افندى بولنورلردى .

فهم افندى ديوان صائى شرح ايتمكده ايكن آلتش ايكي سنه سنده
 فوت اولمغله شرح ناقص قالديغندن اقربا و تعلقاى طرفندن آنك اكالى
 ايچون جودت افندى يه پك زياده رجا اولمغله آنى اتمام ايله يوب مجرد
 مرحومك همشيره و همشيره زاده لرينه برر مقدار معاش ياپيلمق
 نيازينه وسيله اولمق اوزره تقديم ايتديرمش ايدى . مجلس والاي
 احكام عدليه يه حواله اولنوب اوراده آنلره برر مقدار معاش اعطاسنه
 قرار و يرلدىكى صروده مجلس مفتشى عارف افندي نك اخطاريله جودت
 افندى يه بش بيك غروش عطيه احضاريله رتبه نك ترفيى خصوصنه
 قرار و يريلوب بامضبطه عرض اولمغله اراده سنه سى صادر اولمش ،
 بش بيك غروش عطيه و يريلوب ۲۶۵ سنه سى جمادى الاولى سنده
 واقع اولان توجهات علميه ده ابتدائى خارجدن حركت خارجه طفره

ایله بکام بیورلمش . یعنی کندندن اسکی اولان برچوق ابتدای خارج مدرسلرینه تقدیم ایدلمشدر .

رشیدپاشا پارس سفارتنه کیتدیکی وقت برلکده کوتورمش اولدییی ترهان خواجه آغوب افندی اوراده صنایعک ترقیسنه، اصول جدیده اوزره نصل شیلر میدان کتیریلوب نصل چالیشیلدیغنه دقت ایله مش . استانبوله عودتنده بروسه یه کیدوب اوراده دوت آغاجلرینک کیشتی کورمش . اوروپاده ایپکچیلک نه بیوک ثروت تأمین ایلدیکنه دقت ایله مش بولندیغندن بروسه طرفنده دخی اصول جدیده اوزره صنعت مذکوره منهنک اولسه لر قازانمق پک فرقلی برصورتده تزاید ایله جهنکی نظر اعتباره آله رق اصول جدیدی تعریف یولتمده کندی اسانی اوزره تعلیمنامه حریر نامیله بررساله یازمش وبونک ترکیه ده ترجمه سنی آرزو ایله مش اولدیغندن جودت افندی تعلیمنامه حریرک ترکیه ترجمه سنی تحریر ایله مشدر .

عالم سیلاییده

اوزمان آوستریا دولتنده ظهوره کلان اختلال اوزرینه بحارلر آیقلا نوب آوستریایه عصیان ایدهرک غایه ایلدیلر . افکار اختلاایه افلاق وبغدانه دخی سرایت ایتمکه بر طرفدن عسا کر عثمانیه دیگر دیگر طرفدن روسیه عسکری مملکتینه کیردی . آمدی دیوان هایون فؤاد افندی فوق العاده مأمور اوله رق بکشره کوندردی . آنکه برابر بوتنان عسکری قوماندان عمر پاشا ایدی که مؤخر سردار

اکرم اولان عمر پاشادر . افلاق و بغدادنه اوزمان بک بولمه یوب بکلکه عابد اموری فؤاد افندی رؤیت ایدیوردی .

آوستریا مجارلری تأدیبدن عاجز قالمغله روسیه مجارستانه ایکیوز بیک عسکر سوق ایلدی . اووقت استانبول خلقدن حتی وکلادنخی بعضیلری داخل اولدینی حالده رجال و کباردن برچوق کشیلر مجارلرک آوستریایه غلبه ایلدکلری کبی روسیه یه دخی غلبه ایدم جکلری اعتقادنه ایدی . حالبوکه روسیه نك مملکتین طرفنده بر اردوسی بولندقدن بشقه اوتیه طرفدن دخی مجارستان اوزرینه جسیم بر اردو سوق ایتمشیدی . فؤاد افندی ایشی یقیندن کورمکله روسیه نك قوه قاهره سنه مجارلرک تاب آور مقاومت اوله میه جقلرینی آ کلامش و خبر ویرمش ایدی .

اوارملق جودت افندی رشید پاشا طرفدن فؤاد افندی یه اواصر شفاهیه تبلیغی ایچون بکرشه کوندرلش ایدی . جودت افندی اولجه لوخه یه کچوب آنجق بر قاج کون قالدقدن صوکره روسیغه کلوب تبدیل قیافله ستره ، پانتالون کیه رک بکرشه کیتمش . رشید پاشانک اواصرینی فؤاد افندی یه تبلیغ ایله یوب بر آی قدر بکرشده فؤاد افندی نزدنده قالدقدن صوکره استانبوله کلوب فؤاد افندینک افادات شفاهیه سنی ده رشید پاشایه عرض ایلهمشدر .

جودت افندی کندی اداره سنه لزومی اولان پارمیی کندیسی قازانوب غیری پدرینک اوزرینه یوک اولماق حقه نه کی آرزوسنه رغماً محضاً ستره پانتالون کیماک اوزره مکتب حربیه فارسی معلملکنی رد ایلهمش اولدینی حالده وطنه خدمت اوغرنده تبدیل قیافله بکرشه کیتهمشدر .

فؤاد افندینک دیدیکی چیقیدی . یعنی روسیه بحارلری منهزم ایلدی . بحارلرک پک چوغی دولت عثمانیه التجا ایلدیلر . روسیه و آوستریا دولتلری آنلرک اعاده سنی تسکلیف ایتدیلر . پک چوق ذوات بو ایکی دولت متجاورہ معظمه یی کوجندیرمکدن خوف و احتراز ایدیورلردی . فؤاد افندی دخی بو قومشولری کوجندیرمه مک فکرندہ ایدی . عالی پاشاده اوفکرده ایدی . رشید پاشا ایسه ملتجیلری ایواوحمایه خصوصندہ برعزم متین ایله اظهار ثبات و صلابت کوستردی . ومحرم اسراری اولان جودت افندیله مشاوره سنده آتی ده کندی فکرندہ بولمش وجودت افندی « وان احد من المشرکین استجارک فاجرہ آم » آیت کریمه سنی اخطار ایله مش ایدی . رشید پاشا ملتجیلری حمایت پولنیقه سیله دولت عثمانیه اوروپا وامریقاجه بیوک شان قازاندیردی . بو جهتله دول وملل غربیه روسیه قارشو عثمانلرک غیرتنی کودر اولدی .

بو ملتجی مسئله سندن طولانی روسیه و آوستریا دولتلری دولت عثمانیه اعلان حرب ایتمه راده سنه کلدیلسنده مسلمانلرک احکام قرآنییه اتباعاً خرسه تیان ملتجیلرینی قبول وحمایه ایتمه لری حریت و سربستی داعیه سنده بولنان اوروپالورہ او مرتبه تأثیر ایلدی که اوانشاده پارس ولوندره سوقاقلرنده اوروپالیلر بر باشی فسلی کورسہ ر « یشاسون ترکلر ! » دیه باغیرییورلر . وکلوب آتی در آغوش ایدیورلردی . روسیه و آوستریا دولتلری دولت عثمانیه هجوم ایده جک اولدقلرنده بتون اوروپا اهالیسی عثمانلرک امدادینه قوشه جقلری آکلاشلدیغندن هرایکی دولت بوکا اغماض و مسامحه مائل بولتیورلردی . رشید پاشا او سیاسی ماهر ، رابطه سالمه یی خلدن وقایه

جهتی ده دوشونديکندن روسیه ایمپراطورینک خدتی تسکین ایده جک
بر معامله دلووازه تشبث لازم کیلکه فؤاد افندی نی سفارت
فوق العاده ایله پترسبورغه کوندردی . فؤاد افندی همان بکرشدن
قالتوب ۲۶۵ سیه سی ذی القعدة سنده پترسبورغه وصول بولدی .
ایمپراطورله کوروشدی . ایمپراطور توجهنی قازاندى . اصلاح ذات
الیننه موفق اولدی . فؤاد افندی بومأموریتلرنده پک زیاده ابراز
لیقت ایله یوب حکومتنه پک بیولک خدمتکر کورمش اولمغله برابر
اوروپا جده شهرت قازاندى . خدمته مکافات ۱۱۶۶ سیه سی بحرمنده
رتبه بالا ویرلدى . و صدارت مستشاری نصب اولدى . و جاذی
الاولی سی او اخیینه مصادف او اخی شبا حده کمال عز و شرفله استانبوله
کلدى . فؤاد افندی روسیه نك صغوقلرندن متأثر اولوب مفاصلنده
صیزیلر پیدا اولمش ، استانبوله بریاننده آنک تداویسیله اوغراشمغه
باشلامش ایدی .

رشید پاشا بتون جهانہ نامنی طامش واوروپا کی عالم مترقیده
شاه و شرف صاحبی بولمش اولدینی خالده دولت و ملتہ ایلدیکی
خدمتکرده ، شماروبده او قدرینی کافی کورمجه ذواتدن بولمیدغندن
تشر معارف خصوصنده باشلامش اولدینی ایشله دوام ایله مشدر .

معارف

یوقاروده ذکر اولدینی وجهله معارفک ابتدائی ، رشدی
ودارالفنون اقسامی حقدده هر بری ایچون یازیلان اوچ لایحه رشید
پاشا صرفدن جودت افندی یه ویریلرک آنلرک مضامعه سی وفکرینک

کندوسنه بیساتی امر بیورمش اولدیغندن جودت افندی بونلری بعدالمطالعہ مکمل بولندیغنی رشید پاشایہ عرض ایله مش. رشید پاشاده لایحه لری بکنمش اولدیغندن مجلس موقتک وظیفه سی تمام اولمش. مذکور لایحه لرك مندرجاتی بالندا کره اجرا ایتدرمک اوزره بر دائمی مجلس معارف عمومیه تشکیل قیلنمش، و مجلس معارفک آیده بر کره اجتماع ایلیان عمومیسنه بر آی ظرفنده مجلس معارف نه یامش و یامغه قرار ویرمش ایسه آنلرك لایحه لری و مضبطه لری هپ جودت افندی طرفندن تنظیم و تحریر اولئوردی. دائمی مجلس معارف عمومیهنک ریاستنده بر مدت و قصه نویس اسعد افندی بولندقدن صوکره حکیم باشی عبدالحق افندی رئیس اولدی. بو مجلسک اعضاسندن و ارباب معارفدن کال افندی یه مکاتب عمومیه نظارتی علاوه مأموریت قیلندی. مجلسده بالندا کره قرار ویريلات خصوصات آنک واسطه سیله اجرا ایدیلوردی.

مؤخرأ عالی پاشا طالقو قلدندن وهبی ملا اکا معاون ویرمش ایدی. کال افندی کبی اهل و ارباب بر ذاتک معاونلکننه تعین ایتدیریلان بو وهبی ملا ذی علماده بولنان جهلادن بر طالقووق اولوب اخلاق سز لگندن طولایی بین العلماء منفور ایمش. عالی پاشا معلوماتی بر کیسه ایسه ده اهل پرور دکیش. امور حکومتده اهلنی قولانمق مسئله سنی دوشونموب طالقو قلدینی مأموریتلره یرلشدرمک کبی معنای خوش کورلمه مشدر. بومسئله بو قدرله قالمش اولمدی. عالی پاشانک بر طالقووق یرلشدرمک یولنده کی حرکتی رشید پاشا و آنک معیتده چالیشان مترجم رشدی پاشا و عالی پاشا، رفعت پاشا، قؤاد افندی، جودت افندی و او خصوصده رشید پاشا ایله هم فکر

و مساعی اولان شیخ الاسلام عارف حکمت بک افندی کبی ذواتک
 رشید پاشانک جسارت و همت و قوتیله اکمش اولدقلری تخم معارفک
 یاننه برده اکا ایراث خسار ایدیه جک بر میقروب صالویرلمش اولدی...
 ذکر اولئسان اوچ لایحه احکام مندرجه بنه کوره ابتدا مکاتب
 صبیانک اصول تعلیمنی اصلاح ایتک لازم ایدی . لیکن مکاتب
 مذکوره اوقاف هایون نظارتنه مربوط اولوب اورادن فک ارتباطی
 او وقتک حکمنجه متعسر ایدی . اورادن منفک اولمدجه بونلرک
 اصلاحی ده متعذر ایدی .

کمال افندی تعیین اولندیغی مأموریتک اهلی ، فعال و حیثیتکار بر
 ذات اولدیغندن نمونه اولقی اوزره داود پاشا مکتبنی مکتب رشیده
 اتخاذ ایدرک اوراده اصول جدید اوزره عربی و فارسی ، حساب ،
 جغرافیا اوقوتدیره رق از وقت ظرفنده شاگردانه بعض علومک
 مبادیسنی علی وجه الاختصار تعلیم ایله ۲۶۴ سنه سنده بونلری حضور
 هایونده امتحان ایتدیردی . بواصول تعلیم هر کس طرفندن بک نیلدی .
 بومکتبه درت مکتب ده علاوه ایدلدی .

۲۶۵ سنه سنده بش مکتبک شاگردانی مجلس والا دائره سنده
 حضور هایونده امتحان ایتدیرلدی . کمال افندیکن همتی شایان تحسین
 اوله رق فرداسی مابین هایونه جلب و حضور شاهانه قبول اولنه رق
 نائل التفات بیورلدی . اندن صکره مکاتب رشیده طشره لره دخی
 تعمیم اولندی .

ذکر اولئسان لایحه لرک احکامنجه مکاتب صبیانن چیقان شاگردان
 ایکی سنه قدر مکاتب رشیده ده اوقودقدن صوکره دارالفنونه
 کیده جکلردی . لیکن مکاتب صبیان اصلاح اولنه مدیغندن کمال افندی

مکاتب صبیانک صوک سنه سنده اوقونه جق درس لری مکاتب رشديه نك
برنجی درس لری اولق اوزره ترتیب و دارالمقونده اوقونه جق درس لک
بعض مقدماتی دخی رشديه نك صوک سنه سنه علاوه ایلدی . بوجهته
متصور اولان رشديه دن ده مکمل صورتده مکاتب رشديه عنوانیه
برطاقم مکتبلر میدانه کلدی که بونلردن هر طرفه پک چوق منافع
حصوله کلدیکی غیر منکر بولمیشدر . فقط معارف عمومی نك
اساسی مکاتب صبیان اولدینی حالده آنلرک اصلاحاتنه هنوز تشبث
اولنه مامشدی . بوده قولای برشی دکل ایدی . بالاده سوبلندی
وجهله چوققلره رساملق اوکره تیلورمش دیه مکتبلردن خریطه
تعلیمنک قالدیرلمسینه قالدیشیلمسی ، ووهی ملانک خریطه لری خلا
قبورلرینه آتسی ، رشید پاشا آدملرینک اعدامنه قدر قالدیشیلمسی کی
برزمان کچیریلدی چوق اولاماش ایدی . رشید پاشا تکرار موقع
اقتداره کلینجه ترقیات معارفه چالیشمی و آدملرینک ده اکتبعیه
اویولده ابراز مساعیلری ینه بیوک برفدا کارلق ایدی .

مکاتب رشديه یه معلم یتشدیرمک اوزره فاتح جوارنده برده
دارالمعلمین مکتبی کشاد اولمش واورایه طلبه علومدن خبیلی ذاتلر
شا کرد صفتیه الیهرق شهریه اوتوز غروش معاش تخصیص قیلنمش
ایدی . لیکن اوراده اصول تحصیل هنوز مطلوب درجه ده دکل
ایدی .

کمال افندی مکاتب رشديه ده اوقوتمق اوزره قبا ترکیه رساله لر
تالیفته لزوم کوردیکندن اوخصوصده جودت افندی یه مراجعت
ایله مکله جودت افندی « معلومات نافعه » نامیه بر رساله یازمش .
بوطبع ایتدیریلرک مکاتب رشديه ده تدریس اولمشدر .

او اثناده والده سلطان حضرتلری سلطان محمود خان ثانی
حضرتلرینک تربہ سی جوارنده « دارالمعارف » نامیله کوزل برمکتب
یایدرمشیدی . کمال افندی دارالفنونہ مقبدمہ اولمق اوزرہ مکاتب
رشدیہ شاگرداننک منتہیلرینی اورایہ قویمق اوزرہ آنی مکاتب
رشدیہ نک فوقندہ برمکتب مخصوص اتخاذا ایلدی .

والده سلطان حضرتلری مکاتب صییان چوجققلرله طولو اولدینی
حالدہ کندی مکتبہ کی چوجققلر نهدن آز اولدینی والده کتخداسی
حسین بکدن صورمش . اوده مکتب کورمش برآدم اولمہ یوب
مکتبلردن ومکتبلرک درجائنن بی خبر بولندیغندن بونی وهی ملادن
صورمش . بوملا آرتق کندیسنہ برسرماہ بولمش کی سسوینہ رک
« کمال افندی کندی ایجاد ایلدیکی مکاتب رشدیہ نک شان وشرقه
خلل کلامک ایچون والده سلطان افندیمنک مکتبہ زیاده جه چوجق
قویمق ایستہ میور . یوقسه امر اولدینی خالدہ بن برکوندہ مکتبی
شاگردانله طولدیریم » دیہ برطاقم تزویراته کیریشمش . حسین بکده
مسئلہ نی والده سلطانہ عرض ایلہ نیجه پک زیاده موجب حدت اولمش .
کیفیت وهی ملایہ حوالہ اولمش . وهی ملا درخان اطرافده کی
مکاتب صییانک چوجققلرینی طوپلایوب مکتبی طبقا باصہ طولدیرمش .
واویله کوزل برمکتبی صییان راده سنہ ایندیرمش ! زواللی کمال
افندی نه قدر چالیشمش ایسه مرامنی اکلایمغه موفق اولہ مدیغندن
اوروپایہ قباغی آتمغه مجبور اولمش !

صورت حقندن کورینہ رک چویردیکی انتریقہ ایلہ ارتق معارفک
برباش بلاسی اولہ رق قوتلی برصورتده یرلشمش اولان وهی ملایی
آتمق وکلا ایچون دخی قولای برمسئلہ اولہ مدینی جهتله اودرجہ یه

قدر میدانه کتیرلمش اولان امور معارفی وهی مالانک منفعت خصوصیه سنه آلت مقامنده استعمالنه قارشو نه یاپیلمق لازم اولدیغی دوشونیلیمکه باشلامش! کمال افندینک غیابنده معاونی وهی مالانک وکالتی طیبی اولوب او حالده ایسه هنوز ترقی یه یوز طوتمش اولان مکاتب عمومیه ایشلرینک چیغرندن چیه جفی ا کلاشیلیمش . کمال افندی اوروپایه کیدرکن بومسئله ایچون دردلشدیکی ارکان حکومت ، دائرة نظارتده وهی مالایه طیانہ جق برذاتک لزومی بولندیغی ، بونکده آنجق جودت افندی اولدیغی جهته آتک معاونلک عنوانیه مأمور ایدلمسنى سوتیش . بعض ذواتده دارالمعلمین خواجه لرینک وهی ملاکی برقلاشک اداره سنه نظر استهزا ایله باقه جقلرینی ، علی الخصوص برنجی خواجه اولان یحیی افندی کی بقیه السلف اولان برعالم نخریره وهی ملاکی بین العلماء مذموم ومنفور اولان برشخصک نظارت ایتدیرلمسی یاقیشه میه جفی سویلدکلرندن مجلس معارف عمومیه رئیسى عبدالحق افندی طرفندن دخی جودت افندینک معاونلک ایله تعیینی مناسب کورلمش ایدی . او وقت هنوز معارف نظارتی تشکیل اولمامش اولدیغندن مجلس والا رئیسى ایله خارجیه ناظری معارف عمومیه هیئتنه نظارت ایدیورلردی . جودت افندینک معاون نصب اولنه جفی خبر آلان وهی ملا خارجیه ناظری بونان عالی پاشا سنه قوشوب معاونک تعدیسنه اعتراضه جودت افندینک معین عنوانیه کندى معیتنه مأموریتنى طلب ایله مش . عالی پاشاده بوصورتی ترجیح وترویج ایتمشده مجلس عمومی معارف ارکانی بونکله مقصد اصلی حاصل اوله میه جغندن بشقه جودت افندینک وهی ملا معیتنى قبول ایتمی اصلا مأمول اولدیغی بیلدیرلمش . بوجهته ایش کشاکشه دوشورلمش!

بوتفصیلاتدن بی خبر اولان جودت افندی یالکیز معاونلک ایله
مأمور اوله جغنی ایشتمش اولدیغندن شیخ الاسلام عارف حکمت بک
افندی یه کنديسنک مقصد واملی مدرسه عالمه چکیلوب درس معلمق
یولنده نشر علوم ایله مک ، وتالیفاتله اشتغال اتمک اولدیغنی ، بونک
ایچون معاش ومعیشتمه بر مقدار دهه علاوه اولنسنی بکلدیکنی ،
ومأموریت قبول ایتماک خصوصنده کی عزمی بیسانله معاونلکی
مسلیکنه مغایر کورد بکنندن قبول ایده میه جکنی بیلدیرمش . عارف
حکمت بک جواباً « نه زمان اولسنه مدرسه یه چکیلمک النده در .
شمدی ظهورات قیلندن اوله رق سکا برایش تکلیف اولنیورکه منافع
عامه یه متعلق خیرلو بر مصاحبتدر . علی الخصوص کمال افندیکن غیبوتی
زماننده سزک بواشد ، بولمه کزی بز مناسب کوریورز . سن بونی
قبول ایتده صوکره استعفا ایدوب چکیلمک قولاید . همده اووقت
سکاتقاعد یولنده بر مقدار معاش ویریلور . ایستدیکنک مع زیاده حصوله
کلوره بیورمش . عارف حکمت بک افندی جودت افندی بی اقتباع
ایلدیکننده جودت افندی بالبداهه همان بویتی عارف حکمت بک
حضورنده سویلشدر .

مطلع

خوبان بی وفا کی دهر دسیسه باز

ناز اهلنه نیاز ایدر اهل نیازه ناز

عارف حکمت بک جودت افندی بی زورله معاونلکه اقتاع ایلش
اولدیغنی حالده وهبی ملانک خاطری ایچون عالی پاشانک معین عنوانیله
مأموریتک تنسیبنی مجلس معارف قبول ایتمه مش . عارف حکمت بک

افندیك تسييله جودت افنديك مجلس معارف عموميه اعضايله دارالمعلمين مديرلكنه نصبه قرار ويرلش . ۱۲۶۶ سنه سی شوالنك بشنده بوايكي مأموريت عهدمنه توجيه اولمشدر .

اول دفعه کی حانی اكلاتیغنده پدرم مرحوم دیمشدرکه « ایشه اول کون شبیکه اماله طوتلدم . چالادیجه طولاشدم . آغدن ، باغدن قورتیلیم دیدکجه قیود ایچنه دوشدم . مقدا برخدمتکارم وار ایکن آت سائز وقایق قایقچی تدارکنه مجبور اولدم . ظاهراً کسب رفعت و ترقی ایتدم . باطناً غائبی چوغالتم . چاره یوق ! آرتق معارف عمومییه خدمت یولنده ایفای وظیفه مأموریتیه بذل مقدرت ایلهمک لازم کلدی »

اوزمانه قدر رشید پاشا جودت افندی نی برچوق مهم امورده استخدام ایلهورسده جودت افندی کنديسنك دولت مأموریتی قبول ایتهمک و مدرسیه چکیلوب درسعالمق و تألیفات ایله نشرعلوم ایدرک دولت و ملتیه خدمت ایتمک خصوصنده کی عزم قطعیسنی سویله مش اولدیغندن رشید پاشا آنی انجق بر احبابلق و کنديسنه معاونت صورتیه خدمتمده بولندیوردی . بعضاً کاتبلرینه ویره مدیکی درجه محرم اولان شیرینی جودت افندی یه تیسض ایتدیرردی .

او ائناده بغداد مفتیسی آلوسی زاده محمود افندی درسعاده کلدی . باب عالی یه کتدیکنده رشید پاشا ایله فؤاد افنديك اقتدار و ترا کتبلرینه حیران اوله رق باب عالی دن چیقدیغنده « هذا الفؤاد یلیق لهذا الصدر » دیمش . جودت افندی بومضمونی پک بکندیکنندن زيرده کی قطعه لری سویله مشدر .

کردح لجسم الملك صدر رشيد — محلیه رأى المستشار فؤاد
اصاب يصدق القول في قاله فيهما — يليق لهذا الصدر هذا الفؤاد

قطعة ديكر

جاء فؤاد مستشار المن — اضحى رشيد الرأى صدرالرشاد
جاء بحق المدعى قائل — لاق لهذا الصدر هذا الفؤاد

اوزمانلرده علمای مصریه دن مشهور یحیی افندی دخی استانبوله
کلیکله جودت افندی آنک علمندن ده پک چوق استفاده ایله مشدر .
فؤاد افندی روسیه دن کله لی هر نه قدر تداوی ایله اوغراشمش
ایسه ده روماتیزمه اضطرابندن قورتیله مدیغندن بانیویه لزوم قطعی
کورولمش اولغله روسیه کیتمه که مجبور اولدی . جودت افندی بی ده
برلکده کوتوردی . بروسه ده بولندقلری زمان بر کون تفرج مسیره سنه
کیتدکلرنده صوک بهار موسمنک کوزل هوالی بر کونی اولوب
بولندقلری محل یشیایک اغاجلق ایدی . و برقاچ محلدن صولر آقیوردی
فؤاد افندی ارقداشنه « ماء جاری غم و اندیشه یی ازاله ایدر . بونده
حکمت نه در ؟ » دیمش جودت افندی جواباً « غم دنیا لاشی انسانک
ذهنده بر ایلیشکدن عبارتدر هپ افکار بونک اوزرینه طوپلانور .
وافکارک بر نقطه اوزرنده ازدخای انسانه الم ویرر . صولرک آقندیسی
وشاریلدیسی ایسه سلسله افکاری بوزار . قوروندی بی طاغیدر .
بوجهتله غمی دافع اولور . لیکن ینه بوجهتله شعر سولیه مکده دخی
مانع اولور دیرلر . فی الواقع بوقدر صولرک جریانیله حاصل ایلدیکی
خوش صدالر ارده سننده نه بر کوزل شعر سولیه بیلور ، نه ده منشیانه
بر مسوده قلمه آلینه بیلور . انسان دوشونور که کورینورده افکارینی

بریره جمع ایدمهز ! « دیمش. بونك اوزرینه فؤاد افندی « اولیه ایسه
 هایدی طبیعت شعریه لر مزی زور لایوبده بوراده طبیعت قارشو
 بالاشترک بر غزل سویلهلم « دیمکه زورینه شو غزلی سویله مشلر .

غزل مشترک

جودت — دیده فواره دل زار صویک باشیدر
 فؤاد — بوتقرجده آقان کوزلریمک باشیدر
 ف — سیم بازولرک آکدجه کموش صوینده
 ج — کوزلرم صانکه بروسهده بیکار باشیدر
 ج — در دکانجه وصلته قماشچی پچه نك
 ف — پستر راحت عاشق اشکی ضاشیدر
 ف — اولو جامعهده کی محرابی نه یاپسون عاشق
 ج — قبله وحدت آکا یارین ایکی قاشیدر
 ج — قاپلیجه صوی کی آتش سیاله اشک
 ف — عاشقک باقی اثر آه شرر باشیدر
 رهنارفته بروساده آچوب کلک فؤاد
 بنده سی جودت آنک پیرو یولداشیدر

فؤاد افندیله جودت افندی بروسهده کی مدت اقامت لرینی بوش
 کچیرمیوب ایکی مهم اثر میدانه کتیرمشلردر . او زمانه قدر لسان
 عثمانیک صرف ونحوینی جامع بر کتاب بولمده یغندن قواعد لسان
 عثمانیه نك تحریری ایله بر کتاب تألیفی لزوم نك اهمیتنه مبنی قواعد
 عثمانیه رساله سنی میدانه کتیرمشلر . برده اوروپاچه بیونک ثروت
 ومعموریتی موجب اولان آنونیم شرکت اعتباریه لره ممالک عثمانیهده

هنوز رغبت و هووسى اولمامسندن خلقه بر نمونه كوسترمك و بوغاز
ايچى اهايسنك كيدوب كلهلرينه بر سهولت و يرلك اوزره بر واپور
شركتى تشكيلى دوشونوب بو شركتى تاسيسه دائر بر نظامنامه
لايحهسى قلمه آمشله . بوايكي اثر مهمى بروسهده بر آيه قريب
اولان اقامتلرنده ميدانه كتوروب استانبوله بويله ايكي كوزل هديه ايله
عودت ايله مشله . استانبوله ورودلرنده موقع اجرايه وضع اولمش .
و بو شركمته « شركت خيريه » تسميه اولمشدركه حالا باقى اولان
شركت خيريه در . قواعد عثمانيه كتابخانه جودت افندى استانبوله
اكمل ايله قواعد عثمانيه تسميه ايلدى . صوكره قواعد عثمانيه نك
مبتديلره تعليم و تفهيمى ايچونده « مدخل قواعد » نام رساله ي
تأليف ايتمشدر .

رشيد پاشانك اهمام وغيرتيله معارفك اوزمان انتشار و ترقيسه
پك زياده اهميت و يرليوردى . مجلس معارف عموميه رئيسى صدوردن
عبدالحق افندى اولدينى كې اعضاسى ده اكثري صدور و رجال دولتن
ايدى . جودت افندى آچيق تركه يازمق ايچون خيلىجه چاليشدينى
جهتله معارف كاتبلرينك مسوولرينى تصحيح ايلر . و مهم ايشلرى
بالذات قلمه آلوردى . مجلس معارف عموميه باب عاليده دائره
هايونده منعقد اوله رق على الدوام معارف عموميه دائر مذاكرات
ايله مشغول و آيده بر كره و كلادن برينك خانه ويا ساحلخانه سنده
بر اقسام ضيافتي و يريره رك كيجه مجلس والاي احكام عدليه رئيسى ايله
خارجيه ناظرينك تحت رياستلرنده انعقاد ايلر و سر عسكر رشدى
پاشا كې بعض و كلاده اعضا صفتيله بولنورلردى . جودت افندى
مجلس عمومينك محررى ده بولنديغندن او بر آي ظرفنده نه ياپيلمش

ایسه آنک خلاصه سنی و کله جک آیده یاپیلیمسی متصور اولان شیرک
مذا کره سنی یاپوب او مجلس عمومیده اوقوردی .

جودت افندی بر یاندن ده دارالمعلمین نظامات و اصلاحاتیه
مشغول اولیوردی . بومکتب ایچون بر نظامنامه یاپوب موقع اجرایه
وضع ایتدیردی . وظایف سنک اصول امتحانلرینی یولنه قویدی .
شهور ثلثه ده طشره کیتمه مک اوزره معاشلرینی حد کفایهیه ابلاغ
ایتدیردی . آز وقت ایچنده بو مکتبدن بر چوق مکاتب رشديه
معلملری یتشدی .

اوزمان مجلس معارف اعضائینی پک شرفلی بر مأموریت اولدیغندن
چوق کشتی هودس ایدردی . روم ایلی بکلر بکی پایه لولرندن
مصرلی کامل پاشا ایله تقویمخانه عامره ناظری وقعه نویس دولت
رجائی افندی یهده علاوه مأموریت اوله رق ۱۲۶۷ سنه سننده مجلس
معارف عمومییه اعضائینی توجیه بیورلش ، بر قاپ آیی صوکره کامل
پاشایه وزارت ویرلمشدر .

مجلس معارف عمومییه اعضا سنندن مکاتب عمومییه ناظری کال
افندی ده او ائاده اوروپادن استانبوله کله بیلوب مأموریتنه دوام
ایله مشدر .

انجمن دانش

مجلس عمومی معارفک مهم ایشلرندن بریده پارسک اقاده میسی
طرزنده بر جمعیت علمیه تشکیلی ایدی . اعضای داخلیه سی قرق ،
اعضای خارجیه سی غیر محدود و هر آی باشنده بر کون منعقد اولمق

اوزره انجمن دانش ناميله بر جمعيت علميه تشکيلنه قرار ويرلدى .
رياست اولاسنه صدور دن عطاءه افندى زاده شريف افندى ، رياست
ثانيه مجلس معارف عموميه اعضاسندن عبدالحق افندى زاده خيره
افندى انتخاب ايدلدى . مجلس عمومىك بوكا دائر اولان مضبوطه سى
جودت افندى طرفندن يازيله رق عرض اولندى . التمش يدى سنه سى
رجينك يكرمى بشنده اراديسى صادر اولدى .

او مضبوطه نك مائنه موافق يولده تقويم وقايعه درج ايله اعلان
اولمق اوزره قلمه النان بياننامه ده جودت افندى طرفندن يازلمشدر .
پدرم و استادم مرحوم بو مضبوطه ايله او بياننامه نك صورتلرينى
عاجزه نك درس ضبطلرى ميانه كچيرمش اولديغندن بورايه نقل ايده لم .

مضبوطه صورتى

هل يستوى الذين يعلمون والذين لا يعلمون ، فحوای حكمت
احتوا سى اوزره هر شیده علم و كمالك جهل و نادانى يه رجحانى بحث
واشتباه قبول ايدر مواددن دكلدر . ادنى ملاحظه ايله معلوم اولوركه
هيولای عمار ومدنيك صورت استكمالى حصرا وقصرا نشر وتنميه
قنون متنوعه مقدمه مسلمة سيله استحصا ل واستنتاج اولنه بيلديكى
وارسته كلفت احتجاج و بونك حصولى ايسه انجق دولتك همم عاليه
متواليه سنه محتاجدر . زيرا ترويج هنر ومعرفته اقدام و اهتمام ايليان
دولتلك هر عصرده شكل وهيئت حكومتلرى دائره معموريتده ورعايا
وبراياسى مركز رفاه ومدنيتده بولنه رق سائرلرينه حاكم وغالب اولمى
ادوار هيئت عالمك عادات مستمره و اصول غير متغيره سندن ايدوكى
مسلماتنددر . حتى كوكب كوكبه دولت عثمانيه نك مشرق شان وشوكتدن

طلوعی هنگامی که آفتاب علوم و فنون ممالک شرقیه ده یرتواند از اولوب
طرف سلطنت سینه دن دخی اولوقته کوره لازم اولان فنون و معارفک
تأسیس اصول و قواعدی و تعمیم فروع و فوائدی حقنده ابراز همت
بیوریلهرق فنون متنوعه دن تألیف اولنمش اولان کتب مشهوره
و حساب کلز و کتبخانه لر آلساز بونجه مأثر مبروره اخلافه یادکار
بر اغیلمش و بو جهته صیت شوکت و سطوت سینه جهانی طوتمش
اولدینی حالد هزوران اسلامک لسان عذب الیمان ترکی بی بیاغی متروک
حکمنده طوتوب تألیف کرده لری اولان آثار ی عرض کمال ضمننده
یابتون ، بتون بشقه لسان اوزره و پاخود الفاظ عربیه و فارسیه دن
عبارت اولوب فقط بر صحیفه ده بر ایکی لفظی ترکیه اولهرق تصنیف
و ترتیب ایتکی عادت ایدنمش اولمه لرندن واکثر مؤلفاتی کلیات علومک
بر فرعی اولان شعر و انشایه حصر ایلدکلرندن و هر وقته کوره معتبر
اولان فنون و صنایع بشقه صورتده اولمسیله هر عصرده لازم ارله حق
معارفک نشر و ترویجی ایچون مقدملری کتب عربیه دن اقتباس
اولمه رق تفرعانی تکثیر قیلنه رق فنون و صنایع دائر السنه اجنبیه اوزره
پایلمش اولان کتابلرک دخی ترجمه اولنمی مقابله بالمثل قاعده سی
اقتضاسندن و بو صورت اسکی وقتلرده ملل اسلامیه بیننده مرعی و جاری
و دلائل عدیده ایله معلوم اولان مواددن ایکن حوادث کونا کونا
ظهوریله مسئله دکشه رک و هر نصله شمس کاله منطقه شرقیه ده
زوال ایریشه رک انوار آثار ی بورالجه محو اولوب کیمش . و بر
طرفدن دخی حل و عقد صاحب لرینک کیمیشی زیور هنر و معرفندن
عاری کیمیشی غیر تکشیء وطن و ملت صفت ممدوحه سندن بری اولمه لری
حسیله شمس معرفتک بو طرفدن غروب و غیوبتی ایجاب و بو

جهتله اکثر ناسی ظلمات جهل استیعاب ایتمش ایدی . فله الحمد ذات
 هایون حضرت شاهانهیه موهبه الهیه اولان خصات جمیله لطف
 و معدلت و خصیصه جلیله غیر تکشی دین و دولت ملوکانه لری
 اقتضای معالی ابتغای عالیه سنجه تحت فیروز بخت جهانلیری تشریف
 مرحمت الیف بیوردقلری روز مسعدت بروز دبرو افکار صائبه
 شهنشاهی اعمار اقطار بلاد و ترفیه احوال عباد جانب خیریت جالبه
 معطوف و آرای ثاقبه جهانی بونیت جلیله نک مابه الحصولی و اقدم
 اسباب وصولی اولان تربیه عامه ماده مهمه سنک استکمالی قوانین
 اساسیه سنه مصروف اولسلیه عصر محاسن حصر حضرت شاهانه لرنده
 کوندن کونه هنر و معارف اکتساب اشتهار ایتکده بولنش . و آز
 وقت ظرفنده مائر علوم و فنوندن پک بیوک منفعتلر مشاهده اولنش
 اولوب آنحق تراید العلوم بتلاحق الافکار مؤداسنجه بونک دهها
 زیاده ایلرولسی وعامیه اهم والزم اولان کتابلرک بر آن اقدم وجوده
 کتورلمسی ایچون اصحاب هنر و معرفتدن مرکب بر جمعیتک تشکیله
 عقلاً لزوم کورینه رک مقدمات با اراده سنیه معارف عمومیه نظامات
 اساسیه سنه مأمور اولمش اولان مجلس موقته انجمن دانش نامیله
 بویله بر جمعیتک ترتیبی تذکر و تنسیب اولنش و اجرای اقتضایی
 سایه مقدرتوایه حضرت تاجداریده در دست انشا اولان دارالفنونک
 ختامنه براغیلمش ایسه ده ترتیب بنحشای اصول انجمن خلق و ایجاد
 تعالی شانه عن الاشباه والانداد حضر تلری مصرع بر جسته شان
 وشوکت و بیت القصید قصیده شکوه و سطوت اولان ذات هایون
 حضرت شاهانه یی قرین معانی توفیق و تأیید ونسخه نادره عدل
 ونصف و جامع الاصول خلافت وسلطنت اولان دولت ابد مدت

علیه‌لرین شیرازه کیر دوام و تأیید بیورسون . ازالهٔ جهل تبعه و افاضهٔ تربیهٔ عامه حقیقه درکار اولان اقدامات متوالیهٔ نامتناهی شاهانه‌لری آثار علیه‌سندن اولمق اوزره فنون و معارفجه دخی مأمول اولنماز درجهٔ حصوله کلان ترقیٔ اسباب تحصیله نظراً دارالفنونک ختامنه قدر بیوده وقت کچورلماک و ختامنده آنده اوقوتدیریه‌جق کتابلر اولجه یتشدیرلک و داستان انجمن پیرای جهان واوراد السنهٔ جهانیان اولان منقبت جلیلهٔ جناب پادشاهی و اوصاف بر کزیدهٔ حضرت شهنشاهی‌یی بر فائدها شهرتکیر و بالا رو چرخ اشیر ایده‌جک بویه بر اثر جمیل و جلیل بلا تأخیر وجوده کتورلک اوزره انجمن مذکورک شیمیدین تشکیل و اجرایی میانهٔ عاجزانه‌مزده بالتصویب صورت تشکیلی درمیان مطالعه اولمغله اولبابده جریان ایدن مباحثاتک فذلکک‌سندده اگرچه اشبو انجمنک یکرمی داخلی و یکرمی خارجی اعضا ایله بونلرک جمله‌سنه فضائل و معارفده قائق و تمام رئیس عنواننه لایق بر رئیس و اعضاسندن موظف اوله‌رق ایکی مصحح و بر کاتبدن عبارت اولسی خصوصنه مقدا مجلس موقته قرار ویرنش ایسه‌ده اعضانک هر بری برر قنده ماهی و بر جهته ترجمه و تألیفه قادر و هیئت مجموعه‌سی کرک عربی و فارسیدن و کرک السنهٔ اجنبیه‌دن ترجمه و تألیفه مقتدر اوله‌رق ذوالجهتین اولمق و الحاصل فنون و معارفه دائر هر نه آرانسه بو هیئت مجموعه‌ده بولمق لازم کله‌جکندن و هیئت مذکورک بو مرکز کلسی اعضاسنک تکثیریه توسیع دائرهٔ معارفه متوقف اولدیغندن اعضای داخلیه‌سنک رئیس‌لرله برابر قرق کشیدن ترکیب اولمشی و اعضای خارجیه‌سی غیر محدود اوئوب چونکه بونلر یالکیز انجمن مذکور ایله مخابره صورت وصفته

بولنه جقلىرينه واطلبوا العلم ولو بالصين حديث شريف حكمت اليقنك
 حكم عاليستجه علم و عرفاني هر يرده آرامق جائز و بلكه الزم ايدوكنه
 بناءً اشبو اعضاي خارجيه صفى وهر صنف تبعه دولت عليه نك
 وهر بر مملكت اهاليستك ارباب هنر و معرفته و يرلمسى و رئيس تعيين
 اولنه جق ذات دخى بويله ذو الجناحين اولوب سائرلرندن ممتاز وهر
 درلو فضل و معرفته بالا پرواز اوله رق انجمن دانش و كلاك كويا
 بر فهرست اجمالى اولق لازمهدن و حالوكه دائما بويله بر ذاتك بولنه
 بيله چكى امر مجهول و بلكه خارج از مأمول كيفياتدن اولمقدن ناشى
 برى اول ديكرى ثاتى اعتبار اولمق و دائما يكديكرى نقصاتى مكمل
 اوله رق ايكيلى بر دن صفت مطلوبه ده بولمق يعنى هيئت مجموعه نك بر
 نمونه تمثاليه و صورت اجماليه سى اولق اوزره ايكي رئيس تعيين بيورلمق
 موافق مصلحت كورنمكله مناسبلى لى التأمل صدور عظامدن
 عطاء الله افندى زاده سماحتلو شريف افندى حضرتلى داعيلرى
 حليه معارفله متحلى وهر قنده كعبى على اولمخين و مجلس معارف
 عموميه اعضاستندن سعادتلو خيراافندى حضرتلى بنده لرى دخى
 اصحاب كمالاتدن ولسان آشنا ذواتدن بولمقين بو ايكيستيله صورت
 مطلوبه حاصل اوله جغندن مشار اليهمادن شريف افندى داعيلرينك
 رئيس اول و خيراافندى بنده لرينك رئيس ثانى تعيين بيورلمسى
 و برده ايكي مصححك مقدار كفايه ده اولوب اوليه جنى شمدىكى حاله
 بيلنه ميوب انجمن مذ كورك كشادنده ظهور ايدو جك مصالحك
 كثرث و قلته نسبتله معلوم اوله بيله جكسندن انجمن مذ كور كشاد
 اولند قده اوراده تذ كر اوله رق ايجابنه باقلمسى و اصل انجمن
 مذ كورك كاتى اوله بيله جك ذوات فنون ادبيه ده ماهر وهر وجهله سپك

وربط كلامه قادر اولمسی لازمه دن اولمغله بالطبع انجمن مذکور اعضا-
سندن اوله رق بونلر مصصح تعیین بیوريله جق ذوات دیمک اولوب
فقط رئیس لرك معیتده استیخدام اولمق وانجمن مذکورجه ریاسته
عائد اوله جق خصوصات ایله مشغول بولمق اوزره بر موظف کاتبک
مأموریتی واکا معاونت ایتک اوزره اقلام شاهانه دن یالکیز انجمن
مذکورده بولمقی کندوسنه سرمایه مفخیرت بیله جک بندکاندن برینک
دخی معاشسز اوله رق کاتب ثانی عنوانیله تعیین اولمسی تذکر و تنسیب
اولمش آه
انتهی

بیاننامه صورتی

مستغنی بیان اولدینی اوزره هر شیده دانش و عرفانک جهل
ونادانییه رجحانی بحث و اشتباه قبول ایدر مواد دن اولمایوب هر
حاله بیلان ایله بیلمیان عقلا و نقلاسیان اوله میه جی وهیولای معموریت
و مدنیت نشر معارفدن بشقه بر شیلله صورت حصول بوله میه جی
حکمت عملیه نک بر باشلوجه مسئله سی اولوب بو خصوص خیریت
نصوصک حصولی ایسه دولتک هم غایه متوالیه سنه متوقف و محتاج
بولدینی وارسته کلفت احتجاجدر . حتی کوکب کوکبه دولت
عثمانیه نک مشرق شان و شوکتدن طلوعی هنکامنده آفتاب علوم
وقونک دیار شرقیده اشعه نثار اولوب طرف سلطنت سینه دن دخی
اولوقتلر نشر انوار علم و معرفت امرنده ابراز همت بیوريله رق قنون
متنوعه دن تألیف اولمش اولان بونجه مجلدات و آثار اخلافه برکذار
براخیلمش اولدینی حاله اکثر مؤلفین اظهار بلاغت و یکدیگره

مسابقه ایله قصب السبق آفرین اولمغه حصر امل وبتون ، بتون
 تزین الفاظ و عباریه بذلما حاصل ایدهرک اکثر مؤلفاتی کلیات
 علومک برفرعی اولان شعر وانشایه حصر ایلدکلرندن شناوران بحر
 معارف اولان هنروران اسلافک ساحل حصوله کتورمش اولدقلری
 درر معارف اصداغ واصطلاحات عمیقہ و مخدرات معانیسی حجب تعییرات
 دقیقہ ایچنده قاله رق عروس معنی هر کسه چهر نما اوله مدیغنه و حالبوکه
 بومثللو کتابلر خواصی انام ایچون اولوب عوام اندن استفادہ مرام
 ایدهمیه جکی بدیهیاتدن تربیة عمومیہ قضیة خیریہ سنی ایسه حصراً
 وقصراً نشر و تعمیم فنون متنوعہ مقدمہ مسلمہ سبیلہ استحصال
 واستنتاج اولنه بیلہ جکی مسلمانندن بولندیغنه مبنی خواصک استیفای
 حظ ایدہ جکی طرز بلیغانهک ایلروله مسنه دقیقہ شناسان روزکارک
 تشویق اولنمسیله برابر فنون و صنایعه دائر اولان آثارک دخی عامہ ناسی
 اکلا یوب حصہ یاب منفعت اوله بیلہ جکی صورتده یاپیلمش وبرطرفدن
 دخی امر تحصیلک تمهیلنه چالیشمسی اهم والزم و چونکه فنون
 و معارف مرور اعصار ایله دکشهرک وتلاحق افکار ایله زیاده لشهرک
 هر عصرده دلال افکار بر درلو هنر و صنعت عرض اظهار ایتمکده
 وکالای کرانیهای علم و معرفت هر کون بر بشقه نقش ایله طرازنده
 اولوب کیتمکده اولدیغندن هر دورده لازم اوله جق فنون
 و معارفک نشر و تعمیمی لازمه دن و بو خصوصی مقدملرده دخی
 اهالی اسلام بیننده مرعی و ملتزم اولان مواددن اولمغه فله الحمد ذات
 شوکتسمات افندیغز حضرت نلرینک خصلت مددوچه لطف و معدلت
 وخصیصه غیر تکشی دین و دولت ملوکانه لری اقتضای معالی ابتغای

عالیسنجه تحت فیروز بحث شاهانه لرینی تشریف معالی الیف بیوردقلری
روز مسعدت بروزدن برو افکار صائبه شهنشاهی اعمار اقطار بلاد
وترقیه احوال عباد جانب خیریت جانبیه معطوب واری ثاقبه
ظلیتپناهی بونیت خیریه نك مابه الحصولی و اقدام اسباب وصولی اولان
تربیه عامه ماده مهمه سنك استکمالی قوانین اساسیه سنه مصروف
اولسلیله عصر محاسن حصر آثار شاهانه لرنده کوندن کونه انوار علوم
ومعارف کسب اشتهار وانتشار ایتمکده بولنش . و از وقت ظرفنده
يك بیوک منفعتلر مشاهده اولنش اولوب انحق تزايدالعلوم بتلا حق
الافکار مؤداسنجه بونك دها زیاده ایلرولسی وعامیه اهم والزم
اولان کتابلرك بر آن اقدام وجوده کتورولسی ایچون اصحاب هنر
ومعرفتن مرکب بر جمعیتك تشکیله لزوم کورینه رك مقدا با اراده
سنیه معارف عمومیه نظاماتك مذا کره سنه مأمور اولمش اولان
مجلس موقته انجمن دانش نامیله بویه بر جمعیت معارف منقبتك
تشکیل و تربیتی تذکر و تنسیب اولنش و اجرای اقتضاسی سایه
مقدرتوایه حضرت تاجداریده در دست انشا اولان دارالفنونك
خاتمه براغیلمش ایسه ده ترتیب بخشای اصول انجمن خلق و ایجاد
تعالی شانه عن الاشتباه والانداد حضرتلری مصرع بر جسسه شان
وشوکت ویت القصید قصیده شکوه و سطوت اولان ذات هایون
حضرت شاهانه بی مقارن معانی توفیق و تأیید ومجموعه نفیسه
عدل ونصفت وجامع الاصول خلافت وسلطنت اولان هیئت منتظمه
دولتعلیه لرین شیرازه دار دوام و تأیید بیورسون ازاله جهل تبعه
وافاضه تربیه عامه نیت خیریه سیله فنون ومعارفك تأسیسی اصول
وقواعدی وتعمیم فروع وفوایدی حقنده درکار اولان اقدامات

متوالیہ علیہ و ہمما متتالیہ نامتناہیہ ملکدارانہ لری ایجابچہ او وقت
 ظرفندہ فنون و معارفچہ مأمول اولنماز درجہ حصولہ کلمش اولان
 ترقی اسباب تحصیل بو جمعیت خیریت انعقادک اولجہ کشادینی تعجیل
 ایتدیکندن دارالفنونک ختامنه قدر بیهودہ وقت کچور یلامک وانده
 او قوتدیر یله جق کتابلر دخی اولجہ یتشدیر ملک اوزره جمعیت
 مذکورہ نک شمدیدن کشادی خصوصی مجلس عمومی معارف
 عمومیہ ده تذکر اولنہ رق دارالفنونک ختام انشا آتہ قدر شمدیلک
 آیدہ بر کرہ دارالمعارفده کشاد اولنق واعضای داخلہ سی اتی البیان
 وکلای فخام و علمای اعلام واجلہ رجال بنام واعضای خارجہ سی
 سائر ذوات معارف اتسامدن عبارت اولنق اوزره جمعیت مذکورہ نک
 عقد اولنمسی و صدور عضامدن عطاء الله افندی زاده سماحتلو شریف
 افندی حضرتلرینک رئیس اول و مجلس معارف عمومیہ اعضا سسندن
 سعادتلو خیر الله افندی حضرتلرینک دخی رئیس ثانی تعیین بیورلمسی
 بالتصویب خاکبای عالیدن استیدان اولندقدہ اولوجهله انجمن دانشک
 کشادی و مشارالہمانک مأموریتلرینک اجراسی خصوصالرینه ارادہ
 کرامت افادہ حضرت ظل الہی بیدریغ و ارزان بیورلمش اولمغین
 همان جناب حق پادشاه عظیم المثال و شہنشاہ دریانوال ولی نعمت
 بیتمیز افندیمر حضرتلرینی کافہ خصوصاتده توفیقات صمدانیہ سنہ
 مقرون و عمر شوکت شاہانہ لریں فوق مایتصور افزون بیورمق دعای
 واجب الاداسی ایفاسیلہ بیان کیفیتہ ابتدار اولندی .

انتهی

انجمن دانشك اعضای داخلیه سی رئیس‌لریله برابر قرق اولوب
 اعضای خارجیه سی ده اوتوز اوچی بولدی . بونلرک اسامیسی اسکی
 سالنامه لرده مقیددر . اعضا لر ایچنده اصحاب فضل و معارفدن خیایجه
 ذاتلر وار ایدی . لکن اکثریسنک مشاغلی امور معارفله اشتغاله
 مساعد بولمیدیغندن فعلاً انجمنه خدمت ایده جك ذاتلر پك آز ایدی .
 اعضای داخلیه نك شرائط انتخابیه سنده وكلا بیننده اختلاف واقع
 اولدی . اکثریسنك رأینه کوره وکلادن بعض ذواتك اعضای داخلیه
 عدادینه ادخالیه انجمنه شرف ویرلمك اوزره اقتدار ترجمه و تألیف
 کافی کورولمك ، بعضیلرینك رأینه کوره فعلاً ترجمه و تألیف ایله
 مشغول اوله جق ذواتدن انتخاب اولنمق تنسیب اولنمش ایدی که عالی
 پاشاده بو ایکنجی قسمك رأینده ایدی . حتی « بز بو ایشك ایچنه
 کیرمیه لم ! آهنگنی بوزارز ! » دیمش ایسه ده اکثریت آرا ایله فعلیاته
 نظر اولنمیوب اقتدار ذاتی ایله اکتفا اولندی . امر انتخابه ذاتیات ده
 قاریشیدیرلمغله اصلاً اهلیتی اولمیا نلرده قرقلره قاریشیدی . انجمنك بناسی
 صاغلام بر اساس اوزرینه قوریلهمدی . عالی پاشانك بو خصوصده
 سویلدیکی طوغری چیقدی . انجمنك صورت تشکیکنه و وظائف
 مخصوصه سنه دائر بر نظامنامه یاییلوب اعضانك اسامیسیله برابر اعلان
 ایدلدی . كرك داخلی و كرك خارجی اعضا لره بالاسی طغرالی برر
 قطعه رؤس هایون ویرلدی . احمد جودت اقدی ده اعضای داخلی
 انتخاب اولنمش بولمیدیغندن بر رؤس ده اكا ویرلدی .

انجمن دانشك رسم کشادی حضور هایونده اجرا اولنمق مقرر
 اولدیغندن حین کشاندنه هیئت طرفندن بر مقاله خطابه ایرادی
 تنسیب ایدلدی . انجمن اعضا لرندن ارزو ایدنلرک برر مقاله خطابه

قلمه آلمه لری و ترجیح اولنه جق اولانك قرائت اولنمی تنیه اولندی.
او یازیلان خطابه لردن احمد جودت افدینك کی جمله یه ترجیح
اولندی . درس دفتر لرمده بولنان او خطابه نك صورتی بودر .

خطابه

علمده علم و معرفت کبی بر شرف و مزیت اوله ماز و انسانك مطالب
ذاتیه سنك اسباب تحصیلیه سی صنایع و معارفدن بشقه بر شیله حصول
یوله ماز . هر نه یه اولور سه اولسون و هر نه ده بولنور سه بولسون
هنر و معرفتک قدر و قیمتی انکار اولنه ماز .

« هل یتوی الذین یعلمون والذین لایعلمون » بو کوردیکمز
سامان و انتظام و احوال انام و حسن معاشرت خواصی و عوام هپ
علم و هنرله حصوله ککش بر اثر دکلدر ؟ و مشهودمز اولان بونجه
غرائب امور و صورت آسایش و حضورک نظر امعان ایله باقیلوب
میزان دقت حقیقت شناسی یه اورولدقده دانش و معارفدن بشقه بر سبی
وارمیدر ؟ بونك ایچون فتح ابواب علم و حکمت ترتیب اسباب هنر
و معرفت ایله تربیه عمومیه قضیه خیریه سنك اشهار و انتشارینه صرف
همت ایلان دولتلك جریده حاللری شیرازه کیر سلك انتظام و رعایا سنك
مسئله آسایش باللری صورت پذیر بقا و دوام اوله کلدیکی بحث و اشتباه
قبول ایدر مواددن دکلدر . و انسانك ماهیتی حیوان ناطق اولدیغندن
ایبی جهتی اولوب حیاتنك امر محافظه سی و حس و حیاتی حسیلله
احتیاجات جسمانیه سنك حصوله کلکی وسائلنك استحصالنده مدنی الطبع
اولدیغندن امر تمدنجه ضروری الاحتیاج اولان اسباب تسهیلنه نك

استکمالنده فنون طبیعی و ریاضیه محتاجدر . جهت روحانیسی
یعنی ناطق و کلیات اموری مدرک اولسی حسیله دخی استیفای لذا نذ
روحانیسی ایچون بالطبع مسائل حکمت الهیه مائل و سالک و غدای
روحانیسی مثابه سنده اولان شعر و انشا و نکت و مزیا استماعنه پک
آشوری راغب و متهالك اوله کلشدر . بونک ایچون فن حکمت الهیه
دائر بر چوق کتب و مائر یازلدینی کبی ادبیاتدن دخی بونجه آثار
و مجلدات کثیره رشته تحریرات قلمش و ترین و تهذیب کلام ایچون
فوق العاده و سائر فنون لازمه دن زیاده بذل جل اهتمام اولمشدر .
یا بر سوز ایچون بوقدر امک صرف ایلک عبث ایله اشتغال دیمک
اولمازمی دینلمسون ! زیرا بو عالم مظاهرده سوز کبی نقس ناطقه
انسانیه مؤثر برشی بوقدر . بوسیدن میدان معرکه و پر خاشده جان
و باش تلاشده ایکن بر سوز ایله غیرته کله رک نیجه یوزیک آدم موقع
فداکاریده ثابتقدم اولوب عنندنه اک عزیز و لذیذ اولان حیاتی بر
سوزه دکشدیکی و بر سوز ایله روح انسانی فوق مایتصور و بیک
جهان دکر شوق و شادمانی کسب ایده کلدیکی پک چوقدر سوزک
رفعت قدری نصل انکار اولنه بیلور ؟ انسانک حیوان و سائرده دن
مابه الامتیازی اولان صفت مادحه سی و ترجمان القلب و دلال عالم غیب
اولان لسانک اولانجه بضاعه و سرمایه سی سوز دکلیدر ؟
سوز کبی عالمده متین و پایدار بر اثر وارمیدر ؟ ایام ماضیه ده
کلوب کچمش و جمیع آناری مندرس اولوب دار و دیاری اونودلمش
بونجه صاحب کمال و قدرت اولنلرک آدینی یاد ایتدیرن و بونجه اصحاب
دانش و عرفانک نامنی انجمن عالمده داستان ایدن سوز دکلی ؟
طوفانزده فنا اولان ام سالفه نک اختراع ایتمش اولدقلری بونجه

صنایع غریبه و آثار عجیبه بتون ، بتون محو اولوب کیتمش ایکن اولوقلر بر شاعرک سویلدیکی سوز محو اولیه رق بوقدر امواج حوادث ایچنده یووارلا نوب کلیور ! سوزک بیوکلیکنه بوندن بیوک دلیل ایسترمی ؟ آنجق سوزک قدر قیمتی سویلدانک معلومات و معرفته کوره در . زیرا سوز کارگاه درونده طوقونمش بر قاش بوقلمون اولدیغندن آب و تاب و طراوتی و چارشوی قابلیته قیمتی قوه عاقله نك تردستی تربیه سنه کوره اولور . بوجهتله سوزک کرک بویه دلدوزو جکر سوز اولسی و کرک دامن حشره قدر پایدار اوله جق درجه ده بولنمی دخی علم و کماله متوققدر . هر لسانه شرف و یرن شامل اولدیغنی فنون و معارفدر ، فنون معارفی حاوی اولیان لسان هر نه قدر ذاتاً مکمل و منتظم اولسه بيله آثار اعماردن محروم اولان اراضی خالیه کبی عد اولنوب نته کیم اراضینک حدودی بالتعین کدیمین ایله انواع طرحلر آچیلمدقجه دلنشین و معمور اولماز ایسه لسان دخی تحدید اولنوبده آنک اوزرینه اعمال فکر مدید ایله دیوانلر و فنون متنوعه دن کتابلر یازلمدقجه معتبر و مشهور اوله ماز ! بوسیدن ناشی محضا لسانک تربیه سی و سوزک طرز بلاغت اوزره اولسی ایچون علوم ادبیه دن السنه عدیده اوزره بوقدر کتابلر تألیف اولنمشدر . والحاصل انسانک کرک حوایج جسمانیه سی و کرک مطالب روحانیه سی حسیله تحصیل علم و معرفته محتاج ایدوکی وارسته کلفت احتیاجدر . ایشته بو امر اهمه خدمت ایتمک ایچون محسنات عصریه یه علاوه جمیله اولمق اوزره انجمن دانش نامیله بزم کبی عاجزلردن مرکب اشبو جمعیتک انعقاد و کشادی خصوصنه مساعدئ سنیه بیدریغ بیورلمشدر . جناب حقّه چوق شکرلر اولسون بزی ر پادشاه حقایق اکتناهه بنده ایتمشدر که بندگان

وتبعه سین ، سن تمیز دانش و عرفانه ایصال ایچون افراد و اطفال کبی
 مهد مرحمت سینه لرنده تربیه ایله احسان و عنایت جلیله سین اتمام واکال
 ایدیور . بزرگ ایسه هر خصوصده عجز من برکال اولدینی مثالو
 بو باده دخی اظهار عجز و ابتهال دن غیری بر دیه جکمز و عاجز اولدیغمز
 بیلهرک و سح کترانه من مقداری چبالا مقدن بشقه بر ایشلیه جکمز
 یوقدر . همان مفتاح الابواب ولسبب الاسباب تعالی شانه عن الشک
 والارثیات حضرتلری انتظام بخشای اصول عدل و ترتیب فرمای فصول
 سطوت و سلطنت اولان ولی نعمت بینمز افندیمز حضرتلرینک عمر
 و شوکت شاهانه لرین افزون و وجود عالمسود ملوکانه لرین آفات صوریه
 و مغویه دن مصون بیورسون . آمین بحرمة سید المرسلین .

انتهی

بو خطابه تبیض اولنوب حاضر ایدلمشیدی که التمش یدی سنه سی
 رمضان شریفنک اون سسکیزنجی چهارشنبه کونی باب عالی یه ذات
 شاهانه نک ایرتسی کونی والدہ سلطانک انشا کرده سی اولان دارالمعارفه
 تشریف ایله انجمن دانشی کشاد بیوره جقلری خبری کلدی . اوگون
 پک کیچ وقت عالی پاشا جودت افندی بی یانه چاغیروب ، « سزک
 یازدیغکیز مقاله نک قرائتدن اول صدر اعظم افندیمزک بر نطق
 مناسبله فتح باب مقال ایله لری مناسب اولور . بونی کندیلرینه عرض
 وافاده ایدی . « دیدی . جودت افندی رشید پاشا ساحلخانه سنه
 کلدیکنده کیجه اولمش ایدی . افطار جیلر وزوارک کثرتدن خالی بر
 وقب بولوبده مسئله بی آکلامق مشکل ایدی . بر فرصت بولونجیه
 قدر کیجه یاریسی اولدی . اندن موکرده رشید پاشا مسائل مهمه
 ایله مشغول اولدیغندن آنجق سحور وقتی حرمه کزدی . فرداسی

پنجشنبه کونی ده ارکندن چیقوب دارالمعارفه کیتدی . خلاصه کلام
بر نطق یازمغه وقت بوله مدی .

ذات شاهانه ارکنجه دارالمعارفه تشریف بیوردی . بالجمله وکلا
و اعضای انجمن حضور هایونده قائم اولدقلری حلاله رشید پاشا
بالبداهه یو نطقی ایراد ایلدی .

رشید پاشانک نطقی

ولی نعمت بیتمیز پادشاهمز افدیمزك ابتدای تحت سلطنت
سنیه لرینه رونق ویردکلری یوم مسعودکه له الحمد دولت وملکده
ترقیسی کورملکده اولان قوت ومعموریتک وعالمک نائل اولدیغی
سعادت وامنیتک مبدأ مبارکیدر . ایشته اول کون پادشاهمز باب
عدالتی تیناً آچمشلر ومحامداخلاق سنیه لرینک برهان باهرینی کوسترمشلر
ایدی . صوکره انسانه انسانلی بیلیدیره جک وهرکسی دنیا و آخرتده
سعادت وسلامته ایردیره جک علوم ومعارفک انتشارینه دخی برطریق
سهولت آچهرق جناب حقه شکرلر اولسون از وقت ایچنده ثمره
نافعه سنی وعرفان حقیقی شاهانه لرینک دخی دلیل قویسنی کوستردیلر .
ایشته بونک تدابیر متممه سندن اولمق اوزره بوانجمن دانشک تشکیلی
دخی مراد بیوروب والدۀ مخترمه لرینک اثر عالییه اقتفاء احیا
بیوردقلری بویله بر اثر جلیله بوجمیت خیریه نک بدئی کونی تشریف
شاهانه لرینی دخی دریغ بیورمیه رق جمله قولارینی احیا بیوردیلر .
بزلر نصل بختیار آدمزلرکه خیرلو برعصره یتیشه رک انواع نعم صوریه
ومعنویه ایله مستعم اولمقدمیز . وبزم اولادلرمن بزدن زیاده بختیاردرکه

هر بر نعمتده بزلرله مشترك اولدقدن بشقه كالات انسانیه لازم اولان علوم و معارفك اسباب سهولتی دخی غایت ولی نعمتله حاضر و آماده بولمقدمه درلر . حق تعالی حضرتلری سایه شاهانه یی اوزرلر مزده دائم بیورسون آمین! ولی نعمت افندیمر انجمن دانشك كشادینی امر و فرمان بیوردیلر . انتهى

رشید پاشانك نطقندن صكره انجمن دانش رئیس ثانسی خیرالله افندی جودت افندیك یازمش اولدینی مقاله خطابه یی اوقودی . اندن صوكره انجمنك برنجی اثری اوله رق قواعد عثمانیه حضور هایونه عرض و تقدیم اولندی . وطبع و تمثیلی فرمان بیورلدی . آنك امر طبعی ده انجمن ایچون ابتدای مذاكره عد اولندی . بونك اوزرینه سلطان عبدالمجید حضرتلری رشید پاشایه خطاباً « جودت افندی پایه سی ترفیع ایله تلطیف اولسون فقط كنیدیسنك صحیحاً بمنون اوله جغی صورتده اولمیدر . اوراسنی ارتق شیخ الاسلام افندی ایله مذاكره ایدیكنز » بیوردیلر . وسرای هایونلرینه عودت ایلدیلر . عالی پاشا همان رشید پاشانك یانه كیدوب سالف الذکر نطقی تکرار ایتدردی . و صورتی آلدی . جودت افندی ده بر صورتی الدی . طبع اولنق اوزره تقویم وقایع و جریده حواده كوندردی .

پدلم رشید پاشانك قدرت كتابت و قوه نطقیه سنی اكلا دیركن دیر ایدی كه « سوبلیكنی یازمق ، و یازدیغنی سوبله مك رشید پاشایه مخصوص برخصلت ایدی . كنیدیسی سوبلیه رك بر كاتب یازدیغنده تصحیحه محتاج اولمیان بر مسوده میدان كوردی . اك اوزه نیله رك یازدینی كبی سوز سوبلردی » رشید پاشا قدرت كتابت و خطابتی كنیدیسنده جمع ایتمش جریده نطقیه سی نوادراتدن بولمش بر ذات

ایدی بو اقتدارینه معلومات ودرایت ، ذکا و فطانت و عزم جهد و فعالیت ده منضم بولنوردی . هر ملتده زمانك نادر آیتشدیردیکی ذواتدن ایدی .

فؤاد پاشا ایله عالی پاشاده دیپلوماسیده ماهر ذواتدن ایدیلر . فؤاد پاشاده قوه نطقیه سی مکمل وحاضر جواب اولوب مضمونلر ونسکته لی سوزلر سویلردی . لکن نطق بشقه انشاسی بشقه ایدی . عالی پاشا ایسه بك کوزل یازدینی حالدده قوه نطقیه سی هیچ یوق ایدی .

انجمن دانشك كشادی کونی صادر اولان اراده سنیه شفاهی موجنبجه جودت افندی طریقجه التمشلییه ترفیع اولندی .

انجمن دانش كشاد اولندقدن صوکره آیده بر کره دارالمعارفده انعقادده باشلادی . اول امرده جریان ایدن مذاکره دن بری قواعد عثمانیه ایله لسانمرك قواعدی ضبط اولندیغندن برده لغت کتابی باییلوب لسانمزده زبازرد اولان عربی و فارسی و سائر اجنبی لفظلر کندی لسانمزدن عد ایدیلرک تعیین و تحدید ایدیلوب خارجه قالان الفاظ غریبه استعمالندن واز حکمك مسئله سی ایدی . اوילה بر لغت عثمانیه تألیف اولنق اوزره بر قومیسون تشکیل ایدلدی . علم تاریخده بر قاج قسمه تقسیم واعضادن بعض ذواته توزیع اولندیغی صروده بیک یوز سکسان سکز سنه سندن بیک ایکیوز قرق بر سنه سنه قدر اولان وقایعک یازلمسی جودت افندیك عهده سنه ویرلدی . و الفاظ غریبه استعمالندن و تکلفات منشیانه دن صرف نظرله هر کسک آکلایه جنی تعبیرات ایله یازلمسی تنیه اولندی . آنک اوزرینه جودت افندی تاریخ جودتک تحریرینه باشلادی . بالفعل ایسه یارایه حق اعضایه

توزیع اولنان تألیفات ایچنده تاریخ جودتدن بشقه بر اثر میدانہ
چیقاریله مدی .

رشیدپاشا موقع اقتدارده بولندقجه سیاسیاتده کی مهارت و مساعیدیه
خارجاً دول معظمه ایله تأیید مناسبات و داخلی نشر علوم و تنظیم
قوانین جدیدہ و نظامات ایله آرزمانده پک چوق ایشلر کورہ رک
دولت و ملتہ خدمت لر ایتشدہر . تجدد و ترقی اولوجہله کیتسه ایدی ،
کندیسی ہیپ موقع اقتدارده بولنوبده او خدمت لردہ دوام ممکن
اولسه ایدی دها پک چوق شیلر میدانہ گلش بولنوردی . حتی موقعندن
امین اولہ میہرق بعضاً حیاتی ایچون قورقورلر کچیرہ رک هر موقعه کچدکجه
عزمنده دوامی ده کندیسنک پک بیوک اقدام و ثباتی ابراز ایلر . لیکن
بو غیور آدم ایکی ده برده موقعندن آتیلہرق باشلادینی شیئی او بر
موقعه کلیشنده ا کاله مجبور اولیور . موقع اقبالده بولندقجه دخی
بر چوق دشمنلری آنکله اوغراشیورلردی . آرزمانده میدانہ
کتیردیکی آثار نافعہ نک مهم لرندن بولنان انجمن دانشک کشادی ده
آکا یکیدن دشمنلر پیدا ایتمش و بونلر آره سنده پک صاحب نفوذ بر
دشمن دها قازاندرمش اولدی ! شویله که انجمن دانشک کشادی کونی
وکلا و مأمورین ایکی صنفه تقسیم اولنوب ، بری اصحاب دانش عد
اولنان رشید پاشا طاقی ایدی . دیگر قسم بونلرک خارجنده قالمغله
آنلر رشید پاشایه دلگیر اولمشلردی . خارجده براقیلانلردن بری ده
فتحی پاشا ایدی که فتحی پاشا داماد شہریاری ، واو آندہ طوپخانہ مشیری
و مظهر کمال توجه شہریاری اولہرق عادتاً مستشار سلطنت مقامنده
ایدی . اوللری اصول جدیدہ نک وضع تأسیسنده فتحی پاشا رشید پاشا
ایله هم افکار ایکن مؤخرآ آره لری شکر آب اولدی . آره لرندہ کی

برودت انجمن دانشك كشادی كونده كسب شدت ایلدی . آندن
 صوكره فتیحی پاشا مجلس معارفك ایشلرینی ترویجده اكثریا طرف
 خلافةده بولمیشدر . او زمان قبودان دریا اولان داماد محمدعلی پاشاده
 رشید پاشانك بك بیوك دشمنی اولوب دائما آكا ضد بولنور ، آنك
 علیهنده آنتریقہ چوپروب امور حكومتی كندی اینه آلمق ایستردی .
 رشید پاشا ایسه رأینده مصر ، عزم وثبات صاحبی بر ذات اولوب
 هیچ برینه سرفرو ایتمزدی .

فتیحی پاشانك رشید پاشایه كوچمه سی نتیجه سی اوله رق ۱۲۶۸
 سنه سی ربیع الاخری بشنده رشید پاشا عزل ایدیلر ك رؤف پاشا
 صدراعظم اولدی . برهفته صوكره رشید پاشایه مجلس والا ریایتی
 توجیه بیورلدی .

جماذی الاولنك اون سكیزنده ینه رشید پاشا صدراعظم اولدی .
 مصر والیسی عباس پاشان اعضاءی خاندانی و پدرینك امكدارلری
 مشتكی اولوب امرای مصریه طاقم ، طاقم استانبوله كلهر ك كوردكلری
 بد معامله دن شكایت ایتمكده اولملر یله رشید پاشانك آنلری صحابت
 ایتمسندن عباس پاشا ایله اره لرینه برودت و مبانیت دوشمشیدی . باب
 عالی ایله مصر والیسی آره سنده کی مبانیت ابو برشی اولمديغندن بونك
 رفعی ایچون صدارت مستشاری فؤاد افندیك مأموریت مخصوصه ایله
 مصره اعزامی قرار کیر اولدی . بوندن بشقه محمدعلی پاشا مخدوملری
 و کریمه لری پدرلرندن قالان میراثی ایسته مکده عباس پاشاده بوكا
 یناشماقمده بولنديغندن بو میراث مسئله سنه ده برصورت ویرمك لازمه
 حالدن اولمغله بونك ایچونده علمادن برینك برلكده کیتیمی تنسیب
 اولنه رق فؤاد افندییه جودت افندی ترفیق ایدلدی . التمش سکیز

سنه سى جازى الاخره سنك اوچنچى كوني سائق شادى نام قرقين
واپور هايوننه را كبا مصره حركت ايلديلر. ماه مذ كورك اون بشنچى
كونى مصره واصل اولديلر .

فؤاد افنديله جودت افندى مصرده حيسون نام سرايه مسافر
ايدلديلر . موسم ايلك بهار اولوب استانبولده هنوز بوغاز ايچنه نقل
اولنماش ايكن مصرى پك صيچاق بولان جودت افندى استانبولى
خاطرلادىغى كې رشيد پاشان افتراقده اكا كوچ كلش اولديغندن
برغزل سويله مش ايدى كه او غزلك آخرييتلرى شونلردر .

آكوب استانبولى فريادم ايله ايلرم آهنگ

بوراده عودوقانون پرده سين كوش ايتديكم دملر
كلنججه ياده جودت آغلرم صدر كر مكارك

در لطفنده اكدارى فراموش ايتديكم دملر

رشيد پاشاى دريا دل كه نيل آسا آقار اشكم

كلوب ياده مى فيضى ايله جوش ايتديكم دملر

فؤاد افندى بو مأموريتده موفق اولدى . مصرك سنوى آلتش
بيك كيسه ويركوسنى سكسان بيك كيسه يه ابلاغ ايتديردي . ميراث
مسئله سى ده صلاحاً تسويه اولندى .

مصر بكارينك امللرى عباس پاشانك عزل وتبديلى اولدينى حالده
فؤاد افنديك او يوله كيتماسندن طولاي آندن نمون اولمامشرايسه ده
عباس پاشا پك نمون اولدى . فؤاد افنديك خدمتى دولتى نژدنده
مقبول اولدى .

مصر رجائندن بوندن خوشنود اولميانلر فؤاد پاشانك اوزلاشمق
صورتيله ايشى تسويه ايليوب عباس پاشانك عزلى يولنه كستمه مى

عباس پاشا دن آلدیغی بر چوق آلتونلره طمعاً اولدیغی سویله ملریله ایجه گفت کو اولمش ایسه ده مصرده فؤاد پاشا ایله بولتمش اولان پدرم درس لریمزك مصره عائد بو قسمنی تقرر نده فؤاد پاشایه عباس پاشا طرفندن بر مبلغ جسم ویرلدیکی محقق ایسه ده فؤاد پاشا کوره جکی خدمتی او پاره مسئله سنه اویدیره رق یامیموب عباس پاشا ایله اوزلاشمق جهتی دولته نافع کوردیکی ایچون او یله یاممش و بوندن ممنون قالان عباس پاشاده آکا عطیه ویرمش اولدیغی آکلا تمش ایدی . جودت افندی پازهلرک ورودینی بیلدیکی حالدده او مبلغ کلینک مقدارینی نه جودت افندی فؤاد پاشایه صورمش نده فؤاد پاشا آکا سویلشدر . فؤاد افندی مصردن عودت ایلدیکنده کوردیکی خدمتی رشید پاشاده تقدیر و تحسین ایلدی . لیکن بو تقدیراتی سویلدیکی زمان طورنده کی طوقلق بر شیئه عدم منتهی حس ایتدیورودی . بوکا فؤاد افندی عباس پاشانک عزلی جهتی طوتسه ایدی رشید پاشا ده ممنون اوله جفی معناسنی ویرن اولمش ایسه ده رشید پاشا او فکرده اولسه کندی کوندردیکی فؤاد پاشا کیدرایکن آنی حس ایتدی رسمی و آکا او یولده تعلیمات ویرمی لازم کلزمی ؟

حالبوکه او خصوص ایچون موافق ومناسب کوره جکی صورتله حرکته تمامیه مختار اوله رق کوندرمش . محمد علی پاشایه ویرله جک فرمانک اولجه مسوده سنی کندیمی یازدیغنده قویمش اولدیغی سنوی سکسان بیک کیسه ویرکو آنک عزلیله یرینه کچن هیئت وکلا طرفندن آلتش بیک کیسه یه تنزیه موافقت اولمشی او وقتدنبرو رشید پاشای اوزمش اولان مسائلدن بولندیغندن فؤاد پاشانک آنی سکسان بیک کیسه یه ابلاغی رشید پاشانک او خصوصده کی املنک حصولی دیمک ایدی .

برده عباس پاشا انکلیزلره یا قلاشوب حتی انکلیزلری کندندن خوشنود ایلمک اوزره مصر دن سویشه بر تیمور یولی انشا ایتدیرمش وکندی موقعی خصمانه قارشو تأمین ایلش او زمان رشید پاشا ایله عباس پاشا بیننده مبانیت وقوعه کاوب رشید پاشا عباس پاشا علیهنده بولندیخی حالده عباس پاشانک انکلیزلر ایله اره سی ایی اولمسندن آکا بر شی یاپه مدیغی و یاپمغی موافق بولمدیخی واقف اولنلرجه معلوم اولسی کیفیتی فوآد پاشانک عزل یولنی طوتماسندن مغبر اولمسنه ضد دوشه رک بر تناقص میدانه کتیریر و بر سبب دیگرک موجودتی کندینی حس ایتدیرر . بلکه محمد علی پاشانک کندنی اوکنه سردیرمک ایستدیکی التمش بیک کیسه یعنی اوچیوز بیک لیرای ایتوب باقماش اولان او بیوک آدم کندنی شا کردینک ده عطیه اوله رق دخی ویریلان آلتونلره اویلجه معامله ایلدیکنی کوره مدیکندن طولایی محزون اولمشدر . بو مصر مأموریتدن صکره رشید پاشا ایله فوآد افندی اره سی ظاهر آینه اولکی کبی پک ایی کیتمکده ایسه ده باطناً بر آرز شکر آب اولدی .

ذوق وسفاهت

او زمانک مجلس وکلا هیئت صدر اعظم ، شیخ الاسلام ، سرعسکر ، قبودان دریا ، طوحنانه مشیری ، مجلس والای احکام عدلیه رئیس ، خارجییه ناظری ، مالیه ناظری ، خزینة خاصه ناظری ، اوقاف هایون ناظری ، تجارت ناظری ، ضبطیه مشیری ، مستشار صدر عالی ، والده کتخداسی اولانلردن عبارت ایدی . صدارت

معزوللرندن بعضیلری مجالس عالیہ مأموریتی عنوانیلہ مجالس وکلا
اعضاسندن عد اولئورلردی .

صدراعظم ، سرعسکر ، قبوداندریا ، طوبخانه مشیری ، مجلس
والا رئیس ، ضبطیہ مشیری ، دائماً وزرادن ، مستشار صدر عالی
رتبہ بالا اصحابندن ، سائرلری بعضاً وزرادن و بعضاً رتبہ بالا اصحابندن
بولئورلردی . وزیر اولان وکلانک شہریہ التمش بیگدن یوز بیگ
غروشه قدر خزینہ مالہدن مخصوص معاشلری و مکمل تعیناتلری
ورتبہ بالا اصحابنک اوتوز بیگ غروشندن اللی بیگ غروشه قدر
معاشلری وات اکمک تعیناتلری اولدقدن بشقہ نظارتلرک اکثرندہ
ناظرلرہ مخصوص خرچلر دخی وار ایدی . علی الخصوص مالہ
ناظرینک تحصیلداریه سی کلی مقدارہ بالغ اولیوردی . او وقتک بیگ
غروشی یکریمی درہم مقداری آلتونہ یاخود اوچوز یکریمی درہم
قدر سیم خالصہ مساوی ایدی .

باب عالی رجا لندن دعاوی ناظری و بکلکچی و آمدی و تشریفاتی
بولئانلر رتبہ اولی صنف اولئی حائز اولوب شہریہ اون ایکیمیک
بشیوزدن یکریمی بیگ غروشه قدر معاشلری و مقدار کفایہ ات
واکمک تعینلری ، بعضلرینک منصوبلرندن خرچلری دخی وار
ایدی . صدراعظم و خارجہ مکتوبچیلری و دیوان ہایون ترجمانی ،
داخلیہ و خارجہ کاتبلری و مجلس والا تحریرات مدیری و دعاوی
ناظری معاوفی اول و ثانیسی و اوراق مدیری بولئانلر رتبہ اولی
صنف ثانیسی حائز اولوب شہریہ الی بیگدن اون بر بیگ غروشه
قدر معاشلری ، و بعضیلرینک تعیناتی اولدقدن بشقہ بعضیلرینہ
طشرہ و زراسی قپو کتخدالغی علاوہ مأموریت ایدیلہرک بونک

ایچون دخی شهریه بیک غروشدن ایکی بیک بشیوز غروشه قدر معاش ویریلوردی . بو منصب صاحبلیک معیتلرنده کی قلملرده رتبه ثانیه اصحابندن اوچر بیک غروش شهریه معاش آلور متعدد سر خلیفه و معاون و ممیزلر بولنوردی . آمدی اوپه سنک اصول متخذه سی موجبجه رتبه ثانیه اصحابندن یکر می نفر خلفاسی اولوب شهریه ایکیشر بیک بشر یوز و قدما سنکدها زیاده معاشرلی واردی . سائر اقلام باب عالیده موجود اولان کتبه نك رتبه لری متفاوت اولدینی کی شهریه معاشرلی دخی یکر می بش غروشدن ایکی بیک بشیوز غروشه قدر بولنور ایدی .

دیوان هایون قلمیله اندن مفرز مهمه ورؤس و تحویل قلملرنده بولنان کتبه نك سنوی سکسان بیک غروشدن یکر می بیک غروشه قدر بدل ایله مقید زعامتلی اولوب بلاولد وقاتلرنده بدل زعامتلی معاشره تحویل ایله او قلملرک کتبه سنه تخصیصی نظامه ربط اولتمشیدی .

ایشته باب عالینک اجمال احوالی بو منوال اوزره اولوب دواثر سائر رجالی و مأمورین و کتبه سی آنلره مقیس ایدی .

شیخ الاسلامک معاش و تعیناتی شهریه یوز بیک غروشه بالغ اولوردی . او وقت اون یدی ، اون سکز قدر صدور کرام بولوب بونلرک اسکینسه یعنی اک اول روم ایلی پایه سی آلمش اولانه عالم اولسون ، جاهل اولسون رئیس العلما دینلوب آنک شهریه معاشی اون بشبیک غروش ایدی . دیگر روم ایلی پایه لیلرینک آرپه لقلری ایله ضمیمه سی اولان معاشرلی شهریه طقوز بیک غروش وانا طولی پایه سنده بولنان صدورک شهریه لری یدیشر بیک غروش ایدی .

استانبول پایه‌سندہ دخی بر خیلی ذوات بولنوب بولنلرک آرپہ لقلری
دخی شهریه اوچر بیک بشر یوز غروشہ ابلاغ اولنوردی . سائر
مولینک آرپہ لقلری و مدرسینک معیشت و معاشلری متفاوت
صورته ایدی .

اوزمانکی مأمورین حکومتک کیمیسیدہ خانہ و ساحلخانہ تدارکنہ
محتاج بولمغله آره صرہ بعضیلرینہ عطایای سنیہ ویریلوردی . متنفذین
و متسببینہ شورادن ، بورادن خلیجہ ہدیہلر کلوردی . بول ، بول
معاشلر ہر آی چیقیدینی حالہ سفاہت دہ ایلرولہ مش اولدیغندن
بولنردن چونغی صیقیدی ایلہ کچینورلر و برخیلیسیدہ مدیون ایدی .
مسیرہلر اصحاب ذوق ایلہ لبالب طولیور . قلبہ کدر و ذہنہ غم
کتیرہ جک شیلردن ہر کس اجتناب ایدیور . برحیات بہشتی امرارینہ
چالیشیلیور . ذوق و نشئہ حکمران اولیور . صانکہ دنیا جنت یاییلمق
ایستہ نیلیوردی ! شرکت واپورلرینک بوغاز ایچنہ ایشلہ مکہ باشلامسی
ساحلخانہلرک فیئاتی ترقی ایتدیرمش ، ہر طرفدہ املاک قیمتی
یوکسلمش ، آلافرانغہ ملبوسات و تجملاتہ رغبت ، خانملرک دخی
آلافرانغہ ککینمہلری ، مودالر اوزمانلر باشلامش ایدی . آلافرانغہ
لباس و مودا سرای ہایونہدہ داخل اولمش ایدی . استانبولہ اخذ
واعطا چوغالیدی . اصناف طاقی زنکین اولدی . استانبولہ بر ثروت
کاذبہ کوریلوردی . حالوکہ امر تجارتجہ ادخالات و اخراجاتک
موازنہ سی بوزلیدی . اوروپاہ علی الدوام نقود کلیہ کیدیوردی . موازنہ
مالیہ شاشوب دولتک وارداتی مصارفنی قوریمہ یوردی . حالوکہ
خزینہلک احوالہ باب عالیجہ معلومات صحیحہ اولمیدیغندن موازنہ یہ
اہمیت ویرلمہ یوردی .

۱۲۶۷ سنه سنده مالیه ناظری نافذپاشا بوحالدن شکایتیه باشلادی. و برکون مجلس مخصوص وکلاده « ایشته ! بو آی باشنده آیلقلر ویریلهمیوب بر هفته تأخره مجبوریت کورولدی ! » دیمسیله وکلا شاشیردی ، تلاشه دوشدی . « بر آیک آخرنده هرکس مستحق اولدینی آیلغنی یکی آیک برنجی کونی ایسته یوبده ویريله مزسه خزینه افلاس ایتمش اولمزمی ؟ حالمز نه اولور ؟ » دیه دوشونمکه باشلادیلر. رشید پاشاده « ذات شاهانه بونی طویارسه نه بیورر ؟ » دیه تلاشه دوشدی . بونک اوزرینه مالیه خزینه سنک حالتی آ کلامق اوزره مجلس والا دائره سنده بر قومیسئون تشکیل اولنوب بوکا سر عسکر رشیدی پاشا ، خارجیه ناظری عالی پاشا ، مستشار صدر عالی فؤاد افندی ایله اولوقت مالیه ده دفتر دار بولنان خالد افندی مأمور اولدی. خزینه دن دفتر لک تیریلوب ایراد و مصرف موازنه ایدلدی. کورولدی که دولتک مصارفی وارداتی آشمش ! مالیه ایشی صحیحاً فنالشمش ! خزینه بر « قریز » حالنه دوشمش ایدی .

« قریز » لفظنک لسان ترکیده ترجمه سنی بوله مدقلرندن ا کا مقابل کله بولمق ده بر مسئله اولدی . بر کیجه فؤاد افندینک یالیدسنده او خصوص حقنده قونوشیاء و رکن جودت افندی بونک ایچون « بحران » لفظنی بولمغله قریزک ترجمه سی اولمق اوزره قبول اولندی . بو خصوصه دائر تقدیم اولنان عرض تذکره سنده « خزینه مالیه نك حال بحرانی » دیه تحریر قلندی . آندن سوکره قریز مقامنده بحران کلمه سی استعمال ایدلدی .

۱۲۶۸ تاریخنده مالیه مسئله سی کسب اهمیت ایلدی . باب عالیده هرکس آندن بحث ایتمکه باشلادی . امور مالیه یی اصلاح ایچون اولا

قاعدہ تصرفہ رعایت لازم ایکن استقراض یولی آچیلحق ایستہ نیلیدی .
 یویولی الک زیادہ ترویج ایدن فؤاد افندی ایدی . نہایت فرانسہ دن
 استقراضہ قرار ویرلیدی .

اوزمانلر رشید پاشا ایله داماد قنچی و محمد علی پاشا آلر آرہ سندنہ کی نفاق
 و مخالفتدن طولای رشید پاشا صدارتدن عزل ایدیلہ کلمکده اولدیغندن
 یوکرہ قنچی پاشا ایله رشید پاشا آرہ سندنہ کی نفاق و مباہیت کسب
 شدت ایلدیکنندن ذات شاهانہ ایکسینی ده عزل ایدوب عالی پاشایی
 صدر اعظم و فؤاد افندی بی ده خارجیه ناظری نصب ایلہ مشدر .

استاد ایله شاگردلر

خلق رشید پاشانک یرینہ عالی پاشایی یاقیشدیرہ میوب اولیلہ بر
 آدمک یرندہ عالی پاشایی کچوک کورویورلردی .

عالی پاشا صدارتہ کلدیکنده استقراض عقدی مسئلہ سیلہ مشغول
 اولیوردی . قنچی پاشا ذات شاهانہ یه « پدرکز ایکی دفعہ روسیہ ایله
 محاربه ایتدی ، بو قدر سفرلر آشوردی ، بونجه غائلہ لر کچیردی
 خارجدن برپارہ استقراض ایتدی . زمان هایونکیز آسایش اوزرہ
 کچمش اولدینی حالده استقراضہ عالم نہ در؟ ، دیملکہ ذات شاهانہ بوندن
 متأثر اولہرق استقراضک منعی التزام بیوردی . استقراض مقاولہ سی
 امضالانمش بولندیغندن باب عالی ده بونی التزام ایدیوردی . فرانسر
 سفیری فؤاد افندی یه عالمک حالتی بکنہ مدیکنی ، بر محاربه ظهوری احتمالی
 سوبیلہ رک اللرنده براز آلتون بولمق اوزرہ استقراضک بوزولماسی
 نصیحتندہ بولنمش اولدیغندن فؤاد افندی ذات شاهانہ بی اوابدہ اقعاعہ

يك چوق چالیشمش سده فائده سی اوله یوب ذات شاهانه فؤاد افندی یه « بن بودواتی سلفمدن نصل بولدم ایسه خلفمه اولیجه ترك ایده جکم! اکر بواسقراض بوزولماز ایسه سلطنتدن استعفا ایدرم » بیورمشیدی. بناءً علیه مذکور استقراض فسخ اولندی. و بوندن طولای اعطاسی لازم کلان تضمینات اقچه سی بین الوکلا توزیع و تحصیل قیلندی.

بواسقراض مخالفتی زمانده فتی پاشایه اجاسندن بری « نیچون باب عالی یه بویه ضد کیدیورسین؟ باب عالی یه قارشو کیتمک انی شی دکلدر! » دیدیکنده فتی پاشا جواباً « بن باب عالی یه اصلاً مخالفت ایتمک ایسته م. لکن بیلورم که بودوات بش غروش بورج ایدرسه باتار! زیرا برکرم بورجه آلیشورسه صوکره اوکی آلمانز! دیونه مستغرق اولور کیدر » دیمشدر.

بومسئله ایچون پدرم مرحوم دیمشدر که « متعاقباً روسیه محاربه سی ظهوره کلدی. مجبوریت صحیحه تحتنده اوله رق اوروپادن بر مقدار آلتون استقراض ایدلدی. بووجهله استقراضه آلیشیلدی. استقراض ایشلرنده بولنان بعض وکلا و مأمورین دخی بوندن تمتعه مألوف اولدی. آندن صوکره آرتق اوکی آله میوب فتی پاشانک دیدیکی حاللر ظهوره کلدی. جسم دولته اونولمز یاره لر آچیلدی. بزخارخی چکیوروز! یاره لریمزه بیوده نمک تأسف ا کیوروز! »

سلطان عبدالمجید بیت المالی محافظه خصوصنده غیرت کوستریوردی. حتی فؤاد افندی آمدجی ایکن سرای هایبوندن اخراج اولنان بر آغایه مالیه خزینه سندن شهریه اکیوروز الی غروش معاش تخصیص ایله صدر اعظم بولنان رشید پاشا طرفندن عرض اولندقدن سلطان عبدالمجید « بنم خدمت مخصوصه مده بولنان آدمک مالیه خزینه سندن

معاش آلمغه نه حقى واردر؟ » ديه معاش مذكورك خزينه خاصه دن
تخصيصنى فرمان بيورمش ايدى .

على پاشا هر نه قدر افنديسى اولان رشيد پاشايه صورتا حرمت
و رعائتده قصور ايتمه يورسده رقابت و حرص جاه بو تبدل مناسبتيله
سيرتده حالى بشقه لاشديرمش ايدى . فؤاد پاشاده هيئت وکلادده بولمغله
على پاشا ايله متحد اولوب سرعسكر رشدى پاشاده آنلرله برلشهرک
اوچى عقايم ثلثه کجى اتحاد ايله رشيد پاشا عليهنه دوشديلر . على
پاشا ايله فؤاد افندى منسوبانى دخى رشيد پاشا طاقندن معدود ايکن
آنلرده رشيد پاشا طاقندن آيريلديلر .

آمدجى محمود نديم بکده اولجه رشيد پاشانک خواص خلوصکارانندن
ايکن يکي چيقان طرفه دونمش و صدارت مستشارلغنه کچمکه چالشمش
ايسده بکلکجى شوکت بکلک قدمى قيريله ميوب اونصب اولمغله محمود
بکده فرانسزجه بيلمديکي حالده خارجيه مستشارى نصب اولنش .
محمود نديم بک لسان آشنا اولمديغندن بو مأموريتک کنديسى ايچون
موقت اولديغنى بيله رک خوشنود قلامشدر .

مأمورينده ايکي يه منقسم اوله رق برطاقى بونلره ميل ايتدى .

برطاقى ده رشيد پاشا طرفدارلغنده ثابت قالدیلر .

بو حال زواللى رشيد پاشا ايچون اليم ايدى . کندی تعليم ايله يوب
يتشديرديکي و ايکي قولى مثابه سنده بولنديرديني ، کنديسینه سرداش
ايدينديکي ، مهارت سياسيه سندن تجربه و ملکه سندن فيضياب ايلديکي ،
برينى کندی ايله وزراته ، ديکرينى رتبه بالايه قدر چيقارديني بوايکي
سوکيلي و قيمتلى شاگردلرينک اکا اويله ارقه لريني چورى و یرمه لرى
کوجنه کيتميه جک برشى دکل ايدى . اوئنده رشيد پاشا نظر هايوندن

ساقط اولدینی جهتله مأموریندن هیچ کیمسه آنک دائره سینه کیمه یوردی . زائرلردن ، خلوصکارلردن اوتوره جق ، طوریه جق بربولنمیان اودا اثره سسز و تنها بولنیوردی .

داماد سعید پاشا فقره سنده رشید پاشای ترک ایتیوب یانندن آیریلمیان جودت افندی اودفعه ده رشید پاشای یالکیز برافندی . بوندن طولاییده باب عالیده بولنانلر جودت افندیدن بییکانه طورییورلردی . حتی باب عالییه تونس ، یمن ، طاعستان ، خیوه خوقندکی دیاردن کلان عربی وفارسی اوراقی جودت افندی ترجمه ایلر وایجابنه کوره عرض ایتدیروب جوابلری قلمه آلمقده ایکن عالی پاشا صدارته کلهلی اومثللو اسراره دائر اولان اوراقی جودت افندییه ویرمه یور ، باب عالیده ایسه اندن بشقه انلری ترجمه یه وجواب تحریرینه مقتدر مترجم بولندیغندن اوکاغدلر موقوف طورییوردی . جودت افندیگ بوفدا کارلغی رشید پاشا طاقی طرفندن تقدیر اولنه جق یرده آنلرده جودت افندیگ فؤاد افندی ایله کوروشمه سندن طولای اکیان باقیورلردی . بوندن طولایی جودت افندی رشید پاشا دائره سندن کوردیکی بارد انظاره تحمل ایله ینه رشید پاشا سنی براقه یوردی . فؤاد افندیگن کچمکده جودت افندی ایچون ممکن دکل ایدی . اوفؤاد افندی ییده اندن وازکچمه جک قدر سوهوردی . آنکله برقدراش کی یشامغه آیشمشلردی . رشید پاشای اومنکوبیت زماننده ترک ایتمه سیدی هرکسک کنیدی سندن اوزاق قاچمسنه باعث اولیوردی .

اسکی حالنده قالان برده بکلکچی شوکت بک ایدی . شوکت بک رشید پاشانک خواص بنده کاندن بولندیغنی حالده عالی پاشایده اخلاصی

واردی . رشید پاشا ایله عالی پاشانک اره سی آچیلوب طرفین یکدیگرک
 علیهنده اولدقلری جمله نك معلومی ایکن مخلص و صافدل شوکت بك
 «هیچ او یله شی اولورمی ، دیه رك بوکا احتمال ویره مدیکندن ایکی طرف
 ایله ده خالصانه کوریشوردی . لکن جودت افندینک رشید پاشا ایله
 اولان مناسبتی و خصوصیتی وفؤاد افندی ایله اولان انسیت وارقداشلخی
 شوکت بکک رشید پاشا و عالی پاشا ایله اولان احبابلغنه بکزه مدیکندن
 هرا یکی طرفده اکا زیاده اهمیت ویریورلردی . خلاصه صانکه جودت
 افندی قرانته لی ایش کی هر کس آنکله اختلاطدن اجتناب ایدیوردی .
 رشید پاشا وفؤاد افندی هرا یکی ده جودت افندی یه اولان حسن
 معامله لرینی دکشدیرمه مشلر سه ده رشید پاشا دائره سی خلقیله باب عالی
 طرفنک بویولده کی شیرینی حکمکه ده پک چوق تحمل لازم کیوردی .
 رشید پاشا آدم لرندن وجودت افندینک احباسندن بولنان بری
 اکا نصیحت یوللو « یا بزم طرفه کل ! یا و ته طرفه کیت ! ایکی بایراقدن
 برینه یازیل ! زیرا بورایه کلوب کیتدی بک ایچون هیئت حاضره ، سندن
 امین اوله ماز . بز یارین میدانه چیقار سه ق برنجی ایشیمز سنی ازمکدر ! »
 دیمش . جودت افندی جواباً « بن داعیان دولتدن ایم ! کچوک رتبه ده
 بر آدم ! وکلانک اختلافنه قاریش مق بکا یاقیشماز . بن هر کسله باریشغم
 بهمه حال بر بایراق آلتنه کیرمک لازم کلور سه بایزید میداننده بر
 بایراق آچوب یالکزجه آلتنه اوتوریرم . » دیمش .

کندیلرندن کچمامک ایچون دوچار اولدینی بومعاملات ناروا ،
 آرتق جودت افندینک پک زیاده کوجه کیدیوردی . رشید پاشانی
 ترک ایتکی نانکوردلک عدایلدی کی اکا پک بیوک محبت قلبیه سی
 واردی . وفؤاد افندی ایله اوزمانه قدر اولان انسیت و محبت اخوتکارانه یی ده

اونوده مازدی . و آتی ده پک سوه ردی . سودکلی طرفدن کلن
 بو رودت ایسه اکا اوقدر تأثیر ایتدی که او علمدن بتون بتون چکیلمک ،
 مأموریتی ده عالم سیاسیاتی ده ترک ایله کلدیکی ره ، مدرسه علمنه کیتمک ،
 اسکی تصورلرینی میدانه کیترمک اوزره قرار ویردی . آتی اومدرسه
 اوطه سندن چکنلر شمدی آتی ایصندیرمش اولدقلری علمدن
 صغودیورلردی . جودت افندی اوزمان شوبیتی سوبله مش ایدی .

یارک وفاسی یوق دل اغیار کینه جو

جودت عزیمت ایتلی عزلت دیارینه

فاتح مدرسه سنده کی اوطه سندنک دوشمه لرینی تجدید ایتدیرمکه
 تشبث ایلدی . اکمال اولندیغنده اورایه چکیلمسی مقرر ایدی .
 او ائنده یعنی ۱۳۶۸ سنه سی ذی القعدة سنک سلخی اولان صالی
 کونی بغته باب عالییه تشریف هایون وقوع بولدی . دائرة هایونده
 یوقارودن اشانغی دیزلمسی معتاد اولان ذوات میاننده جودت افندی ده
 بولندیغی حالده دیزلایلر . سلطان عبدالحجید حضر تلی آتندن اینوب
 دائرة هایونلرینه کیدرکن جودت افدینک اوکنه کلینجه طورودی .
 و عالی پاشایه باقهرق « جودت افندی بودکلی ؟ » دیدی . عالی پاشا
 « اوت افندیم » دینجه « بن آتی چوق سوه رم . زیرا هم درایتلو
 و معلوماتلو برذاتدر همده حسن اخلاقی واردر » دیوب یورودی .
 عودت هایوندن صوکره عالی پاشا جودت افندی بی چاغیروب توجه
 شاهانه نک حقنده برکال اولدیغنی تبشیر ایلدی . و ترجمه اولنق اوزره
 موقوف اولان اوراتی ویردی . و اندن صوکرده اودرلو اوراق
 هپ کندیسنه ویریلورودی . باب عالیده بردنبره جودت افندی به معامله

دکیشوب امنیت کوسترلمکه باشلاندى . رشید پاشا دائره سنده ده اولکيسندن زیاده رعایت ایدلمکه باشلاندى ، آرتق هرکس امنیت ایدیوردی .

ذات شاهانهك جودت افندییه اولصورته التفاتی جودت افدینك هیچ برطرف طومنه بوب دیدی قودیه قاریشمیدینی مسموع شاهانه اولمسندن ایلرو گلش بولندیغی صوکره جودت افندییه معلومات ویرمشلردر .

ایکی آیه وارمادن عالی پاشا صدارتدن ذی الحجهك یکریمی برنده عزل اولنه رقیرینه رشید پاشانك خصم قویسی داماد محمد علی پاشا صدر اعظم و آنک آدمیرندن محمود پاشا قپودان دریا نصب وتعیین اولندیلر . محمد علی پاشا خلقه پک زیاده عظمت و طفره فروشلق کوسترمش . رشید پاشانك نزاکنه مألوف اولان خلقه محمد علی پاشانك کبر وتعضمی پک آغیر گلش ایدی .

اواننده رشید پاشانك صرافی اولان مغردیجك او طهسی قپادیلوب دفترلی آلندی . لدی المطالع رشید پاشا متعلقاتندن بر خیلی ذاتك حصه مند تمتعات کثیره اولدقلری کورلمکله محمد علی پاشا طرفندن حضورهایونه عرض اولندی . و محمد علی پاشا طرفندن « رشید پاشا بزلری ارتکاب ایله اتهام ایدر . کندیمی عفت واستقامت دعواسنده بولنور . باقکز دائرهسی خلقی خزینه دولتی نصل یغما ایتمشلر » دینلیدی . بودفترده جودت افدینك اسمی بولونمامسی جملهك حیرت وتقدیرینی موجب اولدی . زیرارشید پاشانك اك تکلیفسز واکنفوذلی منسوبیتندن بولنیوردی . پدرم مرحوم رشید پاشا طرف شاهانه دن بول ، بول عطیه آلمقده ایدیسده رشوته تنزل ایتدیکنی ، ارتکابی

بولمديغنى سويله مش ایدی . اوکي شيلر اطرافنده کي کيمسه لرك ايتى ایدی . ارتکابی اولميان وزرادن برطاقلری اويله اطرافنده کي آدم لرك يوزندن طعنه اوغر ارلردی . رشيد پاشا منسوبانندن بو التزامات ايشنه کيريشميان پك آز کيمسه قالميشیدی . رشيد پاشا طاقنك ادعالي منع ارتکاب ايله معارف ومدنيك ترقيسنه خدمت ايله مك اولديغى حالده اويله چيرکين تمتعاه کيريشملری افکار عامه يه سؤ تأثير ايله مش ایدی . بين الناس اعتراضلر چوغالدى . عبدالمجيد خان حضر تلى ده بو التزام اصولنى « سرق ت مأوله » ديه تعبير بيورمشدى . او وقت هديه ناميله قيمتلى اشيا اخدى منع اولنديغى کي بو التزام اصولى ده منع اولنه رق مزايده سز اعشار و رسومات صاتيلماسى قاعده سى وضع اولدى . ارباب عفت ذاتاً اومقوله شيلردن حصه دار اولم دقلرندن بو امر ونهيدن ضرر کورمديلر . اهل ارتکاب ايسه هديه يرينه کيزليجه ارتشايه قويولديلر . و مزايده ده التزاماتى قياقمق کي يوللره دوکولديلر . بويله بول بول پاره قازانانلرک اکثريسى ده اومبالغى محافظه ايده ميوب درلو ، درلو سفاهتلرده صرف ايلديلر . هايدن کلن هويه کيديوردی !...

بر سته ايچنده بويله درت دفعه صدارتك تبدلى ايشلره طور غونلق وقاريشيقلق کتيردى . رشيد پاشانك خارجه قالمى پوليتقه جه موجب مضرت اولدى . مقدما عمر پاشا بوسنه يي اوروب بوشناق لرك صلابتلىرى قيردقدن صوکره قره طاغى ده اورومق ايسته يوب بر قاتلمك امانه دوشمش . داماد محمد على پاشا دخى آنك افکارىنى ترويج ايله مش ايسه ده رشيد پاشا بوکا احوال سياسيه نك مساعد اولمديغى بيلديکندن قىجى پاشا محمدعلى پاشا ايله فوآد پاشادن مرکب برانجمن خاص الخاص

عقد ایدہ رک کیفیتی موضوع بحث ایتدیروب بوندن صرف نظر ایتدیرمش ایدی . بو قراره دائر فوآد پاشانک عرض تذکره سنی غایت خفی اوله رق جودت افندی اوقویوب رشید پاشانک مخدومی علی غالب پاشا تبیض ایله مش ایدی .

قره طاغ اوزرینه حرکت اولنه جفی اولورسه دولتک باشنه صورتله بر قره طاغ غائله سی چیقارده جنی ، دولتی نصل مشکلات عظیمه یه اوغرا ده جنی بو تذکره مندرج ایدی .

پدرم مرحوم بونک حقنده دیمشدرکه « بو عرض تذکره سنک اصلی ویا مسوده سی بولنوب کورولسه رشید پاشانک احوال پولتیکه ده درجه مهارت و ملکه سی معلوم اولور . زیرا مطالعاتی سوکره دن برره بر ره ظهوره کلشدر » .

اولجه عمر پاشانی قره طاغ اوزرینه خفیا تشجیع ایدن محمد علی پاشانک صدارته کلمی عمر پاشایه بر قاتدها جسارت ویرمکه عمر پاشا بر قره طاغ مسئله سی چیقارمق اوزره وسیله آرایه رق بر تقریبله قره طاغ رئیسینی اورکوتمش . اوده حامی معنویسی اولان روسیه یه مراجعت ایتمش . وسکزیبیک قدر عسکر جمعیله حدودینک محافظه سنه قیام ایله مش ایدی . قره طاغ لیلر جوارلرنده کی نواحی یه تجاوزه باشلامه لرله دولت عثمانیه دخی آنلرک تربیه سنه مجبور اولوب عمر پاشایه اویولده تعلیمات کافیه ویرلمش . محمد علی پاشا ایله عمر پاشا ده کندی اعتقادلرنجه کویا بر فاتحلاک قازانمغه وسیله بولمش ایدیلر .

خارجیه ناظری فوآد افندی بو بایده دولتک حرکتی حقی و مشروع اولدیغنه دائر مفصل بر لایحه قلمه آلمش . عمر پاشا قره طاغ اوزرینه هجوم ایله ایلرولمکه ایکن اوستریا دولتی طرفندن

« لایتنکن » نام مرخص کلوب و یردیکی اولتیا تومده مندرج اولان مواددن بری بلکه برنجیسی قره طاغ اوزرینه سیوق اولنان قوه عسکریه نك اعاده سی خصوصی اولغله ناچار باب عالی عسکری کیرویه چکمی ایچون عمر پاشایه امر قطعی و یردی . قره طاغلو ایسه بوندن شیماردیغندن کوندن کونه قره طاغ مسئله سی کسب مشکلات ایتدی . رشید پاشا باب عالینك قره طاغ مسئله سنده خطا ایتدیکنی درمیان وفوآد پاشانك یازدیغنی مذکور لایحه نك محل اعتراضی اولان یرلرینی بیان ایتک اوزره جودت افندی یی فوآد افندی یه کوندردی . فوآد افندی رشید پاشانك اعتراضاتی تسلیم ایتدی . و « مقدما پاشا افندی مز صدراعظم ایکن کوچ حال ایله محمد علی پاشایه قارشو طوره بیلدی . شمدی بن آنك معیتده ایم ! نه یاه بیلورم ؟ بنی معذور کورمیلدر » دیه جواب و یردی . اندن صوکره بو قره طاغ مسئله سندن طولای کوریلان ضرر وزیانلر ایسه معلومدر .

عالی پاشا صدارتدن عزل اولنجه جودت افندی یه کندیسنی تدریس ایچون رجالتیمکه جودت افندی آکا درس و یرمکه باشلادی . آنلرک آرتق اولکی کبی رشید پاشا دائره سنده بولوشمق امکانی بولمادیغندن جودت افندی اکثریا کوندوزلری وقت بولدیجه و بعضاده کیجه لری عالی پاشانك یانه کیدوب درس و یرردی . عالی پاشانك عربیده قوتی یوق ایدی . جودت افندی آکا علم نخودن برکونینك عوامل نام رساله سنی اوقوتدی . وقواعد عربیه نك تطبیقاتی کوستره رك بر چوق عربی عبارهلر اوقوتدی . علم منطقدن ایساغوجی اوقودوب آغزدن کندیسنه اقیسه ترتیب ایتدیره رك قواعد منطقیه نك تطبیقاتی دخی کوستردی . جودت افندی شا کردینی

بک ذکی و مستعد بولدیغندن آنی تدریس و تعلیمدن ممنون ایکن
ربیع الآخرک اواسطنده عالی پاشا از میر والیسی اولوب بر بحق آی
صوکرده از میره کیمسیله تحصیل ناتمام قالدی .

او ائناده روسیه دولتنک فوق العاده مرخص ایلچیسی اولان
موسیو منجیقوف استانبوله کلدی . واقع اولان بعض معاملاتندن
طولای فواد افندی استعفا ایتمکه حمادی الاولانک اواخرنده رفعت
پاشا خارجیه نظارتنه فتیحی پاشاده تجارت نظارتنه کتیرلدی . بر آی
صوکره طوپخانه مشیری اولدی . بو صورتله رشید پاشا مکتب
تربیه سندن یتشدیر بلانلر هپ ایشک خارجنده قالدی . لکن احوال
پولتیقیه آغیر لاشمغله رشید پاشایه لزوم کورولدی . او وقت قدس
شریفده کی اناختار مسئله سی اوزرینه روسیه ممالک عثمانیه ده اورتودوقس
مذهبنده بولنان خرسیتیانلر حقنده حمایه دعواسی ایدوب دولت
عثمانیه ایسه بونی محل استقلال کورمکه ایش کشا کشه دوشه رک
کوندن کونه روسیه ایله دولت عثمانیه بیننده محاربه اماره لری قوت
بولوردی .

۱۲۶۹ سنه سی شعباننک اون طقوزنجی کونی مجلس والا رئیسی
بولنان کریدلی مصطفی پاشا صدارته کتیرلدی . رشید پاشا خارجیه
ناظری ، محمد علی پاشا سر عسکر ، رشیدی پاشا خاصه مشیری ،
رفعت پاشا مجلس والا رئیسی اولدی .

روسیه محاربه سنک مقدماتی رونما اولمغله بر چوق خاص و عمومی
مجلسلر انعقاد ایله مکده ایدی . بونلرک نتیجه سنده روسیه سیف ایله
مقاومت ایچون قوتمز کافی اولمדיنی کلاشیلدی . هر کسک امید
رشید پاشانک مهارت قلمیه سنه قالدی . اوت ! بتون عثمانیلرک نظر

امیدی بر آز اول عالی پاشا و محمد علی پاشا خاطری ایچون آنلره یارانلق اوزره خانه سینه اوغرامدقلری ، آدملرینه سلام ویرمکدن چکیندقلری رشید پاشایه منعطف بولنیوردی . اومتین عالیجناب ، قلی پاك اولان وطنپرور ، قارشوسنده خصم بی امانی محمد علی پاشانك بولندیرلدیغنهده باقمه یوب وطنی ، ملتی ، دولتی ایچون اوایله شیلری دوشونمه یوب اولانجه قوت وحیت وغیرتیه ایشه باشلادی .

اوارهلق از میر والیسی و صدراعظم معزولی عالی پاشان جودت افندی یه بر مکتوب گلش ایدی که عالی پاشانك مشهور اولان کتابتندن بر نمونه اولمق اوزره صورتی درج ایدیوروز .

عالی پاشانك مکتوبی

خواجه محترم افندم

کرمنامه کر مکارانه کزدن خدا بیلور پك آشوری متشکروممنون اولدم . طبیعت بورایه مناسب بعض عبارات و ادبیات عربیه درجیه اظهار فضل ایتمک ایستهدی . لیکن بخت سیاهم اولبایده سرماییه تدارکنه مانع اولدیغندن یینه بزم قبا ترجمه ایله اکتفا اولندی . همم برکزیده لری اثری اولمق اوزره بر آراق چهره بصیرتدن رفع پرده جهالته موفق اوله جغمی مأمول ایتم ايسهده بوكاده فلک مساعده ایتمدی . هامش کرمنامهده اشارت بیورلمش فقره لر ،

بلبل آغلر کل جگر خون لاله پر داغ الم

ذوقی بیلیم بودار محتك کیمدر سورن

بیت مشهورینی اخطار ایتمدی . اه انجانی خیر ایلیه احوال

علمده اولان مضایقه واضطراب هریره تأثیر ایلدیکندن هیچ بر محاکم
لذتی یوق . لکن اوزاقده بولمقده حال بشقه اولیور . جناب فیاض
مطلق ولی نعمت ملک خصلت افندی می هر حالده موفق بیوره جقلری
دلائل سابقه دن استدلال اولنه رق ایسته بونکله تسلی بولمقده در .

ایک بوجکی رساله سی ایچون دخی مخصوصجه تشکرایدرو بعدزین
دخی خاطر دن جیقارلما مقلمی نیاز ایلرم افندم . فی ۱۱ ش سنه ۶۹

عالی

بو مکیتوک و رودنی متعاقب عالی پاشا ایله از میر آوستریا
قونسولوسنک آرمه سی بوزولمسنه مبنی آوستریا سفارتنک شکایتی اوزرینه
عالی پاشا از میر والیکندن عزل ایدلدی . شوالک هفته سنده استانبوله
کلدی . عالی پاشا دولتک امور خارجیه سی ادارهیه مقتدر ایکن
از میرک امور اجنبیه سی اداره ایده مامش کبی عزل اولنسنه پک جانی
صیقلمش و بوندن طولانی رشید پاشایه کوچنمش ایدی . لکن
عالی پاشا ایله فوآد افندی نیک باشلرنده استادلری اوله دن کیریشدکاری
پولتیقه ده آنک معیتنده اوله رق ترتیب و تعریفی وجهله چالیشدقلری
زمانکی کبی مهارت و موفقیت ابراز ایده مدکارینه دقت بیوریلوریا !
فوآد افندی محمد علی پاشا صدارتنده خارجیه ناظری ایکن
قره طاع مسئله سنک ظهورینه سببیت ویرلمی محمد علی پاشانک
یوزندن ایسه ده بونک خارجیه ناظرینه تعلق و فوآد افندی طرفندن
او خصوصه دائر یازیلان لایحه نک بر چوق یرلرینه رشید پاشانک
اعتراضاتی فوآد افندی نیک تسلیمه مجبور اولیشی ، عالی پاشانک ده
از میرده بر پولتیقه بوزغونانی چیقاریشی آنلر کندیلرینی رشید پاشا

مرتبه سنه گلش ظن ایش ده اولسه لر مهارت سیاسیه ده آنک درجه سنه
واره مادقلرخی ابراز ایلر .

محاربه مسئله سی

روسیه محاربه سی باشلامزدن اول ساده دلان زمان موسقووه
شهرینه بلکه پترسبورغه کیتیمک وهیچ اولمازسه قریمی فتح ایتیمک
خیال خایله پک زیاده جنبه خواهشکر ایدیلر . آلا فرانغه لق
صاتان طاقم ایسه محاربه ظهورنده اوچ آیه قدر روسیه اردوسنک
ادر نه یه کله جکی ادعاسنده بولنیوردی . ایکی طرفک فکرلری ده
یا کاش ایدی . زیرا روسیه نك قوتنه معادل قوتمز اولمدینی جای
بحث دکل ایسه ده تنسیقات عسکریه ایجابجه دولت عثمانیه نك نظامیه
وردیف اوله رق جمع ایده جکی قوه عسکریه نك روسیه اردولرخی
بر خیلی وقت اشغال وتوقیف ایده بیله جکی ده اربانجه معلوم ایدی .
نصل که وقوعات ده بونی اثبات ایلدی .

سلطان عبدالحجید خان حضر تلی قان دوکیمی سومدیکندن
محاربه ایسته مزدی . رشید پاشا دخی حرب ایسته میوب مسئله نی
قلم ایله حل وتسویه ایله مکه چالیشیوردی . عالی وفوآد افندیلر کبی
رشید پاشا چراقلری اولان دیپلوماتلرده حرب ایسته میورلردی .
عسکری طاقی حرب هوسکار بولنیور . محمد علی پاشا ایسه حرب
طرفدارلغنده اوست تتکده بولنیوردی . محمد علی پاشا حرب
طرفداری کورینه رک رشید پاشایه مخالفتده بولمغله قالمدی . دولتک
اوله بر نازک زمانده حرب مسئله سی ده رشید پاشا علیبنده انترقه

چوپر مکہ بر فرصت اتخاذ ایلہ مکہ کی انسانیتہ وطن پرور لکہ یاقیشمیان
بر حرکتہ بولندی . وطنی نائرہ حربہ طوتشدیروب او آتشدن
چبوغنی یاقنی دوشونیوردی . ناسہ حرب ایتکده فائده بولندی
حالده رشید پاشانک بوکا مانع اولدیغنی سویلتدیروب اورتلخه فساد
صاحدی . وسوخته لری بعض وسائل ایلہ تحریک ایدہ رک سوقاقره
دوشوردی . ورشید پاشا عزل اولنورسه اختلالک بر طرف اوله جغنی
دیگر واسطه ایلہ عبدالمجید خان حضرتلرینه القا ایتدیردی . اورتهده
اختلال یوق ایکن کوریلان صورت اغتشاشی ده میدانہ کتیرن
کنیدیسی ایدی . سلطان عبدالمجید او مقوله القا آتی دیکله مدی .
سوخته لرک حرکتدن اورکمدی . محمد علی پشاده ذات شاهانه یه
بالواسطه القا آدن کیرو قالمه یوردی . خواجه شہریاری آقشہرلی
عمر افندی شیخ الاسلام عارف حکمت بک طرفندن اوله رق حضور
هایونده بعض وکلانک تبدیلیله بو حرکتک بر طرف اوله جغنی افاده
ایلدیکنده ذات شاهانه عمر افندی یه « خواجه افندی ! بر طاقم
اسافلک سوزیلہ وکلا عزل وتبدیلنه قیام ایدر ایسه ک سوکره بودواتی
اداره ایدہ مہیز ! » بیورمشدر .

اوانئاده ذات شاهانه بر اقشام طعامی طوپخانہده تناول بیورروب
سرای هایونلرینه عودت بیورمہ جقلرنده مملکتده اختلال قورقوسی
بولندیغنه علامت اولق اوزره آرابہ سنک اطرافنه بر بلوک سواری
حاضر ایدلمش اولدیغنی کورونجہ « عموماً خلق علیہم زده اولدیغنی
تقدیرده بر بلوک سواری نی محافظہ ایدہ مز ! » دیہرک سواری بلوکنی
کیرو چوپرتمشدر .

او وقتلر بعض محارره یافتلر یابشدی کہ صورتی بودر :

« ای پادشاه شوکت اکتناه کافه تبعه کز اوغور شاهانه کزده
 جان و مال و اولادینی فدا ایتمه حاضر و آماده درلر . سزده اجداد
 واسلافیکز کی ایوب انصاری حضر ترنده قوشاندیقکز سیف
 محمدی بی قیندن حقه ارمق اوزریکزه واجب اولدی . بو باده
 وکلا کزک واقع اولان ترددلری بر زماندنبرو عزت نفس علتیه
 مبتلا اولملرندن نشئت ایتشد . و بو کیفیت حفظ الله جمله بی بر تهله
 مشکله یه القا ایتک احتمالی واردر . بناءً علی ذلک عسا کر نصرت
 موعود کز وداعیان قولاریکز حقوق صریحهلرینک مدافعه سی ایچون
 غوغا ایستلر پادشاهم »

ا کثر وکلاده روسیه محاربه سنی ایسته میورلردی . لکن مسئله
 اولیه بر حاله کشیدی که عوام ناسک طعن و تشنیعندن اجتناب ایله
 بو فکرلرینی علناً سویلیه مزلردی . رشید پاشا « قوتمز وارسه
 هیچ طور مایوب حربه قیام ایتهلر یز . لکن روسیه ایله محاربه یه
 قوتمز کافی دکلدر ! » دیوردی . رشید پاشا بر یاندن قلماً ایشی
 تسویه ایلهرک حربه مانع اولمغه چالیشیور ، بر یاندن ده کافی کورمیدی
 قوت ایچون معاونتله حصوله کتیره رک تزید و تأکید قوت ایچون
 اوغراشیور . اوروپا دولترلرینی روسیه علیه قیام ایتدیرمه
 چالیشیوردی .

محاسن عمومیه ده هر ایکی طرف یعنی رشید پاشا طرفی ایله
 محمد علی پاشا طاقی کندی مطالعه مخصوصه لرینه موافق لسان
 قوللانمقله وکلا بیننده اختلاف بولندیغی آکلاشیلیوردی . رشید پاشا
 اوتهدنبرو شیخ الاسلام عارف حکمت بکه پک زیاده متوجه اولدینی
 حاله حرب مسئله سنه دائر اولان او محاسن عمومیلر ده عارف حکمت بک

محترزانه واختياطكارانه طاورانوب مباحثات واقعه‌ي سـكوت ايله
كچيشديروب ايكي طرفي دخي قيرمامق مسلككنده بولندي. مجلس والا
مفتيسي عارف افندي ايسه پك مردانه وسر بست طاورانمسيه رشيد
پاشانك توجهي قازاندي .

ذات شاهانه سوخته سوزيله وكلا تبديلي تجويز ايتديكندن
ويرديكي امر قطعي اوزرينه اختلاله اوك آيق اولان سوخته
وخواجهلردن بر چوغى توقيفله نفي اولندي . عارف حكمت بكك
بوخصوصده دخي سيرجي كبي طاورانمسي رشيد پاشانك پك كوچنه
كيتدي . رشيد پاشا بو اختلاك كندى علمينه احداث اولمش بر
كيفيت اولديغنى بيلديكندن بر قاچ كيجه قوناغنه كله ميوب بشكطاشده
قالمش ايدى .

مجرد ذات شاهانه‌ك متاتي ايله اختلال برطرف اولمش ايسه ده
حرب محتمل اولديني بر زمانده علما طاقنك وكلا علمينده بولنمسي
موافق حال ومصلحت اولهميه جغنه مبنى علمانك اصلاح افكارى
الزم كورلمسكه بواىر مهمى رشيد پاشا جودت افندي يه احاله ايلدى .
جودت افندي صاحلين ايركندن خواجه يحيى افندي يه كيدوب
آنى آله رق باب مشيخته كيتديلر . عارف افندي وقتوى اميني
رفيق افندي ايله درسعام خواجه افنديلرك اك ايلرى كلانلردن
بعضيلريني جلب ايله جودت افندي طرفندن تصوير مسئله اولندي .
فيا بعد خواجهلر ايچنده اوليه يولسز حركتلره ميدان ويرلميه جكنه
دائر سوز آلندي . او يولده بر مضبطه ياپيلدى . وهان اوكون
سراى هايونه تقديم ايدلدى . هر كونا قيل وقالك ده آرقه سى آلندي .
رشيد پاشا جودت افدينك بو خدمتدن پك زياده ممنون اولمش

و آنک حقنده کی توجه و محبتی تزايد ایشدر . ذات شاهانده جودت
افندینک او خدمت و موفقیتدن پک ممنون قالمشدر .

رشید پاشانک حرب اولسنی ایسته میوب مسئله یی قداماً تسویه ایله مک
خصوصنده کی آرزو و غیرته رغماً ۱۲۶۹ سنه سی اواخرنده روسیه
ایله محاربه یه قرار ویرلدی .

حرب زماننده

رشید پاشا حقوق سلطنت سنیه نک محافظه سنه پک زیاده اعتنا
ایدوب روسیه دولتنک تکالیفه کمال صلابت و مهارتله قارشو
طورردی . فقط اروپانک موازنه افکار پولتیقه سنی دائماً پیش
نظرده طوتاردی . و محاربه ظهورنده روسیه یه قارشو دولت عثمانیه نک
یالکز قالماسی چاره سنی ازاردی . اروپاچه علی الخصوص انکلتره چه
کندیسنک پک بیوک شان و حیثیتی اولدینی حالدہ مجار ملتجیلری
مسئله سننده تزئید شهرت و اعتبار ایلدیکندن بو ارزوسنی احسن
طریقله حصوله کتیردی . فرانسه و انکلتره و ساردونیا دولترینی
روسیه علیه اتفاق ایتدیردی . عساکر عثمانیه روم ایلی و اناتولی
سرحدلرنده روسیه عسکرینه حرب ایلکده ایکن بو اوچ دولتنک
عساکری دخی کلوب عثمانیلره معاونته قیام ایلدیلر .

عثمانلره معاونت خصوصنده کی بو اتفاق حصوله کلکی هپ
رشید پاشانک اثر همتی و مهارت سیاسییه سیله اروپاچه قازانمش اولدینی
اعتبار و شرف اثری ایدی . بو امر مهمک حصوله کلکسنده ایسه

عالی پاشا و فؤاد افندینک معاوتی یوق ایدی . زیرا او زمان آنلر آنک معیتندہ مستخدم بولمہ یورلردی .

۱۲۷۰ سنہ سی جمادی الاولاسنک دردنجی کونی رضا پاشا سر عسکر ، قبریسی محمد پاشا قومودان دریا اولدی . محمد علی پاشانک ہمتیلہ قومودان دریا اولان محمود پاشانک اہلیتسرلکی وسوء تدبیری آنارندن اولہرق سینوبدہ دونمای ہایون محترق اولغلہ محمود پاشاعزل ایدلمش ایدی . جمادی الاخرک یکرمی دردندہ عارف حکمت بک عزل اولنہرق عارف افندی شیخ الاسلام و شکیب افندی رتبہ بالا ایلہ مجلس والا رئیس اولدی .

او وقت جودت افندی ینہ مشکل بر موقعدہ بولندی . عارف افندی عارف حکمت بکہ کیدوب کلانلرہ خوش نظارلہ باقہ یوردی . جودت افندینک عارف افندی ایلہ مناسبتی قدیم اولوب عارف حکمت بکہ آنی عارف افندی توصیه ایتمش ایدی . عارف حکمت بکدندہ ایولک کورمش اولدینی جہتلہ معزول بولندینی زماندہ آنی ترک ایلہ مکی دہ انسانیتہ منافی کوریوردی . بردہ محتاج اولدینی کتب نادرہ یی بشقہ یردہ بولہ مدینی جہتلہ دائما او اعارہ ایلہ مک لطفندہ دخی بولنیوردی . جودت افندی اولجہ رشید پاشا ایلہ فؤاد افندیدن ہر ایکسنی ترک ایلہ میوب وکلا ارسندہ کی اختلافہ کیریشمدیکی کبی او زماندہ عارف حکمت بکلہ عارف افندینک ارسندہ کی بوزغونلغہ باقاییوب مسلکندہ ثابت قالدی . اولجہ فؤاد افندی ایلہ کوروشدیکندن رشید پاشا دخی ناخشنود ایکن صوکرہ جودت افندینک کندیس حقتندہ کیمسہ یہ سوز سویلتمدیکنی خبر آلمش و علما ایلہ طلبہ علوم بینندہ رونما اولان فساد افکارک ازالہ سی خصوصندہ واقع اولان

سعی و غیرت خالصانه‌سی کورمش اولمغله اندن پک ممنون و متشکر
قالمش اولدیغندن عارف افندی‌نیک ده احبابلق قیمتی بیلیمی کی بر
صمیمیتی اکلایه‌رق آنی تقدیر ایلیه جکندن امین بولنیوردی .

دولت عثمانیه روسیه محاربه‌سیله مشغول ایکن یونان طرفندن
اشقیاده حدودی تجاوزله یانیه و ترحاله‌ی حساره دوچار ایلدکارندن
اوطرفه بر مقدار عسا کر مصریه کوندرلش ایدی . محاربه‌ده عسا کر
مصریه منهزم اولمغله اشقیا فرصت بوله‌رق او جهته دخی دولت
عثمانیه بر غائله آچیلدی ! فؤاد افندی مأموریت مخصوصه ایله او
طرفه کوندرلدی . او اره‌لق عالی پاشاده خداوندکار والیسی اولدی .
یانیه و ترحاله طرفلرنده کی عسا کر هپ فؤاد افندی‌نیک معیتده
اولدیغندن قوماندای الیه الدی . پت کوزل قوماندانلق ایتدی .
اشقای تدمیر ایله مملکتی یونانیلرک شرندن قورتاردی . قلماً
اولان ایتدارینی سیفاً دخی کوستردی . فؤاد افندی‌نیک قدرت قلمیسی
کوسترمک ایچون او زمان جودت افندی‌یه یازدینی بر جوابنامه‌ی
بورایه درج ایدیورز .

فؤاد افندی‌نیک جودت افندی‌یه جوابنامه‌سی

فضیلت‌مآبا

مقدحجه بر کرنامه کرامیلرینه نائل اولوب جوانی یازمقده
قصور ایشیکن بو کره دخی بری دیکرینک ایچنده اوله‌رق ایکی
قطعه لطفنامه‌لرینه دسترس اولوب هم محجوب و همده ممنون اولدم .

واقع اولان قصورم مجرد کثرت مشغولیتمدن نشأت ایلشدر . هر
 حالده کوردیکم اثر محبتلرندن بیوک ، بیوک تشکرلر ایدرم . ایشته
 افندم قلمی سیفه دکشدم جنرالغمک اثرینی کوستردم . مرکز اشقیا
 اولان پته نام محلی اوروب بونک قوه تأثیریه یانیه نک نثره عصیانی
 منطقی اولدینی مسموع فاضلانلری بیورلشدر . حمد اولسون
 امیدمدن آز وقت ایچنده بیتدی . اثر موفقیت پادشاهی اولدیغندن
 هیچ شبهه یوقدر . شمدی حدود کنارینه چکلمش اولان اشقیایی
 اورمق اوزرهمیز . اودخی حاصل اوله جنی الطاف الهیه دن مستعدادر .
 شمذیک ناردده صحراسنده خیمه نشین بسالت اولوب اطرافه ولوله
 ویرمکده یز . فقط بو مأموریت کچن مأموریتلره رحمت اوقوتدردی .
 ولی نعمتم افندیمنک چکدکاری صیقیندییه دائر اولان اشعارلری
 خدا بیلور قلبه تأثیر ایلدی . والله علیمدر کیجه کوندوز کندولرینی
 وچکدکلرینی دوشنمکده ییم . چکیلور درد سر دکلدرد . لکن الله
 کندوسنی ینه بو کون ایچون صاقلامشدر . صرصرزده فلاکت
 اولان شو سفینه دولتک اداره سی ینه کندوسنک النده اولمسیندی .
 باطه جفنده هیچ شبهه یوغیدی . علی غالب پاشا افندیمنک خاک پای
 عالیرینه یوز سورر وبک افندیلرک دامن دولترینی تقیل ایدرم .
 معروضات مخصوصه تقدیمده قصورم واردر . لکن بر آیدر هیچ
 بر یرده طوروب اوطورمیوب طاغدن طاغه طولاشمقده ویک
 درلو شی ایله اوغراشمقده اولدیغمجه تله بوقباحتلرملک عفو اولنه جغنی
 امید ایلرم . رائف افندییه نشأت افندییه موسیو آغوبه سلام ایلرم

و ذات فاضلانہ لرینک دست معارفیو سترین تقییل ایلہ ختم گفتار ایدرم
افندم . فی ۲۰ ش سنہ ۷۰

عن معسکر ناردہ

جنرال اردوی یانیہ وناردہ

فواد

رشید پاشا اوروپا پولیتقہ سنی دہ دولت عثمانیہ لہنہ چویرمش
اولدینی خالدہ روسیہ محاربہ سی کی مہم بر مسئلہ ایلہ مشغول ایکن
محمد علی پاشا آنک قانی ایچمکہ تشنہ بولنیوردی . محمد علی پاشا
وطاقتی رشید پاشا ایلہ اولیہ نازک بر زماندہ دخی اوغراشمقدن واز
کچمہ یورلردی . اولیہ بر زماندہ آنلرک اولوجہلہ حرکتلری آرتق
رشید پاشایہ پک تاثیر ایلدیکندن محمد علی پاشایی بر طرفہ دفع ایتمہ نک
بر چارہ سنی آرایوردی . لکن حلیلہ سی عادلہ سلطانہ قارشو معاملہ
شدیدہ اجرا ایدہ میوب بوکا آلت اولہ جق بر واسطہ آراددی .
قبریسلی محمد پاشانک یکنی بسیم پک ایلہ رشید پاشا پک ایی کوریشوردی .
بسیم پک بر کون قبریسلی محمد پاشانک « بن صدر اعظم اولسہم محمد
علی پاشایی کیمسہ یہ صورمہ دن نفی ایدر . بعدہ پادشاهہ عرض ایلرم »
دیدیکنی رشید پاشایہ سویلہ مش اولدیغندن رشید پاشا ۱۲۷۰ سنہ سی
رجب پک یکر می طقوزندہ قبریسلی یی صدر اعظم یاپدیردی . خلیل
پاشادہ قپودان دریا اولدی . او صرہ دہ مجلس والا باش کتباتی
امین اقدی یہ ، ایکنجی کتباتی دہ او زمان مدحت افندی بولنان
مدحت پاشا مرحومہ توجیہ بیورلمش . بسیم پک دہ مدحت افدینک
خصمی اولوب علیہندہ بولنورمش .

رشید پاشانك قبریسی محمد پاشای صدارتہ کتیرمی محمد علی پاشا علیہندہ قوللامق مقصدینہ مبنی ایکن قبریسی صدارتہ کچدکن صوکرہ رشید پاشانك ارزوسنہ خدمت ایتک افکارندن فارغ اوله رق محمد علی پاشا ایله اصلاح ذات الینہ ابتدار ایله مش ایدی . حتی صدارتہ کچدکن آلتی کون صوکرہ عقد اولنان مجلس مخصوصده رشید پاشا « سرکاتبی مصطفی پاشای مجلس عالیہ مأموریتله ایچمزہ آلسه ق هم رأیندن استفاده ایدهرز ، همده هیئتمز دها قوت بولور » دیدیکنده قبریسی « اوت ! آنی ده آملی محمد علی پاشای ده مأمور ایتلی نیچون بوش طورسونلر ؟ » دینچه رشید پاشای هم حیرت ، همده حدت بورومکله « عفو ایدرسکیز ! محمد علی پاشا آنک کی دکلدر . تهلکه لی برآمدرد . آنک ایچمزہ کیرمی هیچ اولمز . » دیه سوزی کسديرمش . واول کوندن صکره قبریسینک عزلی اسبابنه تشبث ایله مش . برهفته اول آنی صدارتہ کندیمی کتیردیکی حالده درعقب عزانه قیام ایتمی چیرکین کوریه جکندن بالتدریج اسباب لازمه ق قرار ویرمش .

مترجم رشدی پاشا عربستان اردوسی مشیری تعیین اولنش ایکن ایاق سورومکده ایدی . آنک سرعسکرلکندنه قبریسی عربستان اردو مشیرلکندن عزل ایدلمش اولدیغندن رشدی پاشایه کین باغلامش اولغله عربستانه کیتمزسه نفی ایدلمسی امرنده اصرار ایدیوردی . رشید پاشا محرمانه جودت افندی بی رشدی پاشایه کوندردی . آنک عربستانه کوندرلمسی رشید پاشانك رأی و رضاسنه موافق اولدیغنی جودت افندی آکلاتدی . مجلس مخصوصده رشدی پاشانك شامه کوندرلمسی ، کیتمزسه حقنده معاملہ جبریہ اجراسنی قبریسی

سویلدیکنده رشید پاشا « یوق! بر آدمک اعتذار واستغفاسی اوزرینه
نفینه قدر کیده‌م! باب حرقی سد ایده‌م! بن اوپله معامله جبرییه
اجراسنه رأی ویره‌م! » دیه منع ایشدر .

شاگرد ثالث

رمضان شریف کلدی ، رشید پاشا بر کون افطاریه ویمکنی
چکوک صویه اصارلادقندن صوکره قایغنه جودت افندی بی آلوب
برلکده بعض سفرایه ویزیته ویردیله . اقسام اوزری چکوک صویه
کیدوب جودت افندیله افزارایتدی . بشقه کیمسه بولمه یوب یالکیز
ایکیسی باش باشه بولنیورلردی . آبدست آلوب نمازلرینی قیلدیله .
رشید پاشا سائرلرندن مکتوم اوله رق مداوم اولدیغی اورادینی اوقوددی .
صوکره چایرده برر اسکمله اوزرینه قارشو قارشویه اوتوردیلر .
ساعتلرجه اوراده قونوشدیله . رشید پاشا جودت افندیله دردلشدی .
اوزون اوزادییه حسب حال ایتدی . اولا عالی پاشا وفوآد افندیله
رشید پاشا دن یوز چویروبده علیهنه دوشدکاری وآنکه رقابته
قالقیشدقلری حالده جودت افدینک فوآد افندیله اولان مناسبات
اخوتکارانه‌سنی بوزمایوب آنکه کوروشدیکنده آنک حقنده امنیتی
سلب ایده‌جک نصل سوزلر سویلنمش اولدیغی وکندیسی سویلنن
سوزلره اینامه یوب نه‌صورتله تحقیق ، وصدق اخلاصنی نصل تجربه
ایلدیکنی مفصلاً اکلاتدقندن صوکره جودت افندییه اولان اعتماد
وتقدیراتی بیلدیله . فوآد افدینک تلونندن شکایت ایلدکن
صوکره لدنیاته کیرشدی . پولتیقه‌جه نه‌حال وموقعده بولندیغی شرح

وايضاح ايلدى . ايسته او وقت جودت افدى كنديسـنك حال وموقعى آكلادى . وبو حال وموقعك نزاكتنى بيلديكـندن آرتق اولكى كې لااباليانه هر طرفله كوروشهـميهـجـكـندن بر آز تلاش ايلدى .

رشيد پاشانك كتاب اسرار سياسيهـي قارشوسنه آچوبـده آندن تدريس ايلديكى اوچ كيمسهـدركه بونلر على ، فوؤد ، احمد جودت پاشالردر ، استـعدادلـرينى كوردىكى على وفوؤد افنديلىرى كندينه معاونته استـخدام ايلهـمك ودولت عثمانيهـده ديپلومات يتـشـديـرمك آرزوسيله اويولده تدريس وتعليم وتربيه ايلهـمش اولدينى حالده آنلر استادلرينه معاونته ، ال برلكيله چاليشوب دولـتـلـرينه بيوك ، بيوك ايشلر كورهـجـكـلـرى يـرده استـادـلـرينـك ترتيب وتعليماتيله كيريشـمش اولدقلى مسئلهـلـرده كى موفقتلـرنـدن شـماروب آنـكله رقابته چيـقمـشـلـر وخارجيه نظـارتـيله صـدارت كـي دأئـما رشـيد پاشايـه محتاج اولان مقامه حريص اولهـرق اورالـره كـنديـلـرى يرلـشمـك هوسـيله آنـك علـيـنه دوشـمـشـلـر ايدى . رشيد پاشا امور ديپلوماتسيـيـي ادارده آنلـره محتاج اولمـيـوردى . لـكن كـندى قانـه صوصامـش اولان رقيبى محمدعلى پاشا ايله فتحي پاشا ورضا پاشا كى اعداسـنـك آنـكله اوغراشمـسي آنى پـك زياده راحتـسـز ايتـمـكـده ودولته كورهـجـكى خدمـتـلـرده انـكل ومانع اولمـقـده ايـكن كـندى يتـشـديـردىكى ، ميدانه چيقاردىنى على پاشا وفوؤد افدينك حرص جاه ايله آنـك علـيـنه دوشـمـهـلـرى پـك زياده كوـجـنه كـيـتمـكـده ايدى . آنلـردن كوردىكى وفاسـزلـق اوزـرينه او استـعداد وذكايى كـنديـسـنده بولـديـنى جودت

افندی بی عالم سیاسیده یتشدیرمک ایسته‌مش ایدی . بر آره‌لق بسم بکله‌ده محرمانه کوروش‌مش ایسه‌ده بو امور داخلیه‌یه عائد مسائلده اولدینی کی او خصوصده دخی آرتق بسم بکله رسمی قونوشمغه باشلایوب اولکی اعتمادینی قالدیرمش ایدی .

رشید پاشانک اوچ شا کرد معلومات سیاسی اولان عالی ، فوآد ، جودت پاشالر شبهه یوق که او تدریس وتعلیمدن پک بیوک استفاده ایلدیلر . فیضیاب اولوب دولت‌لرینه پک بیوک خدمت‌لرده بولندیلر . لکن بر محررک هر شیدن زیاده انتسابی حقیقه اولق لازم کلدیکندن بونلرک بریسی‌ده پدرم اولدینی حالده بو اوچ شا کرددن هیچ بری دیپلوماتلرده تام بر رشید پاشا اولامدقلرینی تبعات وتدقیقات تاریخیه اعترافه مجبور ایله‌یور ! رشید پاشا بو اوچ شا کردینی تعلیم وتریه ایله‌مش ایدی . لکن بونلری یارادامازدی ! یاراتمق آنجق جناب حقه مخصوصدر . رشید پاشانک دیپلوماتلرده اولان استعداد فطریسی آنجق احسان خدا اوله بیلور .

اووقت اداره امور دولت رشید پاشانک النده اولوب زمان ایسه پک قاریشیق اولدیغندن پاشا پک چوق پولتیقه مشکلاتی ایله مشغول اولدینی حالده بر طرفندده خصماورقباسیله اوغراشمغه مجبور اولیوردی . فرانسه سفیری (باره کیدیلیه) دخی رشید پاشا علپنده بولنوب بعض مشکلات چیقارمقده ایکن فرانسه‌یه کیتمش رشید پاشا او جهندن بر آز تنفس ایش ایسه‌ده پک سودیکی حفیدی کریم بکک وفاتندن طولانی پک متالم ایش . او ائنده خداوندکار والیسی بولنان عالی پاشادن جودت افندی‌یه شو مکتوب ورود ایله‌مش .

صورت مکتوب

مکرم پرورا اقدام!

مکتوب ملاطفت و مرؤت اسلوب کریمانه لرینی ممنونیت عظیمه برله
 اخذ ایلدم . اثر بقای حسن نظرلری اوله رق قلمزن تحریر و تسطیر
 اولمش اولدقلری الفظ نوازشکاری و نکات دلشکاریدن طولانی پک
 چوق تشکرلر ایدرم و دعای بالخیر عافیتلرینی تکرار ایتمکله برابر
 رمضان شریفک دخی تبریکنه مبادرت وابتدار ایلرم . عاصم تاریخی
 مطالعه ایتدکدن صکره یوللایه جغنی عقیف بک افندی دخی یازمش
 اولدیغندن وشمذیلک تاریخ مزبورک بنده کزه پک دهنلومی اولدیغندن
 نهوقت او یار ایسه اولوقت کوندرمسی جواباً تحریر قیلندی .
 ذات حضرت ولی النعمینک کریم بکک وفاتندن طولانی دوچار اولمش
 اولدقلرینی اشعار بیورمش اولدیغکنز الم واضطرابی اولجه ظن و تخمین
 ایدرک الله بیلورکه متأثر اولمش ایدم . لکن نه چاره جناب حق همان
 کندولرینه توکمنمز عمر و عافیت احسان بیورسونده انشاالله تعالی
 متعدد احفاد ایله و آنلرک دخی احفادیلله تلافی مافات بیوررلر .
 بارکه دیلیه نک شو آراق اولوب کیتمسندن صحیحاً
 پک مسرور اولدم بر طاقم غوائل زائده ده حیقاردی
 و قلمش اولسه ده حیقاره جق ایدی . عبد الحق افندینک وفاقی
 فی الحقیقه موجب تأثر اولدی . مرحومک واقعا مزاجی بر آرز عجایب
 ایدی . فقط اسکی ظرفادن وارباب طبعندن میرکلام نادر المثل بر آدم
 اولدینی جهته لرینی بوش براقدی . تجاوز الله عن سیداته و رحمت الله

عليه خير الله افندی میراثه قوندیغندن پدرینک وفاتی آجیسنی اونو تمش اولمق کر کدر . دولتو علی غالب پاشا حضر تلرینه مخصوص عرض خصوصیت ایدرم و تصدیع قورقوسیله عریضه یازمه مدیغندن طولانی عفو عالیلرینی نیاز ایلرم و مولانا تیمی کورلدیکی حالدہ الارینی اوپدی کمی افاده یه مصروفیت همت بهیملرینی رجا ایدرم .

انشا الله وعد دولتکیز وجهله فصل حریفده بو طرفی تشریف ایله یازمه خزان افتراق اولان روضه قلبی رشک ازهار نوبهار بیور رسکیز .
باقی اوله سین همیشه باقی . فی ۵ رمضان سنه ۱۲۷۰

عالی

خضمانه علی الخصوص محمد علی پاشایه غلبه ایتمک اوزره رشید پاشا بعض ذواتی اله آلمغه مجبور اولدینی او صروده اسکی شا کردلری عالی پاشا وفوادی افندی ایله ده باریشدی .

او ائنده تاریخ جودتک اوچ جلدی تمام اولدیغندن مکافه ۱۲۷۰ سنه سی اواخرنده پایه سی سلیمانیه راده سنه ترفیع اولنان جودت افندی طریقته کبار مدرسینه قاریشمشدر . تاریخ جودتک آجیق ترکیه بر لسانله یازلمش اولمسی بین الناس پک چوق انتشار واشتهارینه باعث اولمش واولسانله غزتهلر چیقارلمغه باشلانمشدر .

۱۲۷۱ سنه سی وقایعندن

۱۲۷۱ سنه سی هجادی آخرینک اون برنجی چهارشنبه کونی غایت شدتلی برزله اولدی . باب عالیده کی کاتبلر کیمنک النده کاغذ،

کیمنک النده قلم وقلمتراش بولنديني حالده باب عالی میداننه اوغرا دیلر .
داود پاشا جامعنک صوڪ جماعت یرنده کی ایکی قبه سی ایندی . وبر
خیلی کارگیر بنالر صقتالاندى . کارگیر بنالرك برچوق اوطةلری
بیقلدی . قلعه دیوارلرینک بعض محللری آیرلدى . هرکس خوف
وهراسه اوغرا دی . اوزلزله دن قرق الی دقیقه صوکره ایکنجی
واون بش دقیقه صکره اوچنجی خفیفجه زلزله لر اولدی . مکر
مصائبک بیوکی بروسه ده وقوع بولمش . بوراده کی زلزله لر اوراده کی
حرکت ارضک سریندیسى ایمش .

مذکور چهارشنبه کونی بروسه ده ساعت یدی یحق قرارلرنده
هواغایت براق ایکن بردنبره بلوطلر ظهور ایله کوک یوزی قاراروب
درت طرفدن روزکارلر اسهرک شمشکلر چاقوب یاغمور یاغدی .
مثانی کورمدکلری فورطنلر حقیقه لره برابر باطی طرفندن برقاره
بلوط پیدا اولوب اوز دقیقه قدر او یله برقارانلق اولمش که کاتبلر یازی
یازامامشلر . اوآره لقی او یله شدتلی برصاعقه دوشمش که اهالی مملکت
باتیور صامشلر ! اندن اون دقیقه صوکره یعنی ساعت طقوزی چاریک
یکهرک حرکت ارض باشلا یوب اوتوز ثانیه قدر سورمش . اهالی
بولندقلری یرلردن چیقوب قاقچق ایسته مشلر سده یورورکن یوقوش
یوقارو چیقیورکی برحاله کلهرک نه یاپه جقلریخی ، نره یه کیده جکلریخی
شاشیرمشلر ! سلطان عثمان وسلطان اورخان تر بهلری طاقیله ، سلطان
مراد ثانی ویلیدیرم بایزید خان جامع شریفلرینک مناره لری ، اولو
جامعک یدی قبه سیله ایکی مناره سی سائر جامعلرک ده مناره لری هپ
منهدم اولمش ! سلطان مراد اولک انشا کرده سی اولان اورغانلی
کوپروسنک بعض محللری صقتالانمش وصوباشی کوپریسی اوزرندن

کچله میه جک قدر یاریش . حریر فابریقه لری ییقلمش و نیجه خانمانلر خراب اولمش . قلعه نك بر طرفنده دیوار ییقلوب التنده کی موسویلرک خانلرینی باصدیر مغله خیلی نفوسی تلف اولمش ! والتنده قالان ییغندیلردن یانغین ظهور ایله اوتوز قدر خانه ایله برایکی دکان یانمش . حرکت ارضك ارقه سی کیسلیمیوب قاپلیجه لردن بعضیلرینك صولری چکیلش ، بعضیلرینك صولری چوغلش . اهالی باغچه لرده ، قیرلرده بعضیلری چادرلرده اقامته مجبور قالمش . رجبك یکریمی اوچنه قدر لاینقطع اده صره حرکت ارض وقوعه گلش صوکره زلزله لر شدتلی اولدیغدن اهالی مسکنلرینه عودت ایله مش ، چارشو ، بازار آچیلمش . سقط و تهلیکلی خانه لردن ماعدا خانه لره گیرلمش ایدی .

رجبك یکریمی اوچنجی کونك اقشامی یعنی یکریمی دردنجی کیجه سی ساعت بری اون دقیقه کچهرک برکهرچله بخاری پیدا اولوب بش دقیقه دوام ایله مش . نهدن حاصل اولدیغی ، ونه اولدیغی بیلنه میوب هر کسی قورقو آلمش ایکن بردنبه بر زلزله شدیدیه حصوله گلش . مملکت کویا بر شدتلی فورطنه ده ایکی طالغه آرده سنده قالان کئی کبی صالانمش . و بنالر بر ایکی آرشون ایلری کیدوب ، گلش ! بووجهله حرکت ارض ایکی دقیقه دوام ایتمکله آرتق هر کس نه یابه جغنی شاشیروب انا ، اولاد بر برینی غائب ایدوب سرسم و سرگردان سو قافله دوشمشلر ! کارکیر بنالر خراب اولمش ، چارشو ، بتون ییقلمش . ناسک اموال اشیاسی ییقیندیلر التنده قالب کیمسه ماننه صاحب اولق ایچون یاقلاشه مازمش ! بوییقیندیلردن کیجه یانغین ظهور ایله اوچ درت قول اولمش . برقاجنه ییقیندیلر مانع اوله رق منطفی اولمش سده قباخان چارشو سنده کلیتلی کرسته بولدیغندن اورایه سرایت ایدن حریقك

اطفاسی قابل اوله میوب تاتارلر دنیلان محله یه قدر کیدوب بیسک
 بشیوز قدر خانه و دکان اموال و اشیا لریله برابر یانمش! صوباشی و اورغانلی
 کوپر یلری ، تماماً ییقلمش !

بروسه ده او حرکت ارضک وقوعنده استانبولده دخی پک شدتلی
 بر زلزله اولوب هر کسه دهشت ویردی . اوندن سوکرده بروسه ده
 خفیف زلزله لر دوام ایله رک پک چوق یرلردن صولر چیقمش واره
 صره صانکه بیوک بر شی ییقیلور کبی کورولدی لر ، کویا اون بش
 طوب بردن پاتلا یور کبی صدالر ایشیدلمکده ایمش . بونلرک آئارندن
 اوله رق رجبک یکر می آلتنجی جمعه ایرتسی کیجه سی استانبولده دخی
 بر حرکت اولمش فقط خفیف کچمش .

دولت عثمانیه نک پایتخت قدیمی اولان بروسه نک او یله خراب
 اولسنه فواد افندی شاعرانه بر سوز سویله مش :

— « عثمانلی تاریخنک دیباچه سی ضایع اولدی ! » دیمش !
 لکن غریبدرکه لساناً هر کس تأسّف ایلدیکی حالد بروسه نک
 احوالی تحقیق ایچون بر مأمور کوندریله مندی . بروسه ده او زلزله
 اولورکن کملیک واپوری در سعادته کلوب آچیقدن بروسه اوزرنده
 بر آتش کوردیکنی خبر ویردی . وولقان ظهورینه حمل اولندی .
 سوکره یاغین اولدینی خبر آلتدی . ینه قید اولنمیه یوب اورادن
 تحریرات و رودینه انتظار اولندی . بروسه ده کی خلق ایسه باشلرینک
 قایسنه دوشوب استانبوله کاغد یازمه دقلرندن طقوز کون سوکره
 تحریرات رسمیه کله بیلدی . حالبوکه انکلیزلر بروسه اهالیسنه اعانه
 اولمق اوزره ایکی کمی اکمک ایله بر خیلی پاره کوندرمش اولدقلرینی
 اون کون سوکره استانبوله کلان بروسه وجوهندن طاهر اغا خبر

ویردی . وکلا بوندن محبوب اولدی . بروسه ایچون اعانه طویلامق اوزره وکلا بیننده بز دفتر آچیلدی . بروسه ده زلزله لرك آرقه سی کسيلمديکندن آنلرك سربنديسی اوله رق اون برنجی کونی صباحلین استانبوله بر حرکت ارض اولدی .

۷۱ سنه سی رشید پاشا قبریسللی محمد پاشای غزل ایتدیروب کندیسى دردنجی دفعه اوله رق صدارته کادی . مابین هایون ایکنجی کابی صفوت افندی مجلس عالی تنظیمات اعضالغیله چراغ بیورلدى . اوئانده تقویمخانه ناظری ووقعه نویس دولت عا کف پاشازاده نائلی بك وفات ایتمکه ۱۲۷۱ سنه سی حمادی الاخرنده تقویمخانه نظارتی مجلس معارف عمومیه اعضاسندن رجائی افندی یه، وقعه نویسلک مأموریتی ده جودت افندی توجیه بیورلدى .

رشید پاشا جودت افندی بی محرم اسرار ایدیمش بولندیغندن دائماً یانندن آیرمدينی جهتله نازک ومهم اجرا آتک سیدی بین الوکلا جودت افندی یه عزو اسناد ایدلمی جودت افندی بی صیقئوردی . زیرا رشید پاشا جودت افدینک عقل اوکرتسنه محتاج بر کیمسه اولیوب جودت افندی آنک معلومات و بهره سیاسیه سندن مستفید اولیور ، اوخصوصده رشید پاشا استاد بولئوردی . رشید پاشا جودت افندی بی کندینه بر معاون اولمق اوزره حاضر لیوردی و تجربه ایلدیکی صداقتندن آنک بر شا کرد ومعاون وفاکار اوله جغنی امید ایلره رك هیچ یانندن آیرمدينی جهتله هرکس رشید پاشانک جودت افندی یه بو قدر توجه ورغبتی چکه میوردی . رشید پاشا جودت افندی یه او قدر رغبت کوستریوردی که اک زیاده سودیکی مخدومی علی غالب

پاشا بیلہ پدرینہ عرض ایدہ جکی خصوصات مهمہ دہ جودت افندی نی
توسیط ایدیوردی .

عثمانیلر ایله برابر حرب ایدن انکلترہ و فرانسه سفارتلرینک
باب عالیدہ نفوذلری واردی . بودولتک دوستاغنی قازانان رشید پاشا
اولدینی جملہ جه معلوم ایدی . رشید پاشانک انکلترہ ایلمچیسی سیر
قانون ایله آره سی پک اینی اولوب انکلترہ پولتیقه سنہ متمایل بولندینی
اوتہ دنبری متوانر ایدی آنک مکتب تربیه سندن چیقہ قلمری حالده
کندیسنہ رقیب اولان عالی وفوآد پاشالر بتون بتون فرانسه پولتیقه سنہ
باغلامشلا ایدی . سردار اکرم عمر پاشا انکلترہ طرفنه مائل اولوب
سرعسکر اسبق رضا پاشا هر کسدن زیاده فرانسه سفارتی مأمورینه
صوقولمش ایدی .

رشید پاشانک اوتہ دنبری انکلیز پولتیقه سی طومقمده اولمسی
کندیسنک منفعت دولتی او زمان انکلترہ پولتیقه سنده کورمسندن
اولوب سائر دولتلر ایلمده خوش کچینمک ودولت عثمانیه حقنہ
ترده منفعت کوررسه آندن استفاده ایلمک اوزره چالیشوردی .
هرسفر و سفارت مأمورینی کنندی دولتمک منفعت و تقوقی ایستہ می
واویولده چالیشمسی امور طبعیه دن اولدیغندن انکلترہ و فرانسه
سفارتلرینک باب عالیدہ کی نفوذلرینک تزیدی ایچون هر بری کنندی
طرفنه چالیشمسی ده طبعی ایدی . رشید پاشایه غلبه ایله آنک یرینه
قائم اولمق و موقعلرینی طومق ایستیان شا کردلری عالی پاشا وفوآد
افدینک بتون بتون فرانسه پولتیقه سی طرفدارلغنی طومهلری و رشید
پاشا اعدالرینک ده بریاندن آنی دوشوروب موقع اقباله کچمک ایچون
آنک حقنہ فرانسه سفارتنه لقردیله طاشیمهلری فرانسه سفارتی

مأمورینی رشید پاشانک دوشمه سی طرفی التزامه باعث اولمش
واواثانده بویکی سفارت مأمورینک باب عالی اوزرنده نفوذ سابقه سنده
بولمه لری ذاتاً امور دولتك اداره سی مسئله سی مشکلاته دوشورمش
اولدیغندن او اموری کندی دولتك نفی نقطه نظرندن اداره ایلک
ایچون چالیشان رشید پاشانک ده موقعی مشکلاتدرمش ایدی .

هرایکی دولت ایله ده خوش کچینمک آرزو سنده بولان رشید پاشا
وکلا و رجال آره سنده او یله آیری ، غیر یلغی ای برشی کورم دیکندن
فرانسه سفارتی ده کندی سندن خوشنود بولندیر مق ایسته یوب فرانسه
سفارتی مأمورینه پک زیاده حلول ایش اولان رضا پاشایی
سر عسکر و آنکله لازم و مازوم قیلندن اولان ضربخو ر پاشایی خاصه
مشیری نصب ایتدیردی . صفوقی پاشاده رضاپاشا طاقندن بولدیغندن
آنی ده مالیه نظارتنه کتیرمکه مجبور اولدی .

رشید پاشا ارتشادان و تمتعات ممنوعه دن متفر اولدیغی حالده
او هیئت وکلا ایچنده ارتشا ایله خلک لساننه دوشمش اولان
بعضیلرینک افعال و حرکتلرندن خوشنود اولدیغی حالده ایجاب حادن
اوله رق او مقاملرده بولندیرلملری آنی معذب ایلدیکندن وکلایی
محا که ایده بیلیمک ایچون مجلس عالی تنظیماتی تشکیل ایتدیرمش
ایدی .

۱۲۷۱ سنه می اوائلنده مجدداً تشکیل اولان مجلس عالی تنظیمات
ریاستی عالی پاشایه توجیه اولنوب مترجم رشیدی پاشا واولجه مجلس
والا ریاستنده بولمش اولان اولان رفعت پاشا وده پاشا صدوردن
رشیدی منلا و فوؤاد افندی و رکاب هایونه مأمور فریق ادهم پاشا
اعضالقلرینه تعیین اولندیلر .

قبریسلی محمد پاشاده التزام تمتعانه پک زیاده قارشو کلدیکنندن تمتعات ایله پاره طولابلری چویرنلر آنک عزله ممنون اولمش ایکن رشید پاشانک مجلس تنظیماتی چیقارمسی یوزلرینی ا کشیتمش ایدی . مجلس والا رئیس کامل پاشاده آنلرک التزاماته متعلق ایشلرینی مجلس والاچه ترویج ایتدیکی جهتله آکا دخی قیزغین ایدیلر .

او هیئتک خفی شرکتلر ترتیبیه تمتعاندن استفاده یه قیام ایله مش اولدینی و او شرکتلرک ایشلرینی قولایلقله یوروتمک اوزره رشید پاشانک ندیم بزم خاصی اولان محمود ندیم بکی ده کندیلرینه جالب ایله مش بولوندینی احساس اولنیوردی . حتی طنغر اوغلی اوخانس افندی نامنه قاپادیریان ازمیر و بیروت کمرکری مسئله سنده او هیئتک شریک اولدینی رشید پاشاچه آکلاشیلمش . مذکور کمرکاره ضم ایلانلر بولندیغدن آکا داو قومیسونلر عقد اولمغله او هیئت تلاشه دوشمش آنلر بو مسئله نی رشید پاشانک اورت باص ایتمه سنی آرزو ایتدکلی حالده تمتعات ممنوعه دن متنفر اولان رشید پاشا اوکی شیلر یانلرک تجزیه ایدلمسی آرزو ایلر مش . او هیئتک محمود ندیم بک ایله احباب اولمش بولمه لریده ایشلرینی رشید پاشایه ترویج ایتدرمک خصوصنده هیج بر فائده سی اولامدقدن باشقه آنی محمود ندیم بکه قارشو حدتاندیرمش اوزمان بومسئله ایچون رضا ، صفوقی پاشالر ایله محمود ندیم بک حقه پک چوق کفتکولر اولمش .

محمود ندیم بک بر یاندن سیر قانینه تملق ایلر . بر یاندن ده رضا و صفوقی پاشالر واسطه لرله فرانسه سفارتی مأمورینه خوش کورونمک ایسترمش . حالبوکه بعض یارانیه محرمانه مصاحبتی ائتمسند « اوزاق دولترلر طیانمقدن ایسه چار ملاصق اولان بر دولت ایله

هرنصل اولورسه اولسون اویوشوبده خوش چکنمک اولادر «
 دیهرک کندی فکربنک روسیه طرفدارای اولدیغنی بیلدیررمش .
 محمود ندیم بک رضا وصفوتی پشالردن فرانسه نفوذینک غلبه
 ایده جکفی ده او کرشم اولدیغندن او ائنده فرانسه سفارتی مأمورینک
 رشید پاشا علمینده بولمهلری جهتیله رشید پاشانک ده دوشه جکفی
 اکلایوب بر وزارت آلمش اولق اوزره او آردلق طشره والیلکنه
 طالب اولغله رتبه وزارتله صیدا والیسی تعیین اولندی . سلفی نامق
 پاشاده شام والیسی اولدی . رضا پاشا رشید پاشایه کلوب « افندم محمود
 پاشا ایشه یارار بر بنده کزدر طشره یه کیتمهده باری مجلس والا
 رئیس اولسه « دیه توصیه ایلدی . رشید پاشا کامل پاشایی عزل
 ایتدیروب یرینه محمود پاشایی نصب ایتدرمک خصوصنده کی بوتوصیه
 ایچون محمود ندیم پاشایه کندیسنی مجلس والا رئیس یادرملق ایسته .
 مکدن مقصد التزام شرکتلرینه مساعد بر رئیس ارامقندن عبارت
 اولدیغنی صورت انفعاله سوبله مشدر .

برده محمد علی پاشانک صراف مغردیجه ویرمش اولدیغنی سندلر
 تطبیق مهری مسئله سی واردی . محمد علی پاشانک کمرکدن خیلی مأخوذاتی
 اولوب مغردیجک اوراق ایچنده برطاقم تحویلاتی ظهور ایتشیدی .
 محمد علی پاشایه مراجعت اولندقدن مهرینی انکار ایتدی . ایشته
 بوماده نک اجرای تدقیقاتی صره سنده مجلس عالی تنظیمات تشکیل
 اولندی . بومجلسک وظیفه اصلیه سی کرک حواله اوزرینه ، کرک بلا
 حواله مجلسجه بدایه لزوم کوریلان قوانین ونظامات لایحه لرینی
 یایمق ونظاماته مخالف بر حرکت کوررسه بر مذکره ایله مقام صدارته
 اخطار ایتمک اولدیغنی کی برده وکلایی محاکمه ایله مک صلاحیتینی

حائز ایدی. بناءً علیہ مجلس مذکورک حین تشککنده در دست بوانان مسئله مذکورہ اورایہ حوالہ اولندی .

کیفیت موقع تدقیقه قوندقدہ یتش بشیک غروشلق برقطعه تحویلک مهری محمد علی پاشانک کندی مهر معتبری اولدیغنده اهل خبره متفق اولوب مهور محاسبه دفترندہ دخی قیدی مصرح بولندیغنه مبنی تحویل آنک سندی اولدیغنه حکم اولنه رق دیگر تحویلاتی تحقیقه حوالہ اولمشیدی . رشید پاشا جه مقصد سندادن برینک اولسون ثبوتیه محمد علی پاشانک ثبوت ارتکابی اولدیغندن بوآرزو حصوله کشیدی . ایش بو حالده ایکن نوره قبولی محمد بک محمد علی پاشایه ویرمش اولدینی اونیدی بیک کیسه اچقنهک استر دادینی دعوی ایتدی . کیفیت مجلس مخصوص وکلاده در میان اولندیغنده رشید پاشا « بونک طقوز بیک کیسه سی اراده لیدر . محمد بک آنی دعوا یه صلاحیتی یوقدر . باقیسنک مراغه سینه تشبث لازم کلور » دیمش مکر مقدا محمد بک رشید پاشا ایلہ محمد علی وفتچی پاشالره اوچریک کیسه ویرمی ایچون اراده سنیہ استحصال اولمش . فتچی و محمد علی پاشالر رشید پاشانک آغزینی قیامق ایچون آنی ده حصه یاب ایلہ مک اوزره او یولده اراده سنی استحصاله موفق اولمشلر سده رشید پاشا قبول ایتدیکندن مبلغ مزبور فتچی و محمد علی پاشالر بینده تقسیم اولنیویرمش . رشید پاشا بونی میدانہ قومقله کن دینک ذاتاً مسلم اولان عقتی ورقیلرینک یغما کر لکلرینی اظهار ایلہمش اولدی .

محمد علی پاشایه بو خصوصک مجلس عالی انتظاماته خواله سی لازم کله چکی وکن دیسنک بوبابده اولان معلومات وجوابی نه ایسه بیلنمک احباب ایلدیکی بیانیله برقطعه تذکره سامیه یازلدی . محمد علی پاشانک

یازدیغی تذکره جوابیه ده بواقچه یه حکومتک نه نظرله باقه جغی وبوماده
 نه ایچون مجلس تنظیmate حواله اولنه جغی ابتدا افاده اولمندجه بیسان
 معلومات ایده میه جکی بیلدیریلوردی. تکرار مجلس مخصوصده درمیان
 اولندیغنده دفعه یازیلان تذکره سامیه ده حکومتک بوکا نه نظرله
 باقه جغی ده مقرر اولدیغی، مجلس تنظیmate حواله سی ایسه حکومتک
 بیله جکی شی بولندیغی اشعار ایدلمش اولمغله محمدعلی پاشادن بوکا کلان
 تذکره جوابیه ده «بو بکا حقارتدر. بنده بوکا نه نظرله باقیله جغی بیان
 اولمندجه بوکا دائر بیسان معلومات ایتیم! بونکله برابر ینسه نیچون
 مجلس تنظیmate حواله ایدلدیکنی سؤال ایدرم. وبومعامله بنی تحقیر
 دیمک اولدیغندن بوکا نه دن ابتدار اولنیور دیو سؤال ایدرم. وارتق
 بنده ناموس وموقعی محافظه یه مجبور اوله جنم» دیمک کی حکومتی
 استخفاف یولنده سوزلر مندرج ایدی. اوصرده محمدعلی پاشا
 فرانسه سفارتنه مراجعت ایتمش ایسه ده فرانسه سفارتیه آرده سی
 پک ایی اولان رضا پاشا سفارتجه آکا یوز ویردیرمه مش ایدی.



3 1761 07130600 5

DR
568
.8
C48
F38